


O Le Liahona



**O Se Faaaliga Ua
Faamanuilaina Ai le
Lalolagi Atoa, i. 12**

Tulaga Tautupu o Tulaga
Faatama: O Se Vaaiga
i le Paia, i. 22

Auaunaga E Le Manatu
Faapito i E Puapuagatia, i. 26

“Ua Ia te Au Papatusi,” o le
Alaga Ilea a Iosefa, i. 32



“O LE TAMALII
O LE TULAGA FAALETAMA
UA TUUINA MAI AI IA I
TATOU SINA VAAIGA O
UIGA AUAUMAMA PAIA
O LO TATOU TAMA
OI LE LAGI.”

PERESITENE JAMES E. FAUST

Mai le “O Faatosinaga a se Tama Amiotonu,” itulau 22.

Liahona, Iuni 2018

TALA FAAALIA

- 22 O Faatosinaga a se Tama Amiotonu**
Saunia e Megan Warren
Na aoaoina au e tagata sa fai ma faatama i lou olaga e uiga i le taua o le [tulaga] amiotonu faaletama.
- 26 Tauaveina o Avega a le Tasi ma le Isi**
Saunia e Elder Jeffrey R. Holland
E ala i le faaaliga o le malamalama i fanau uma a le Atua, e mafai ai ona tatou auai i le galuega a le Matai.
- 32 Au Paia: O le Tala o le Ekalesia —Mataupu 4: Ia Mataala**
I le mavae ai o tausaga o faatalitali, sa iu loa ina maua e Iosefa Samita ia papatusi—faatasi ai ma le apoapoaiiga ina ia mataala.

MATAGALUEGA

- 4 O Atatosi o le Faatuatua: Devla Netane**
- 6 Mataupu Faavae mo le Auaunaga: E Lima Mea e Fai e Tagata e Faalogo Lelei**
- 10 Auaunaga i le Ekalesia: O Le Mea Sa Manaomia ai i Ma'ua**
Saunia e Wilfried ma Laura Eyi
- 40 O Leo o Le Au Paia o Aso e Gata Ai**
- 80 Seia Tatou Toe Feiloai: O Le Tatou Malutaga i le Sapati**
Saunia e Peresitene M. Russell Ballard



FAAMANATUINA O LE FAAALIGA OLE 1978

- 12 Tuuina atu o Faamanuiaga o le Perisitua**
O le auala na faamanuia ai e le faaaliga i le 1978 e faatatau i le perisitua ia tagata taitoatasi, aiga ma le Ekalesia.
- 16 Faaliga mo o Tatou Taimi**
Na manatua e Aposetolo e Toafa o latou lagona i le aso 1 Iuni, 1978, ina ua mauaina le faaliga e uiga i le perisitua.
- 18 Faamanuiaina i Soo se Auala e Mafai Ai**
Saunia e Elder Edward Dube
Sa ou mua'i faalogo e uiga i le tapu o le perisitua mo tagata uli, a o avea ma se faifeautalai faamisiona.
- 20 O le Faamamaluina o le Perisitua i se Tulaga Mauuluga**
Saunia e Charlotte Acquah
Na papatisoina a'u ina ua mavae le tolu masina talu ona taunuu ia uluai faifeautalai i Kana.



I LE FAAVAA
Ata pue na saunia e Christina Smith.



48

44 O Le Faatinoga Faapaleniina o le Tumau Ai

Saunia e Elder Michael John U. Teh
Faigaluega, auai i le aoga, tausi se aiga—e faapefea ona faapaleni a tatou tiutetauave?

48 O Le Faamaoni ia te Au Lava—ma i le Atua

Saunia e Faith Sutherland Blackhurst
Sa fesoasoani mai le Alii ia te au e tuu ese lo'u faamaualuga ae talia le faitioga a lo'u epikopo.



Vaai pe mafai ona e mauaina le Liahona o loo natia i le lomiga lenei. Faaitete: E faapefea ona e auauna atu i nai ou tei?

50 Sauniuniga o le Olaga: Mata O Le A Le Manaia Le Aualofa?

Saunia e Charlotte Larcabal
Sa ou iloaina o le Aualofa sa le o le mea tonu lea sa ou faamoemoe i ai.

52 Sauniuniga o le Olaga: O Lo'u Aso Muamua i le Korama a le Au Toeaina

Saunia e Dallin Luedtke
Sa tele ni mea ou te ofoina atu i le korama a le au toeaina pe afai sa ou naunau e saofaga i ai.

54 Mai le Misiona: Fesoasoani Faapoopoo

Saunia e Allie Arnell

56 O La Tatou Avanoa

58 Fai Mai lea Itulau ma lea Itulau Matou te Talitonu

Saunia e Richard M. Romney
Sa fai mai le tagata o lau vasega o Mamona e le o ni tagata Kerisiano—o lea sa tonu ai o le a ou sueina mo au lava mea o loo aoaoina ai i tatou i le Tusi a Mamona.

60 Fesili & Tali

E faapefea ona faateleina o'u lagona mautinoa? O le a le meaalofo o le iloaitino?


62 Iloa Au Meaalofo

Saunia e Justina Lichner

64 Pepa Lautele o I Ai se Savali: Malamalama Faaleagaga

65 O Le Upu Mulimuli: E I Ai Pea le Malamalama lina

Saunia e Elder Dieter F. Uchtdorf



76

66 Faasusulu Atu Lou Malamalama: Faaali Atu o Lona Alofa

E mafai ona ou lagonaina le alofa o le Tama Faalelagi a o'o'u auauna atu i lo'u aiga.

68 O le Taimi Moe mo Felise

Saunia e Heidi Poelman
Sa manao Anetone e toe foi atu i lana taaloga komepiuta—ae sa sili atu le taua o le auauna atu i lona uso.

70 O Totila ma Amigas

Saunia e Lindsay Stevens Tanner ma Maryssa Dennis
Sa fiafia Adriana e faasoa faatasi i se meaai mama ma lona tuaoi o Makalita. Ae sa sili atu lona fiafia e faasoa faatasi le la faigauo!

72 Musika: O Le Vavega

Saunia e Shawna Belt Edwards

74 E molimau Aposetolo ia Keriso

Saunia e Elder Dale G. Renlund

75 E Silafia Oe e le Tama Faalelagi

Saunia e Sister Cristina B. Franco

76 Tala o Tusitusiga Paia: Ua Mulimuli Mose i le Atua

Saunia e Kim Webb Reid

79 Itulau e Valivali: E Mafai Ona Avea Au o se Faatupu Filemu

52

O Le Lomiga Faamaonia Faa-Samoa a le Ekalesia
a lesu Keriso o le Au Paia o Aso e Gata Ai

Susuga a le Au Peresitene Sili: Russell M. Nelson,
Dallin H. Oaks, Henry B. Eyring

O Le Korama a Aposetolo e Toasefululua:

M. Russell Ballard, Jeffrey R. Holland, Dieter F. Uchtdorf,
David A. Bednar, Quentin L. Cook, D. Todd Christofferson,
Neil L. Andersen, Ronald A. Rasband, Gary E. Stevenson,
Dale G. Renlund

Faatonu: Hugo E. Martinez

Faatonu Lagolago: Randall K. Bennett, Carol F. McConkie

Fautua: Brian K. Ashton, Bonnie H. Cordon, LeGrand R.
Curtis Jr., Edward Dube, Sharon Eubank, Donald L.
Hallstrom, Douglas D. Holmes, Erich W. Kopischke

Pule Faatonusili: Richard I. Heaton

Faatonusili o Mekasini a le Ekalesia: Allan R. Loyborg

Pule o Mea Tau Pisinisi: Garff Cannon

Pule Faatonutonu: Adam Olson

Pule Faatonutonu Lagolago: Ryan Carr

Lagolago o Lomiga: Francisca Olson

Au Tusiitisi ma Faatonutonu: Maryssa Dennis, David
Dickson, David A. Edwards, Matthew D. Flitton, Lori Fuller,
Garrett H. Garff, LaRene Porter Gaunt, Jon Ryan Jensen,
Charlotte Larcabal, Michael R. Morris, Eric B. Murdock,
Sally Johnson Odekirik, Joshua J. Perkey, Jan Pinborough,
Richard M. Romney, Mindy Selu, Chakell Wardleigh,
Marissa Widdison

Pule Faatonusili Tusiata: J. Scott Knudsen

Faatonusili Tusiata: Tadd R. Peterson

Au Mamanu: Jeanette Andrews, Fay P. Andrus,
Mandy Bentley, C. Kimball Bott, Thomas Child,
David Green, Colleen Hincley, Eric P. Johnsen,
Susan Lofgren, Scott M. Mooy, Emily Chieko Remington,
Mark W. Robison, Brad Teare, K. Nicole Walkenhorst

Faatonu o le Puletaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosi: Ira Glen Adair, Julie Burdett, Thomas G. Cronin,
Bryan W. Gygi, Ginny J. Nilson, Derek Richardson

Tailolomi: Joshua Dennis, Ammon Harris

Faatonusili Lolomiga: Steven T. Lewis

Faatonusili o le Tufatufaga: Troy R. Barker

Mo le okaina o mekasini, alu i le store.lds.org po o le
faletusi Tutotonu i Pesega. Telefoni 64127. Totogi o le
Mekasini: \$0.55 (Samoa) i le kopi. Totogi mo le Tausaga
Atoa \$6.60 (Samoa).

**Auina atu tusitusiga ma faafesili i luga o le
initonetu** i le liahona.lds.org: pe meli mai i le *Liahona*,
Rm. 2420, 50 E. North Temple, Salt Lake City, UT 84150-
0024, USA; po o le i-meli: liahona@ldschurch.org.

O Le *Liahona* (o lona uiga i le Tusi a Mamona o le "tapasa"
po o se "faatonuuala") e lomia i le faa-Alepania, Aminia
(Sasae), Pisilama, Palekeria, Kemupotia, Sepuano, Saina,
Kalaotia, Siekisolovakia, Tenimaka, Take, Igilisi, Esitonia,
Fiti, Finelani, Farani, Siamani, Eleni, Hanikeri, Initu, Iselani,
Initonesia, Italia, Iapani, Kiripati, Korea, Lativia, Lituania,
Malakasa, Masela, Monokolia, Nouei, Polani, Potukale,
Romania, Rusia, Samoa, Saina (ua faafaigofieina), Silovenia,
Sipaniolo, Suetena, Swahili, Tagaloka, Tahiti, Tai, Toga,
lukureini, Urutu, ma Viatenama. (E eseese lava gagana.)

© 2018 Puletaofia e le Intellectual Reserve, Inc. Ua taofia
aia tatau uma. Lomia i le Iunaita Setete o Amerika.

Faamatalaga o le Puletaofia: Vagana ua faailoa atu,
e mafai e tagata taitoatasi ona kopiina anomea mai le
Liahona mo lo latou faaaogaina patino, ma le saili tupe
(e aofia ai mo valaauga o le Ekalesia). O lenei aia tatau
e mafai ona faaleaogaina i soo se taimi. O anomea o
mea faitino e le mafai ona kopiina pe afai o loo faailoa
mai se faasa i le laina o loo i ai ma le faatufatuga.
O fesili mo le Puletaofia e tatau ona faatuatusi mai
i le Intellectual Property Office, 50 E., North Temple
St., FL 13, Salt Lake City, UT 84150, USA; email:
cor-intellectualproperty@ldschurch.org.

For Readers in the United States and Canada:
June 2018 Vol. 42 No. 6. O Le Liahona (USPS 311) Samoan
(ISSN 1045-0947) is published monthly by The Church of
Jesus Christ of Latter-day Saints, 50 East North Temple,
Salt Lake City, UT 84150. USA subscription price is \$10.00
per year; Canada, \$12.00 plus applicable taxes. Periodicals
Postage Paid at Salt Lake City, Utah. Sixty days' notice
required for change of address. Include address label from
a recent issue; old and new address *must* be included.
Send USA and Canadian subscriptions to Salt Lake
Distribution Center at address below. Subscription help
line: 1-800-537-5971. Credit card orders (Visa, MasterCard,
American Express) may be taken by phone. (Canada Post
Information: Publication Agreement #40017431)

POSTMASTER: Send all UAA to CFS (see DMM 507.1.5.2).
NONPOSTAL AND MILITARY FACILITIES: Send address
changes to Distribution Services, Church Magazines,
P.O. Box 26368, Salt Lake City, UT 84126-0368, USA.

FAAOPOPOGA I LE INITONETI



Faitau tusiga ma auina atu la oe lava
tusiga i le liahona.lds.org



Sue savali musuia e mafai ona
faasoa atu (i le gagana Peretania,
Potukale, ma le Sipaniolo) i le
facebook.com/liahona



Auina mai finagalo faaalai i le
liahona@ldschurch.org



la lesitala i le store.lds.org
Po o le asiasi i se faletusi autu, fesili
atu i taitai o le uarota, pe valaau i le
1-800-537-5971 (I.S. ma Kanata)

AIKONA MAI LE GETTY IMAGES

AUTU I LE LOMIGA LENEI

E tau mai e numera le itulau muamua o le tusiga.

Agaga Paia, 16, 48

Aiga, 4, 20, 44, 66, 68

Aualofa, 50

Auauna atu, 6, 10, 26, 56,
66, 70

Faamanatuga, 80

Faamaoni, 48

Faamaualuga, 48

Faatuatua, 4, 18, 44

Fauoga, 70

Galuega faafaifeautalai,
41, 42, 54, 75

Iesu Keriso, 26, 58, 72, 74

Iloatino, 60

Iosefa Samita, 32

Konafesi aoao, 56

Korama a toeaina, 52

Liua, 75

Malamalama faaleagaga,
64, 66

Mea e Faamuamua, 44

Meaalofa faaleagaga,
60, 62

Perofeta, 56, 76

Perisitua, 12, 16, 18, 20

Sapati, 80

**Talafaasolopito o le
Ekalesia,** 32

Taleni, 62

Tama Faalelagi, 40, 43, 75

Tatalo, 4, 16, 43, 44

Tausiga [o Tagata], 26

To'a, 60

Toefuataiga, 30

Tulaga faaletamā, 20

Tusi a Mamona, 32, 56, 58

Tusitusiga Paia, 58

Usiustai, 32, 76





O ATA O LE FAATUATUA

O le fa o masina o lana maitaga lona lua, sa tau atu ai ia Delva o lana pepe sa i ai se faaletonu e seasea ona tupu i koromasome e ta'ua o le turisomi 13. Sa itiiti se avanoa e ola ai le pepe, ma talu ai e mafai foi ona lamatia ai le ola o Delva, o lea sa faafia ona fautuaina e fomai o ia e faapau le maitaga. O le feagai ai ma se taunuuga le mautinoa, sa filifili ai Delva e faatuatua i le Tama Faalelagi e tusa lava po o le a le mea e tupu.

CHRISTINA SMITH, LE PUE ATA

Delva Netane

Kalefonia, ISA

I le valu ma le afa masina, sa ou alu ai mo se faaata tafa 4 [4D].

I faaata na faia muamua, sa le mafai e fomai ona vaaia soo se vaaiga faaletino. Ona o lenei mea, sa latou fai mai ai o lima o lau tama teine o le a o ni ponati ae o ona foliga o le a faaletonu. O ata i se faaata tafa 4 e sili atu ona auilili, o lea ina ua amata e le tagata e galue i le masini le faaata, sa ou vaaia le lima atoatoa lelei o lau tama teine o talotalo mai ia te au i luga o le lau. Sa ou vaaia foi ni mata atoatoa se lua ma se gutu atoatoa. Sa ou maua se lagona faagaetia e le oti o ia.

Ina ua fanau mai le ma tama teine o MeLa, sa tutu sauniuni lava fomai faapitoa ae sa lei manaomia. Sa lei maua MeLa i le turisomi 13. Sa le mafai e fomai ma tagata faapitoa ona faamatala pe aisea, ae sa ma iloa ma lou toalua sa o se vavega.

Mataupu Faavae mo le Auaunaga

E LIMA MEA E FAI E TAGATA E FAALOGO LELEI

O le faalogo moni lava o le a fesoasoani ia te oe ia iloa le auala e fesoasoani atu ai lea e faamalieina ai manaoga faaleagaga ma faaletino o isi e pei ona faia e le Faaola.

Na saunoa mai Elder Jeffrey R. Holland o le Korama a Aposetolo e Toasefululua, “Atonu o le mea e sili atu le taua nai lo o le tautala, o le faalogo. . . . Afai tatou te faalogo ma le alofa, o le a tatou le tau mafaufau po o le a se upu e fai atu. O le a tuuina mai ia i tatou—e le Agaga.”¹

O le faalogo o se tomai e mafai ona tatou aoaoina. O le faalogo e faaalua ai lo tatou alofa mo isi, fesoasoani e atiae ai sootaga malolosi, ma valaaulia ai le Agaga e faamanuia i tatou i le meaalofa o le iloaitino e fesoasoani ai ia i tatou ia malamalama i manaoga o isi.² O auala nei e lima e mafai ona tatou faaleleia ai le auala tatou te faalogo ai.

Mauaina o se Tulaga Laugatasia

Atonu e te le ioe i mea uma ua talanoaina, ae ia ioe i mea e mafai ona e ioe i ai e aunoa ma le aveseina o ou lava lagona. O le ioe [i se mea] e mafai ona fesoasoani e faaititia le atuatuvaile ma le faatautee (tagai i le Mataio 5:25).

Manatunatu

Toe faaupu mea na e faalogo i ai ma le auala na e malamalama i ai i le isi tagata ina ia e lagonaina ai. O le a fesoasoani lena mea ia latou iloa ai pe ua latou malamalama ma tuu atu ai ia i latou se avanoa e faamanino ai.

Tuu Atu ia i Latou le Taimi

E toatele tagata e manaomia le taimi e āoāo ai o latou manatu a o le'i saunoa atu.

Tuu atu ia i latou le taimi e mafau-fau muamua ai ma pe a maea foi ona latou fai maia se tala (tagai i le Iakopo 1:19). Talu ai ona ua maea ona latou saunoa e le faapea ai la ua latou saunoa i mea uma na manaomia ona latou saunoa ai. Aua ne'i fefe i le leleoa (tagai i le Iopu 2:11–3:1 ma le Alema 18:14–16).

Gauai Atu

E vave atu lo tatou mafau-fau i lo le tautala o isi. Tetee atu i le faa-osoosoga o le vave oso i faaiuga pe muai mafau-fau i mea o le a e tautala ai pe a uma ona saunoa mai i latou (tagai Faataoto 18:13). Ae, faalogo ma le naunautai ia malamalama. O le a lelei atu lou tali atu ona o le a faailoa atu i se malamalamaaga sili atu.

Faamanino

Aua ne'i fefe e fai atu ni fesili e faamanino ai se mea e te le'i malamalama ai (tagai Mareko 9:32). O le faamaninoina e faaitiitia ai le malamalama sese ma faalia ai lou naunau i mea sa talanoaina.

Sa aoao mai Peresitene Russell M. Nelson e tatau ona tatou “aoao e faalogo, ma faalogo e aoao mai le tasi ma le isi.”³ A e faalogo ma le naunautaiga e aoao e uiga i isi, o le a e i ai i se tulaga lelei atu e malamalama ai i o latou manaoga ma faalogo ai i uunaiga e uiga i le auala e mafai ai ona e popole mo i latou o siomiaina oe e pei ona faia e le Faaola.

○ Le Faalogo ○ Le Alofa

○ se tala mai ia Elder Holland ua faaalua ai le mana o le faalogo:

“Sa faasolomuli lemu mai i fafo e la’u uo o Troy Russell lana pikiapu mai lana fale-taavale . . . Sa ia lagona le pa’u

pito i tua ua oso i luga o se patupatu. . . Sa ia oso i fafo ae iloa atu o lona atalii faapelepele e iva tausaga le matua o Austen, o loo faō i luga o le auala . . . ua maliu Austen.

“I le le mafai ai ona moe pe maua se filemu, sa lē mafaamafanafanaina Troy. . . Ae i lena taimi o tiga matuitui na oo atu ai . . . John Manning.

“Ou te le iloa po o le a le faatulagaga a John ma lana soa talavou na faia e asiasi ai i le aiga o Russell. . . Ae o le mea ou te iloa, o le tautotogo ua mavae sa aapa atu ai Uso Manning i lalo ma piki ifo i luga ia Troy Russell mai le faalavelave i lena auala taa-

AUAUNA ATU E PEI ONA FAIA E LE FAAOLA

A o malaga ese atu lesu mai leriko, sa alalaga atu ni alii tauaso se toalua ia te la ma faapea atu, “Le Alii e, . . . ia e alofa mai ia te i maua.

“Ona tu ai lea o lesu, ua valaau atu ia te i laua, ona faapea atu lea o ia, Se a se mea lua te mananao ai ou te faia mo oulua?

“Ona la fai mai ai lea ia te ia, Le Alii e, ia pupula o maua mata.

“Ona mutimutivale ai lea o le alofa o lesu, ua pa’i atu i o la mata; ona vaai [ai] loa lea o la mata, ona la mulimuli mai ai lea ia te ia” (Mataio 20:30, 32–34).

O le a se mea e mafai ona tatou aoao mai le auala na faalogo atu ai le Faaola?



vale e pei lava ona pikiina i luga e Troy lava ia ia Austen. E pei lava o le . . . uso i le talalelei sa tatau ona avea ai o ia, sa faia ai e John le tausiga ma le vaavaaiga faaleperisitua o Troy Russell. Sa ia amata i le faapea atu “Troy, e manaoga Austen ia e tu i luga i ou vae—e aofia ai le malae paseketipolo—o lea la o le a ou i ai iinei i taeao uma i le 5:15 a.m. Ia e sauni. . . .’

“‘Ou te lei fia alu,’ sa ta’u mai e Troy ia te au mulimuli ane, ‘ona sa ou aveina lava Austen i taimi uma. . . Ae sa finau pea John, o lea sa ou alu ai. Mai lena aso muamua, sa ma talanoa—pe ou te tautala foi ae faalogo John. . . I le taimi muamua sa faigata, ae i le gasologa o taimi sa ou maua ai lo’u malosi i le tulaga o [John Manning], o le sa alofa ia te a’u ma faalogo ia te a’u seia i’u lava ina toe oso a’e le la i lo’u olaga.’”⁴ ■

FAAMATALAGA

1. Jeffrey R. Holland, “Molimau ia te A’u,” *Liahona*, Iulai 2001, 16.
2. Tagai David A. Bednar, “Panel Discussion” (fonotaga faaleaoaoga a le au taitai, Nov. 2010), broadcasts.lds.org.
3. Russell M. Nelson, “Faalogo e Aoao,” *Liahona*, Me 1991, 25.
4. Jeffrey R. Holland, “Sui Vaaia i le Ekalesia,” *Liahona*, Nov. 2016, 66–67.



VALAAULIA E FAATINO

Mafaufau pe o le a faa-
pefea ona e faaagaina nei
mataupu faavae i le auala e
te auauna atu ai. Fesili atu
ia i latou o e e te auauna

i ai po o a mea latou te manaomia. Faalogo i a latou tali ma
uunaiga a le Agaga Paia. Faatino le mea e te faalogo i ai.



O mataupu faavae o le auaunaga ua faamoemoeina e fesoasoani ia i
tatou e aoao e fetausia'i ai le tasi ma le isi—ae aua ne'i faasoaina atu o
se savali. A o tatou iloaina i latou ua tofia i ai i tatou, o le a uunaia i tatou
e le Agaga Paia ia iloa po o le a le savali latou te ono manaomiaina e
faopoopo atu i la tatou tausiga ma le agaalofo.

O LE MEA SA MANAOMIA AI I MA'UA

Saunia e Wilfried ma Laura Eyi

O se uunaiga e siitia atu i Brooklyn, Niu Ioka, sa taitai atu ai i maua i auunaga ma faamanuiaga e lei mafai ona ma mafafauina.

I le 2013 sa ma nonofo i Manhattan, Niu Ioka, ISA. Sa ma fiafia i le ma uarota. Ona sa ma faatalitalia le fanau mai o le ma tamaitiiti muamua, o lea na amata ai ona ma vaavaai mo se falemautotogi tele atu i totonu o le uarota. Sa ma maua le fale sa foliga mai e fetui lelei, ae sa ese lava le faalogona.

O le tautotogo lena, sa amata ai ona lagona e Laura atonu e tatau ona ma siitia atu i Brooklyn. Sa lei mauintino tele e Wil. Ma te lei iloa ma se mea e uiga ia Brooklyn, ma sa manao Wil ia latalata i lana galuega o le faaunetupe i le faletupe, ona o le uumi o ona itula faigaluega, ma sa le umi le alu i ai. Sa tonu ma te tatalo e uiga i ai ma faalogologo mo se tali i le taimi o le konafesi aoao.

Ao ma matamata i lauga i luga o le komepiuta feaveai i totonu o le ma tamai falemautotogi, sa faasoa mai e Elder Stanley G. Ellis o le Fitugafulu sona aafiaga na i ai aoavea ma se tasi o le au peresitene o se siteki. Fai mai o ia, o aiga e siitia atu i totonu o lana siteki i Texas, ISA, e masani ona fesili po o le fea le uarota e sili ona lelei. E na o le faatasi lava i le 16 tausaga sa i ai se aiga sa fesili

po o le fea le uarota sa manaomia le fesoasoani.¹

Sa ma ootia lava i lana tala. Sa taliina ai a ma tatalo. O lea la, nai lo o le nonofo ai i se uarota sa ma fiafia i ai, sa ma lagonaina ai le lagolelei, ma sa i ai se vasega pepe ma se Peraimeri maoae, sa ma talia ai le fautuaga a Elder Ellis ma tatalo po o fea e tatau ona ma siitia i ai.

I le taimi lea, sa ma auuna atu o ni tagata faigaluega i sauniga o le Malumalu a Manhattan Niu Ioka. O se tasi o tagata faigaluega iina na te iloa lelei le Aai o Niu Ioka. Sa ia fautuaina mai ni uarota se lua sa manatu o ia e mafai ona ma fesoasoani i ai—*e i ai uma i Brooklyn*.

O le uarota muamua sa mamao tele mai le galuega a Wil. O le uarota lona lua sa latalata mai, ma sa ma lagonaina ua ma maua le nofoaga sao ina ua ma asiasi atu i le sauniga faamanatuga a le uarota. O le toatele o le au paia o tagata fai mai mai Haiti. Ona o Wil e sau mai Gabon ma e tautala Faafarani, sa ma manatu ai o le a avefa le uarota ma se aiga maoae mo i ma'ua.

O Aafiaga Mataina

I ni nai vaiaso mulimuli ane, sa maua ai se ma falemautotogi ma siitia

atu i ai. Sa lei leva ae valaauina Wil e auuna atu i ni auala anoa eseese. O le malamalama i le gagana sa tau umi teisi, ae sa ia lagonaina le faamanuina i le vave ona lava lona malamalama i le faaHaiti Creole, e fesoasoani ai e faaliliuupu mo le au paia i le taimi o sauniga ma faatalanoaga. Sa faamanuina foi Laura e auuna i ni vaega eseese, ma sa ma aafia i le galuega faafaifeautalai.

O se tasi o a ma uo na maua o se tagata sailiili talavou e igoa ia Normil Romelus, o le sa sau mai Haiti mo aoaoga. E asiasi mai o ia faatasi ma faifeautalai i le ma fale, ma ma te fesoasoani e aoao o ia i le faaFarani ma le faaCreole. Ina ua uma ona papatiso ia Normil, sa ma lagolagoina o ia i le polokalama a le Ekalesia o le Pathway, lea sa ia feiloai ai i lona toalua i le lumanai. Sa lagona e Wil le faafetai i le auai ai i le la faaipoipoga i le Malumalu o Manhattan.

Sa ma feiloai foi i se tuafafine faamaoni o le sa sau mai Niu Ioka mai Haiti ina ia togafitia i le kanesa. I le taimi sa nofo ai o ia iina, sa faia ai e le aufono a le uarota mea uma na mafaia e fesoasoani ai ia te ia ia mauintino na maua mea sa ia manaomia, e

aofia ai le feaveaiga i le alu ma le sau mai ana togafitiga. Sa faamanuiaina i maua e auauna ma asiasi atu ia te ia i lea taimi. Sa matou faamoemoe mo se iuga lelei atu, peitai na maliu o ia.

O na aafiaga e lua ua faatusa ai mea sa faia e le uarota mo tagata— fesoasoani ma sii ae i latou. Ma te faafetai mo nei aafiaga ma isi aafiaga matagofie.

O Mea e Sili ona Taua

Sa ma aoaoina, a tatou auauna atu i le Alii ma Ana fanau, Na te tausia i tatou. O o ma aafiaga i Brooklyn sa fesoasoani ma te faatumauina ai mea i le tulaga e tatau ai. Sa faapitoa ona latou fesoasoani ia Wil ia le popole ai i tulaga tautaua o le faigaluega ai i le Wall Street ae manatua mea e sili atu ona taua. I le faletupe o faaunegatupe, e toetoe o tagata uma e faigaluega i Aso Sa. Sa masani ona fai e Wil mai le fale ia galuega sa tatau ona fai, ae ua faamanuiaina i maua e le Alii ina ia le toe alu atu i le ofisa i Aso Sa.

Ina ua ma siitia atu i Brooklyn, sa ma manatu o le a nao i maua le isi aiga e toalua i aiga e i ai tamaiti laiti i le uarota. Ae sa suia tuaoi o le uarota i le lua o vaiaso talu ona ma siitia i



ai, ma sa siitia mai ai foi nisi o aiga talavou.

Mulimuli ane, ua ma fuafua e siitia atu i Gabon. Ma te lagona o o ma aafiaga i Brooklyn ua fesoasoani e saunia ai i maua ia auauna lelei atu i le Ekalesia ma tagata o Aferika. Ma te faafetai ona sa ma mulimuli i le

uunaiga e siitia atu. Ua faamanuiaina i maua e le Alii—ma faaauau pea ona faamanuia i maua—i auala semanu e le mafai ona ma iloaina. ■

E alala le tusitala i Massachusetts, ISA.

FAAMATALAGA

1. Tagai Stanley G. Ellis, “O le Ala a le Alii,” *Liahona*, Me 2013, 36–38.

TUUINA ATU O FAAMANUIAGA O LE PERISITUA

E alofa le Atua i Ana fanau uma ma ua saunia se ala mo i tatou taitoatasi e toe foi atu ai ia te Ia.

Faamatalaga a le tusitala: E seasea ona i ai se mea e tupu e taua tele e manatua ai e tagata uma le mea sa latou i ai i le taimi sa latou faalogo e uiga i ai. O le faaaliga o le 1978 e uiga i le perisitua e i ai lena ituaiga aafiaga i se augatupulaga atoa o le Au Paia. E le mafai i le avanoa ua tuuina mai ona lelei le suesueina o le talafaasolopito o le faaaliga po o ona faatosinaga loloto i le aiga o le Atua, ae i le faamanatuina o le atoaga o le 40 tausaga o le faaaliga, ua ofoina mai ai e le Liahona nei faaputuga pupuu o tusiga faaletagata lava ia o loo sosoo ma le folasaga puupuu o loo i lalo. Mo nisi faamatalaga auiliili, tagai i le lisi o punaoa faaopoopo i le itulau e 21.

“**O** loo aoao mai le Tusi a Mamona, “ua tutusa tagata uma i le Atua,” e aofia ai le “uliuli pe pa’epa’e, e pologa pe saoloto, o tane ma fafine” (2 Nifae 26:33). Ona e alofa le Atua ia i tatou uma, ua Ia saunia ai le ala mo i tatou taitoatasi ia toe foi atu ai ia te Ia (tagai Mose 5:9; Mataupu Faavae o le Faatuatuaga 1:3). I le faagasologa o le talafaasolopito o le Ekalesia, ua papatisoina tagata o soo se ituaiga ma aganuu mo lena faamoemoega ma ua soifua o ni Au Paia faamaoni o Aso e Gata Ai.

O loo tutu le Au Perisitene Sili i le taimi o le konafesi aoao ia Oketopa 1978, ina ua taliaina autasi e tagata o le ekalsia le Folafolaga Aloaia 2. O le faaaliga e faatatau i le perisitua ua faamanuiaina ai aiga ma tatalaina le faitotoa i faamanuiaga o le malumalu. Taumatau mamao: Savavali se aiga i le lotoa o le Malumalu o Accra Kana, o se tasi o malumalu e valu na faasilasila mai, o loo fausiaina, po o loo faagaoioia i Aferika.



ATA PUE O LE AU PERISITENE SILI I LE 1978 FAALALOGA A LE POTUTUSI O TALAFASOLOPITO O LE EKALIESIA



Mai le ogatotonu o le vaitau o le 1800, e lei faauuina e le Ekalesia ia alii e tupuga mai i tagata Aferika uli i le perisitua pe faatagaina alii po o tamaitai uli ia maua faa-eega paia o le malumalu po o sauniga faamau.¹ E lei ni faamaumauga o i ai o faamatalaina ai le amataga o lenei tulaga, ma o Elder Jeffrey R. Holland o le Korama a Aposetolo e Toasefululua na faamamafaina mai faapea o soo se manatu ua tuuina mai i se taumafaiga e faamatala ai le tapu o “tala tuugutu mai” lea e le tatau ona faaauuina: “Ae po o le a lava le lelei o le faamoemoega o faamatalaga, ou te manatu e toetoe lava o na faamatalaga uma e le atoatoa ma/pe sese. . . . Tatou te le iloa lava pe aisea na faatulagaina ai lena faiga.”²

O le toatele o perofeta ma Peresitene o le Ekalesia, e aofia ai Polika Iaga, na folafola mai o le a oo mai le aso o le maua ai e alii uma o e agavaa le perisitua. O le iloina o nei folafolaga ma le molimauina o le faamaoni o le Au Paia uli o Aso e Gata Ai, na “loa ona talosagaina atu ai ma le faatauana” e taitai o le Ekalesia i le seneturi ogatotonu o le 20 “le Alii mo se taitaiga faalelagi.”³

Faaaliga mai le Atua

O lena taitaiga na oo mai ia Peresitene Spencer W. Kimball (1895-1985) “i le mavae ai o le mafaufau loloto ma le tatalo i potu paia o le malumalu paia.” O le aso 1 o Iuni, 1978, na faaali mai ai e le Alii i Ana perofeta ma uso o le Au Peresitene Sili ma le Korama a Aposetolo e Toasefululua e faapea “ua oo mai le aso ua leva ona folafolaina e maua ai e alii faamaoni uma

Aoao atu se alii talavou i le taimi o se sauniga a le korama i Pale, Farani, lea e tele uarota e i ai tagata mai atunuu eseese i le salafa o le lalolagi.

ma agavaa o i le Ekalesia le perisitua paia, faatasi ai ma le mana e faaaoaga ai lana pule paia, ma olioli faatasi ai ma e pele ia te ia i faamanuiaga uma e tafe mai ai, e aofia ai faamanuiaga o le malumalu.”⁴

I le faasilasilaina atu o le faaaliga, na ta’ua ai e le Au Peresitene Sili, “Matou te folafola atu ma le faamaoni ua faailoa mai nei e le Alii lona finagalo mo le faamanuiaina o ana fanau uma i le lalolagi atoa.”⁵

I le taimi o le konafesi aoao na sosoo ai, sa tuuina atu ai e le Au Peresitene Sili le faaaliga i tagata o le Ekalesia, ia na taliaina e avea o se “afioga ma le finagalo o le Alii” ma na lagolagoina autasi i le Folafolaga Aloaia 2 e avea o se veaga o tusitusiga paia.

O Le Taunuuga o le Faaaliga

Na loloto le aafiaga o le faaaliga. E le gata ina tuuina atu e le Atua faamanuiaga o le perisitua ma le malumalu i tagata agavaa uma e tusa lava po o le a le ituaiga, ae ua mafai foi ona faataunuuna sauniga o le malumalu mo tagata uma o e ua soifua mai.

O le faaaliga na oo mai ai avanoa e faalauteleina ai le galuega faafaifeautalai, ma ua faamanuiaina ai tagata o le ekalesia i le tele o atunuu, aiga, gagana, ma tagata.



Aoaoga a le Ekalesia

A o faaauau pea ona salalau atu le galuega a le Alii i le lalolagi atoa, ua olioli tagata o le Ekalesia i se taimi o le faateleina o le lotogatasi. A o faateleina le fegalegaleai o tagata o le Ekalesia ma isi mai le tele o ituaiga tagata ma aganuu, ua faamamafa mai e taitai o le Ekalesia le taua o le alofa ma le faamalosi'au atu i le tasi ma le isi ma ia faaitiitia le faaituau ma le faailogalanu o soo se ituaiga.

“E tatau ona tatou taliaina ma le agaalofa fanau a le Atua ma faaitiitia soo se faaituau, e aofia ai le faailogalanu, faailoga tagata, ma le manatu faapito,” na aoao mai e Peresitene M. Russell Ballard, Sui Peresitene o le Korama a Aposetolo e Toasefululua. Ia faapea ona tau atu ua tatou talitonu moni o faamanuiaga o le talalelei toefuataiina a Iesu Keriso e mo fanau uma a le Atua.”⁶ O le talanoa ai e uiga i le aiga e faavavau a le Atua, na aoao mai ai Peresitene Russell M. Nelson: Na o le malamalama i le moni o le Tulaga Faatama o le Atua e mafai ona auamai ai se lagona talisapaia atoatoa o le usoga moni o le tagata. O lena malamalama e uunaia ai le manao e fausia alalaupapa o le galulue faatasi nai lo pa pupuni o le feeseeseaiga.”⁷

Agai Faatasi i Luma

E ui tatou te le iloa mea uma, e i ai ni nai mea e mafai e i tatou taitoatasi ona iloa. E mafai ona tatou iloa e alofa le Atua ia i tatou ma e i ai se fuafuaga mo i tatou uma ia avea o se aiga lotogatasi ma faavavau. E mafai ona tatou iloa o le Ekalesia toefuataiina lena i le Alii ma e Na te taitaiina e ala

i Ana perofeta. O le i ai o se molimau patino o nei upu-moni e mafai ona fesoasoani a o tatou agai faatasi atu i luma e ala i avanoa ma luitau o feagai ma i tatou i le ala o le avea faapei o Ia (tagai Moronae 7:48). ■

FAAMATALAGA

1. Faamatalaga “Race and the Priesthood,” Autu o le Talalelei, topics.lds.org.
2. I le “The Mormons” (faatalanoaga ma Jeffrey R. Holland, Mat. 4, 2006), pbs.org/mormons/interviews; tagai foi Dallin H. Oaks, i le “Apostles Talk about Reasons for Lifting Ban,” *Daily Herald*, Iuni 5, 1988, 21.
3. Folafolaga Aloaia 2.
4. Folafolaga Aloaia 2.
5. Folafolaga Aloaia 2.
6. M. Russell Ballard, “E Faaauau Pea Le Savaliga! *Ensign* po o le *Liahona*, Nov. 2017, 106.
7. Russell M. Nelson, “Teach Us Tolerance and Love,” *Ensign*, May 1994, 70.



FAAALIGA MO O TATOU TAIMI

Manatuaga mai perofeta ma aposetolo e uiga i le faaaliga o le 1978.

Faamatalaga a le tusitala: O Peresitene Thomas S. Monson o le Aposetolo soifua mulimuli lea sa i ai i le potu lea na faaaliga ai e le Atua i le Au Peresitene Sili ma le Korama a Aposetolo e Toasefululua ua oo i le taimi e tuuina atu ai faamanuiaga o le perisitua i tagata agavaa uma o le ekalesia e tusa lava po o le a lava le ituaiga. O nisi nei o faamatalaga pupuu mai le Usoga e toafa lea na i ai iina i lena aso.

O Le Sailiga



Peresitene Spencer W. Kimball (1895–1985)
Peresitene lona 12 o le Ekalesia

“Mai lea aso i lea aso sa ou alu ai toatasi i le faamaoni, ma le naunautai tele i le potu i luga o le malumalu, o iina sa ou tuuina atu ai lo’u agaga ma tuuina atu au taumafaiga e faaalualu ai i luma le

polokalama. Sa ou manao e fai le mea sa finagalo i ai [le Atua]. . . .

Sa matou maua se aafiaga mamalu o le faailoa manino mai lea e le Alii e faapea, ua oo mai le taimi e mafai ai ona avea ai alii ma tamaitai faamaoni uma i soo se mea, ma sulu faatasi ma tofusua i faamanuiaga uma o le talalelei. Ou te manao ia outou silafia, i le avea ai ma se moli-mau faapitoa o le Faaola, lou lagonaina o le latalata atu ia te Ia ma lo tatou Tama Faalelagi, a o ou faia ni asiasiga se tele i le afeafe aupitoaluga o le malumalu, a o ou alu atu na o au i nisi o aso. Sa matua faamanino mai e le Alii ia te au le mea sa tataua ona fai.”

Aoaoga a Peresitene o le Ekalesia: Spencer W. Kimball (2006), 264, 265.

O Le Tatalo



Peresitene Thomas S. Monson (1927–2018)
Peresitene lona 16 o le Ekalesia

“I le faaiuga o le sauniga ma le Au Peresitene Sili ma le Korama a Aposetolo e Toasefululua, sa faia se matou tatalo faapitoa i le fata faitaulaga [i le malumalu] lea na fofogaina e Peresitene Kimball. Sa

ia aioi atu i le Alii mo le malamalama ma le poto e uiga i lenei mataupu lea e i ai ona taunuuga taua. O se puna o le faamafanafanaga tele i le Usoga le faalogo atu i lana aioiga lotomauualalo a o ia sailia le taitaiga i lona valaauga mauualuga. . . .

“Sa faaaliga mulimuli ane e le Au Peresitene Sili le lotofaafetai faapea ‘o le agaga o le filemu ma le lotogatasi lea na i ai i le sauniga . . . o se tulaga aupito mauualuga lea ua i ai nai lo se isi lava taimi, ma o se faamaoniga [sa] fiafia le Alii i la tatou talanoaga.’ . . .

“. . . O se taimi o le olioli, ona ua tatou faalogo i le perofeta a le Alii o folafola mai le faaaliga mo lenei taimi.”

I le Heidi S. Swinton, To the Rescue: The Biography of Thomas S. Monson (2010), 393.



O tiakono i Manaus, Pasila, o tufaina le faamanatuga. Ona o le faaaliga o le 1978, ua mafai ai nei e i latou o e umia le perisitua o soo se ituaiga ona faatautaia sauniga o le perisitua.

O Le Faaaliga



Elder Bruce R. McConkie (1915–85)

O le Korama a Aposetolo e Toasefululua

“Na liligi mai e le Alii i lona atamai le Agaga Paia i luga o le Au Peresitene Sili ma le Toasefululua. . . Na oo mai le faaaliga i le peresitene o le Ekalesia; na oo mai foi i tagata taitoatasi na auai. E

toasefulu tagata o le Aufono a le Toasefululua ma le toa-tolu o le Au Peresitene Sili na faapotopoto ai iina. O le taunuuga na silafia e Peresitene Kimball, ma sa iloa foi e i matou taitoatasi, tutoatasi mai soo se isi lava tagata, e ala mai i se faaaliga tuusao ma patino ia i matou, faapea ua oo mai le taimi e tuuina atu ai le talalelei ma ona faamanuiaga uma ma ona tiute uma, e aofia ai le perisitua ma faamanuiaga o le maota o le Alii, ia i latou o soo se atunuu, aganuu, ma ituaiga, e aofia ai tagata uli. Sa leai se fesili e uiga i le mea na tupu pe e faatatau i le upu ma le savali lea na oo mai.”

“All Are Alike unto God” (faigalotu a le Lunivesite a Polika laga, Aok. 18, 1978), 4, speeches.byu.edu.

O Le Faamautinoaga



Peresitene Gordon B. Hinckley (1910–2008)

Peresitene lona 15 o le Ekalesia

“Sa i ai se siosiomaga faapaiaina ma le faamamaluina i le potu. Mo au, o se lagona e pei o se faitotoa vaapiapi ua matala i le va o le nofoalii faalelagi ma le perofeta a le Atua o loo tootuli, ma

augani atu lea na faatasi atu i ai ona Uso. Na i ai iina le Agaga o le Atua. Ma i le mana o le Agaga Paia na oo mai i lena perofeta se faamautinoaga o le mea na matou tatolo ai ua sao, ma ua oo mai le taimi, ma o faamanuiaga ofo-fogia o le perisitua ua tatau nei ona faasafuaina atu i alii agavaa uma i soo se mea e tusa lava po o le a le tupuaga.

“O alii uma i lena li’o, e ala i le mana o le Agaga Paia, sa iloaina lea lava mea e tasi. . .

“. . . E leai se tasi o i matou sa i ai i lena taimi, sa tumau ai ni lagona tuai ina ua mavae lena aafiaga. E lei toe tutusa foi le Ekalesia.”

“Priesthood Restoration,” *Ensign*, Oct. 1988, 70.

Faafogaga a’o toe ta’ua e Peresitene Kimball ma Peresitene Hinckley o laua aafiaga i lenei faaaliga i le lds.org/go/061816.



Saunia e Elder
Edward Dube
O Le Fitugafulu

FAAMANUIAINA I SOO SE AUALA E MAFAI AI

E maeu le faamanuiaina o a'u, o lo'u aiga, ma le Ekalesia i Aferika i le faaaliga.

Faamatalaga a le Faatonu: E ui lava ina aveesea e le faaaliga o le 1978 ia tapu po o ai e mafai ona umia le perisitua, ae toatele lava tagata o le ekalesia na saili atu e fia malamalama e uiga i le mafuaaga na faatagaina ai e le Atua na tapu i le taimi muamua. O i, o loo faasoa mai ai e Elder Dube lona aafiaga patino i le fesili.

O le taimi muamua na ou faalogo ai e uiga i le tapu o tagata uli ona umiaina le perisitua, [o le taimi] sa ou i ai i la'u misiona. Sa ou papatiso i le 1984, i le mavae lena ona faamutaina o le tapu. I le lua tausaga mulimuli ane sa valaauina au e auuuna atu i le Misiona a Aferika i Saute Johannesburg.

A o tofia ai i Bulawayo, Zumbabwe, sa ma asia ai ma la'u soa, o Elder Francis Jack se tuafafine sa le toaga i le lotu. O lana tane o se polofesa faalelotu mai se isi ekalesia. Sa ia fesili mai ia i maua pe aisea na taofia ai le perisitua mai alii e tupuga mai i tagata uli Aferika. Sa ia faia maia le tele o tala na faasoesa ia te a'u—o mea sa ou lei faalogo muamua ai lava. Ina ua ou savali ese mai lena potu, sa ou lagona le faanoanoa tele ma le lotovai-vai tele.



Sa ma tietie atu ma Elder Jack i a ma uila vilivae i le ma fale e aunoa ma se tala. Ina ua ma taunuu iina, sa ia tepa mai ia te a'u ma fai mai, "Elder Dube, o le a le mea ua tupu ia te oe? Ua foliga mai matua e popole lava."

"E te lei lagona mea na ia fai mai ai?" Sa ou tali atu. "Na faapefea ona tupu lenei mea?"

"Elder, e te talitonu na faaali mai le Tama Faalelagi ma Iesu Keriso i le taulealea o Iosefa Samita?"

"Toe," na ou fai atu ai. "Ae o le a le sootaga o lena mea ma lenei mea?"

"E faatatau i ai mea uma lava," Sa tali mai ai Elder Jack. "Tatou te talitonu i faaaliga, a ea?"

Sa ou mafaufau i ana upu ma mea na fai mai ai le polo-fesa. O lena po sa ou ala a'e ai i le vaeluapo. Sa ou lagona ina le fiafia ma le filemu.

O le tali i fesili uma o le talalelei e noatia i mea na tutupu i le 1820. I le iloaina ai na faaali mai le Tama Faalelagi ma Iesu Keriso ia Iosefa Samita, o lona uiga o ia o se perofeta ma o le Ekalesia lenei a le Alii. Afai sa faaali mai le Tama Faalelagi ma Iesu Keriso i le taulealea o Iosefa, o lona uiga la ua taoto tonu uma ia mataupu faavae ma fesili o le talalelei. O se ekalesia lenei o faaaliga, ma e faaali mai e le Alii ia faagasologa patino i taimi patino i Ana auauna, o perofeta, ma o le mea lena na te aumaia le filemu ia te a'u.

Sa amata ona ou tuupuna i luga ma lalo ma fafagu i luga la'u soa ma alaga atu, "Toe, ioe! E sa'o oe Elder Jack! Sa faaali mai le Tama Faalelagi ma Iesu Keriso i le taulealea o Iosefa Samita! O le Ekalesia lenei a le Alii!"

O le aveesea o lenei tapu ua avea ma se faamanuiaga i tagata o le ekalesia i Aferika atoa. Ua faamanuiaina a'u ma

Ua auai le autalavou i le malumalu i Preston, Egelani. Ina ua mavae le faaaliga o le 1978, sa avanoa ai loa sauniga o le malumalu i tagata uma ua soifua i le lalolagi.

lo'u aiga e le perisitua i auala uma e mafai ai. Ua avea ma se malosiaga tele ia te a'u le mauaina o faamanuiaga o le malumalu, o le faamanuiaga o le iloaina o le a tatou ola faatasi o ni aiga mo le faavavau.

O le mauaina o le perisitua ua faamanuiaina ai Aferika. O loo fiafia ma lelei tagata iinei, ae ua faaopopo atu i ai ma le talalelei. E taua tele aiga i Aferika. O le malumalu la ua tagai i ai o se faamanuiaga maoae. O loo vave tele le tuputupu ae o le Ekalesia iinei.

E faalogo tagata iinei i le finagalo o le Atua ma e matou te o ma fai. Ua faamanuiaina e lenei mea tagata o le ekalesia. I se taimi i nisi eria i Aferika sa oo ai i le 90 pasene tagata le faigaluega, ae sa foliga mai na lelei pea o tatou tagata o le ekalesia ona sa ola-tutoatasi i latou. Na faamanuiaina i matou e le perisitua ma le taitaiga mai taitai perisitua.

Ou te faafetai i le Tama Faalelagi ma Iesu Keriso mo le avanoa e umia ai le perisitua, mo le faamanuiaga ua i ai i lo'u olaga, ma le auala ua ia faamanuiaina ai tagata o le ekalesia i le konetineti atoa o Aferika. ■

Sa fanau mai Elder Edward Dube i Zimbabwe, ma o i laua ma lona faletua, o Naume, e toafa le la fanau.



O LE FAAMAMALUINA O LE PERISITUA I SE TULAGA MAUALUGA

Saunia e Charlotte Acquah

O le auala na faamanuiaina ai a'u ma lo'u aiga e le faaaliga o le 1978.

Faamatalaga a le tusitala: O aafiaga o le faaaliga na oo i talaatu o le ofoina atu o le faauuina o le perisitua i alii agavaa o ituaiga uma. Na tuuina atu ai faamanuiaga uma o le perisitua i tagata uma, na aofia ai avanoa ma matafaioi o sauniga ma feagaiga o le mahumalu. O Charlotte Acquah, o se tagata muamua o le Ekalesia i Kana, na talanoa i auala na faamanuiaina ai e le faaaliga lona aiga atoa, e aofia ai le molimauiina o le faatulagaina aloaia o le Ekalesia i Aferika, o le i ai o se tagata e umiaina le perisitua i lona aiga, ma faamauina o se aiga i le mahumalu.




Sa ou faalogo muamua e uiga i le Ekalesia ina ua auai atu lo'u tina i le vaega a Brother Joseph W. B. Johnson i le 1968.¹ Pe a ma le 10 o o'u tausaga i lona taimi. Sa oo i se tulaga faaletonu le pisinisi a si o'u tamā ona o le coup d'état [vevesi] i le 1966, ma sa oo le aiga i se taimi faigata. O lea sa manatu ai lo'u tina o se tulaga atamai le sailia o se fesoasoani faaleagaga.

A o lei faia le faaaliga o le 1978, sa lei aloaia le Ekalesia ona sa lei tuuina atu i lona taimi le perisitua i tagata uli. Ina ua mavae le faaaliga, sa mafai ona faatuina le Ekalesia i le pule o le perisitua. Sa ou papatiso i le aso 24 o Fepuari 1979.²

E lua tausaga na faaalaina e lo'u toalua e suesue ai—ma ni nai finauga—ina ia auai ai i le Ekalesia. Na iu lava ina ia papatiso i le 1980, ona ia mauaina lea o le perisitua. Sa amata ona avea o ia ma se tagata to'a, o lea sa le talitonu ai tagata o lona lava aiga i le ala ua ia suia ai. Sa ia faaeteete i le perisitua lea na ia umia ma

faamautinoaina foi o loo ia faia pea e le aunoa le mea sa'o i luma o le Alii. A aunoa ma le perisitua, semanu na te saili i mamalu ma viiga a tagata. Ae o le perisitua, na ia iloa ai o le mea sili ona taua o lau faaiipoipoga, lou fale, lou aiga, ma le auuina atu i isi.

I lo matou vaega o le lalolagi, afai o oe o se tamā, o le mea e te fai mai ai o le mea lena e i ai. Peitai matou te le faaaogaina le perisitua i lona auala. Matou te saofafai faatasi i se fonotaga faaleaiga. E fesoasoani tamā ia latou ava ma fanau ia malamalama o le mea o loo ia aoao atu e sa'o.



O alii o avea ma tagata o le Ekalesia e auauna atu ia latou ava nai lo le auauna mai o a latou ava ia i latou. E aumaia ia i latou e lena mea le alofa ma le filemu o le tasi i le isi.

O le taimi muamua na ou vaai ai ia te ia o faamanu-iaina le faamanatuga o le taimi “o le taofiga [the freeze]” ona sa faia a matou faamanatuga i lo matou lava fale.³ Sa matua maoae o matou lagona ina ua ia umia le perisitua i lena taimi. E leai se tasi e sau i le fale e faamanu-ia le faamanatuga mo i matou; na fai e ia. Na faapitua ma sa matou fiafia i ai.

O le taimi muamua sa ou faitau ai i nisi o tusi e faatatau i le le faatagaina o tagata uli e umia le perisitua i le taimi o le taofiga, ina ua amata ona faasolo le aumaia o tusi e tetee ai i Mamona i nofoaga faitele. Ou te lei popole tele i ai aua sa ou iloa e moni le Ekalesia. Ua aoaoina i tatou e aua le faalagolago atu i soo se tasi ae ia faaogatonu o tatou olaga ia Iesu Keriso ma Lana taulaga togiola. O le mea lena o loo faaogatonuina i ai lo'u faatuatua.

I le aso 17 o Tesema, 1996, sa mafai ona matou o i le Malumalu o Johannesburg Aferika i Saute. Sa ou lagona le fiafia, aemaise lava ina ua ou faalogo o le a faamauina ia i maua le ma tamaitiiti muamua, o se pepe tama lea na oti i le mavae ai o ni nai aso na ola ai. Sa ou manatu ua oti ma aluese atu o ia, e ui lava sa ou iloa e mama o ia. Ae mo ia ina ia faamauina ia i maua o se aafiaga faaleagaga lea e le galo ia te a'u.

A fesili mai la tagata pe toafia le ma fanau, ou te tau atu ia i latou e toa valu le ma fanau. Latou te fesili mai, “E faapefea?” Ou te fai atu i ai, “Ioe, o le muamua o loo faatalitali mai mo i matou, ma e faalagolago lea i lo matou tausiga o poloaiga a le Atua ma ola ai ina ia mafai ona matou toe foi atu ma avea faatasi o se aiga.”

O le perisitua o le mana a le Atua. Ua tele naua o'u faamanuiaga mai le perisitua. Ou te lagonaina pea le fiafia ma le faagaetia pe a talosagaina e le fanau se faamanuiaga faaleperisitua mai lo latou tamā. Ona ou iloa lea ua latou faatuatuaina o ia ma ua latou faatuatuaina le galue o le Tama Faalelagi e ala atu i lo latou tamā, lea e umiaina le perisitua. Tatou te faamamaluina le perisitua i se tulaga maualuga i totonu o tatou aiga. I le taimi nei e toatolu le ma fanau tama ua faaipoipo, ma o loo latou faaaogaina le perisitua i o latou aiga.

Ou te iloa e moni le perisitua aua o le mana lea a le Atua, ma o se mana ola ona o loo soifua le Tama

Faalelagi. Ua Ia tuuina mai se vaega o lena mana i Ana fanau tama i le fogaeleele. Ua ia i tatou o tamaitai se vaega i le perisitua. Ou te faamamalu i ai i se tulaga maualuga. Ua fesoasoani le perisitua i lo matou aiga ma e faaauu pea ona faia o lena mea. ■

E alala le tusitala i le Vaega Tutotonu i Kana.

FAAMATALAGA

1. I le ogatonu o le vaitau o le 1960 i Kana, na mauaina ai e Joseph William Billy ni kopi o le Tusi a Mamona, Mataupu Faavae ma Feagaiga, ma le Penina Tau Tele ma lagonaina le faamalosi e faatu ni faalapotopotoga e le aloaia a le Ekalesia.
2. Ua tofia aloaia faifeautalai i Kana mo le uluai taimi ia Novema 1978.
3. O le aso 14 o Novema, 1989, na tutuliese ai e le malo o Kana ia faifeautalai ma faasaina le Ekalesia ae na faatagaina tagata e faia sauniga i o latou fale. Sefuluvalu masina mulimuli ane na faaalai ai e le malo le faamalosiina faapea o loo aoao atu e le Ekalesia tagata ina ia usiusitai i tulafono a le malo ma uunaia ai le loto gatasi mai le faailogalanu, ma i le aso 1 Tesema, 1990, na faataga ai e Kana gaoiiga a le Ekalesia ia toe amatalia.

ILOAINA O ISI FAAOPOPOGA I LE INITONETI

- Mo se vaaiga e sili atu ona loloto, faitau i le Gospel Topics essay “Race and the Priesthood” i le [topics.lds.org](https://www.lds.org/topics).
- Faitau i aafiaga mamana a nisi o tagata uli o a latou faamatalaga patino na faaalai ai le ala na aafia ai e le faaaliga o le 1978 o latou olaga ma le latou liua.
 - Charlotte ma William Acquah (Kana), Helvécio ma Rudá Martins (Pasila), ma Joseph ma Toe Freeman (ISA) i le “Witnessing the Faithfulness: Folafolaga Aloaia 2” i le [lds.org/go/061820a](https://www.lds.org/go/061820a).
 - George Rickford (Egelani) i le “I Will Take It in Faith” i le [lds.org/go/061820b](https://www.lds.org/go/061820b).
 - Victor Nugent (Iamaika) i le “It Was the Truth!” i le [lds.org/go/061820c](https://www.lds.org/go/061820c).
- Tagai i ata ma ata vitio o uluai faifeautalai i Aferika i Sisifo ua mauaina le fia selau ua uma ona saunia mo le papatisoga i le [lds.org/go/061820f](https://www.lds.org/go/061820f).

O Faatosinaga a se Tama Amiotonu


O le vaavaai atu i tama amiotonu ua pei o ni ou tama ma lou Tama Faalelagi, na ou aoao ai i le mea e tau o le tulaga moni faaletama.

Saunia e Megan Warren

I lou tuputupu ae, sa lei i ai sou tama faalelalolagi i lou olaga e faamasani au i le ituaiga alofa o loo i ai i lou Tama Faalelagi mo au. Nai lo o lena, sa ou matauina isi alii o e na faaalua mai Lona alofa ma sa avea ma faataitaiga o le tulaga moni faaletama. Na aoao mai Peresitene James E. Faust (1920–2007), Fesoasoani Lua i le Au Peresitene Sili, “O le tamalii o le tulaga faaletama ua tuuina mai ai ia i tatou sina vaaiga o uiga auuamama paia o lo tatou Tama oi le Lagi.”¹ E ala mai i faataitaiga o le toatele o i latou ua pei o ni [ou] tama, e aofia ai tagata o aiga lautele, taitai o le Ekalesia, alii amiotonu i tusitusiga paia, e oo lava i faiaoga maelega o aiga, na ou aoao ai e uiga i uiga faaalua o le Tama Faalelagi ma uiga auuamama faatamalii e mafai e tama faalelalolagi ona atinae e faataitai ai ia te Ia. Mulimuli ane, sa mafai ona ou liliuina le lototiga na ou lagonaina mai le leai o se tama faalelalolagi i le olioli i sootaga vavalatala e mafai ona ou atinaeina ma lou Tama Faalelagi.

Tumau ma Lagolagosua

O lo tatou Tama oi le Lagi e le femoumouai. Ua tatou faitau o Ia “ua tutusa lava o ia ananafi, i le aso, ma le faavavau” (Mamona 9:9). Ua ou matauina o tama faalelalolagi tamalii e mulimuli i le faataitaiga a le Tama Faalelagi o le lemaluelue. O se tama tamalii e faamaoni i lana upu i mea uma. E malamalama o ia o le tumau e fesoasoani i ana fanau ia lagona le saogalemu ma le alofaina, ma e i ai o ia i taimi o faalavelave ma le olioli.



ATAPIUE O LE TUSITALA MA LANA TANE MA LE APAFINE NA SAUNIA E JESSE WARREN

E malamalama foi lo tatou Tama Faalelagi i le ituaiga o galuega faigata e manaomia ina ia agavaa ai e mafuta faatasi ma Ia e faavavau. Na te silafia i tatou taitoatasi e ala i le igoa, ma ua Ia faataga i tatou ia oo i luitau ina ia mafai ona faamamaina ai i tatou. O se tama faalelalolagi tamalii na te faatagaina foi lana fanau e tauivi mai lea taimi i lea taimi aua ua ia iloa o luitau e aumaia ai avanoa mo le tuputupu ae.

O lou toalua o se tagata talenia tele i le faatufugaga o le karate. Sa aoaoina o ia e lona tama ma e masani ona tala mai o lona tama sa faafaigataina mea mo ia nai lo isi tagata aoga. O le aoaiga a lona tama na faamallosia ai o ia ma fesoasoani e vave ai lona faasolosolo i luga, E pei o lo tatou Tama Faalelagi, o tama faalelalolagi tamalii e faamallosiau i a latou fanau e fai mea sili latou te mafai ao ofoina atu le malosi, alofa, ma le lagolagosua.

“O Galuega ua aunoa ma se Gataaga”

O le galuega a lo tatou Tama Faalelagi e faavavau ma e aunoa ma se gataaga (tagai Alema 12:25–33). I se auala e talitutusa lava, o le galuega a se tama faalelalolagi tamalii e le gata foi. O tama tamalii e faia i taimi uma galuega lelei ma finafinau mo le amiotonu. Latou te sao ma faamaoni i lo latou usiusitai i poloaiga a le Atua. Latou te faataataiese tausinioga manatu faapito mo le manuia lo latou aiga. I le “O le Aiga: O Se Folafolaga i le Lalolagi,” ua aoao mai ai perofeta soifua e faapea, “I le fuafuaga paia, e tatau ona pulefaamalumalu tamā i o latou aiga i le alofa ma le amiotonu ma o i latou e tuuina atu mea e manaomia o le olaga ma le puipuiga mo o latou aiga.”² O leni mea e le nao le puipuiga faaletino e aofia ai, ae faapena foi i le puipuiga faaleagaga. O tama tamalii e taitai e ala i faataitaiga ma ofo atu le alofa ma fautuaga i a latou fanau. Latou te lapatai atu foi e uiga i mea matautia faaleagaga pe a tatau ai.

O Se Tala i le Faamallosia o le Aiga

I lana tusiga i le *New York Times* “The Stories That Bind Us,” na tuuina mai ai e Bruce Feiler se vaaiga aoao o suesuga e faatatau i le faavaivaia o le aiga. I nei suesuga, na maua ai e tagata tomai faapitoa i mafaufau o tagata, o tamaiti o e faaalua le malolosi na aafia i se tala o se aiga malosi, lea sa fesoasoani latou te lagona ai latou te auai i se mea e tele atu. Fai mai Feiler, “Afa i te manao i se aiga e sili ona fiafia, ia fatufatu, faaleleia, ma toe faamatala le tala o taimi lelei o lou aiga ma lou gafatia ona toe tulai ae mai taimi faigata. O lena faatinoga e tasi e mafai ona faateleina

ai avanoa o le a tutupu manuia ai lou aiga mo le tele o augatupulaga a sau.”³

O se faataitaiga o leni mea e mafai ona vaaia i le Mose 1. Sa faamallosia Mose e ala i lona malamalama i le fuafuaga a le Atua ma lona lava faasinomaga paia. Ina ua faaosoosoina o ia e Satani, sa tali atu Mose ma le malosi: “O ai oe? Aua faauta, o a’u o se atalii o le Atua, i le faatusa o lana Toatasi na Fanau; ma o fea o i ai lou mamalu, e tatau ai ona ou ifo atu ia te oe?” (Mose 1:13). Sa faapea foi ona i ai ia Mose le lototele e poloaiina ai Satani e aluese.

O tama faalelalolagi tamalii e faamallosia a latou fanau e ala i le faamanatu ia i latou e uiga i o latou faasinomaga paia o ni fanau agaga o le Atua. Sa latou fesoasoani e fausia se aiga malosi e ala i a latou faataitaiga lelei ma faamautinoa e aafia ai foi a latou fanau. O leni mea ua tuuina atu ai ia latou fanau se lagona malosi o le faamoemoe ma le talitonu e faamanuiaina ai.

Sailiga mo se Tane Tamalii

Ao ou tafao faamasani, sa ou sailia se soa faavavau o le o le a avea ma se tama tamalii. Talu ai ona sa ou ola ae e aunoa ma lena faataitaiga i lou olaga o se tamaitiiti, sa faigata atu ia te au ona iloa ia uiga faaalua uma e tatau ona i ai i se tama faalelalolagi tamalii. Sa ou le fiafia ona sa lei tuuina mai i lou faamanuiaga faapeteriaka ni taitaiga auiliili e uiga i le tagata na finagalo le Tama Faalelagi ou te faaipoipo i ai. Na pau lava le faamatalaga, e tatau ona ou sailia se tasi o le e mafai ona aveina au i le malumalu. Ae oo foi i leni faatonuga lea sa foliga mai e faigofie, sa luitauina foi. E ui ina sa i ai nisi o ou aafiaga lelei i tafaoga faamasani, sa masani ona ou popole ona a le o le, sa lei i ai se tamalooa faapena po o le, sa tatau lava ona ou tigaina i tofototoga e le muta o le loto.

E ui lava i lou atuatuvaale ona o ou aafiaga, sa faaauau pea ona ou tatalo mo se toalua o le o le a avea ma se tama amiotonu mo lau fanau, o le o le a alofa ia i latou ma i ai pea i o latou olaga. E pei o lou tina faamaoni, sa ou iloina e tusa lava po o le a le mea e tupu, o le a mafai ona ou faalagolago atu i lou Tama e Faavavau mo le lagolagosua.

I lou tei tele ma le fiafia, sa tali mai au tatalo i le taimi tonu lava a le Tama Faalelagi. O se faamalologa ia te au le matauina o faataitaiga agaalofa a lou toalua o le ituaiga tagata e tatau ona i ai se tama. Ou te faafetai i lona mulimuli i faataitaiga na faatulaga e perofeta ma aposetolo ma ua ia filifili e teufatuina ma alofa ia te au ma le le manatu



O se atavali vai na saunia e le tusitala o lana tane ma le afafine. Sa musuia o ia e tulitulimatagau faatufugaga e lona faiaoga o aiga—o se tasi sa avea e pei o se tama i lona olaga.

faapito. O lana faataitaiga o se tane agaalofa ua faamanuiaina ai foi le ma fanau. Ua tumu lou loto i le faafetai mo lona faamaoni i tofotofoga, o lana faataitaiga o le galue malosi, o lona agavaa e faaoga le perisitua, ma le alofa mama ma le lemaluelue o loo ia faaalua o se tama talavou.

O Tama ua siomia ai i Tatou

E lei se tapulaa i faatosinaga a se alii o le e malamalama, e pei o Mose, pe o ai o ia. Na aoao mai Sister Sheri Dew, o le sa avea ma Fesoasoani Lua i le Au Peresitene Aoao o le Aualofa, o tamaitai uma o e [faia le galuega o le] faafaiilele ua faataunuina le matafaioi o le avea ma se tina, e tusa lava pe lei avea i latou ma tina i lea taimi. “*O i tatou uma o tina i Isaraelu,*” sa ia molimau mai ai, “ma o lo tatou valaauga o le, ia alofa ma fesoasoani e taitai le tupulaga faiae e ala atu i auala matautia o le olaga nei.”⁴ O alii o e ua avea o ni faataitaiga amiotonu ua faataunuina le matafaioi o le avea ma tama i Isaraelu, ma o a latou faataitaiga mama e mafai ona oo i tua atu o lo latou lava aiga.

Ina ua mavae luitau o lou laitiiti, ua ou mautinoa ua silafia lelei lava e le Tama Faalelagi le mea na ou manaomia e mafai ai ona ou faatuatua lau soa e faavavau. Sa Ia tuuina le tele o faataitaiga tumau o tulaga faaletama i lo’u

olaga. O i latou nei na aofia ai lou tamamatua amiotonu, o le sa alofa i le Alii, ma se faiaoga maelega o aiga, o le na—malamalama i tapulaa o mea tautupe a lou aiga,—sa ia aveina atu au o se tagata aoga i lana aoga faatufugaga ma musuia ai au e mulimuli i ona tulagavae faapolofesa. I lou olaga o se talavou matua, sa tuuina mai ai foi le faamalologa faalelagi e ala i faamanuiaga e lei mafaufauina o le mauaina o se tama fai amiotonu, o le sa onosai i le faatuai ona ou faatuatua ina o ia o se tagata e avea ma ou tama ma o le sa faaauu pea ona faaali mai le agalelei ia te au.

E ala i faatosinaga amiotonu o i latou nei na avea ma [ou] tama, ua ou maua ai le faamoemoe, faamalologa ma le olioli. Ou te faafetai mo alii uma o e o loo mulimuli i le faataitaiga na faatulaga e lo tatou Tama oi le Lagi ma tau-mafai ia avea ma faataitaiga o ni tama tamalii. ■

E alala le tusitala i Kalefonia, ISA.

FAAMATALAGA

1. James E. Faust, “O E Faasili ia te A’u, Ou Te Faasili ia te i Latou,” *Liahona*, Iulai 2001, 54.
2. “O le Aiga: O se Folafofaga i le Lalolagi,” *Liahona*, Me 2017, 145.
3. Bruce Feiler, “The Stories That Bind Us,” *New York Times*, Mat. 15, 2013, nytimes.com.
4. Sheri L. Dew, “Pe Le o i Tatou Uma Ea o Ni Tina?” *Liahona*, Ian. 2002, 113.



Saunia e Elder
Jeffrey R. Holland

O Le Korama a Aposetolo
e Toasefululua

“TAUAVEINA

o Avega a le Tasi ma le Isi”

Mai se lauga na tuuina atu i tagata faigaluega o le Tautua mo Aiga o le AAG ia Iuni 2017. Sa fetuunai e Elder Holland le lomiga leni mo se aufaafogoga lautele.

Sa tusia e le Aposetolo o Peteru e faapea o soo o Iesu Keriso e ao ona “fealofani” o le tasi ma le isi (1 Peteru 3:8). E toatele outou e faataunuaina lena poloaiga ma le mamalu ma le faamemelo i aso uma o o outou olaga. E moni lava, o le manaomia o le fealofani ua tutusa lava le maoae i aso nei ma e pei ona sa i ai. Fai mai faamatalaga o le taimi nei e faapea, e tusa e tasi mai le lima o tagata matutua i le Iunaite Setete (43.8 miliona tagata) e aafia i gasegase faalemafau-fau i tausaga uma lava.¹ Ua anoanoai tusi ma ata mataga, lea e tasi le uepisaite ua mauaina le silia ma le 23 piliona taimi na matamata ai [tagata] i le 2016 lava ia.² O aiga e i ai matua e toalua ua [matuai] faifio i le Iunaite Setete ae ua faateteleina le tatala o faaipoipoga, . . . nonofo faapouliuli, [pepe e fananau ae lei faaipoipoina matua]. . . . I le aso e le itiiti ifo ma le toafa mai le toasefulu o [pepe] e fananau e tutupu i tamaitai nofofua pe nonofo ma se paaga e lei faaipoipoina.”³

Ina ia taua o tagata o le Faaola ma ia tu i Lana Ekalesia, e tatau ona tatou “loto e tauave avega a le tasi, ina ia māmā; ioe, ma [ia] loto e faanoanoa faatasi ma e e faanoanoa; ioe, ma faamafanafana atu ia te i latou o e e manaomia le faamafanafanaga, ma tutu o ni molimau a le Atua i taimi uma ma i mea uma” (Mosaea 18:8–9).

Ia te au, o le tauaveina o avega o le tasi ma le isi o se faauigaga faigofie ae mamana o le Togiola a Iesu Keriso. Pe a tatou saili e siiae le avega a se isi tagata, o i tatou o ni “faaola i le mauga o Siona” (Opetaiā 1:21). Ua tatou faagatusaina faafaailoga i tatou lava ma le





Atonu e le mafai ona tatou suia le faigamalaga, ae e mafai ona tatou faamautinoaina ia leai se tasi e savalia nao ia. E mautinoa lava o le uiga lena o le tauave o avega a le tasi ma le isi.



FAANATALAGA MAI LE O KERISO MA LE TAGATA SIPI SAJINA E I KIRK RICHARDS

ATAPIE MAI LE GETTY IMAGES



Pe a tatou saili e siiae le avega a se isi tagata, o i tatou o ni “faaola . . . i le mauga o Siona” —ua faagatusa-ina faafaailoga i tatou lava ma le Togiola o le lalolagi ma Lana Togiola.

Faaola o le lalolagi ma Lana Togiola. Ua tatou “fufusi i e lotomomomo, . . . talai le saolotoga i le tafeaga, ma . . . tatalaina . . . [le falepui] i] e ua fusufusia” (Isaia 61:1).

Malamalama Faaleatua

Sei o tatou nonofo i le mataupu lenei o le Togiola a Keriso mo sina taimi. Afai ou te malamalama lelei i le aoaoga faavae, i le aafiaga o le Togiola, lea sa oo i ai Iesu Keriso e fai ma sui—ma tauave le avega o—agasala ma faanoanoaga ma faaifitauli ma loimata o tagata uma, mai ia Atamu ma Eva e oo lava i le iuga o le lalolagi. I lenei mea, sa lei agasala moni o Ia Lava, ae sa Ia lagonaina le tiga ma taunuuga o i latou na agasala. E lei aafia patino o Ia i le malepe o se faaipoipoga, ae sa Ia lagonaina le tiga ma taunuuga o i latou na malepe faaipoipoga. E lei aafia patino o Ia i faiga aiga faamalosi, po o le faaletonu o le mafaufau po o le kanesa po o le maliu o se tamaitiiti, ae sa Ia lagonaina le tiga ma taunuuga o i latou na oo i ai, ma isi mea faapena e ala i le tele o vaega eseese o faigata o le olaga ma loto nutimomoia.

O le vaaiga lena i le auala e galue ai le Togiola ua fautuaina mai ai le faataitaiga paia moni e tasi o le *malamalama* e lei iloa muamua lava e le lalolagi. O le mea moni, e leai se upu e lava ona faamatalaina ai le faatinoga aupito sili ona taua i le atulaulau, ae o le aso, e leai se upu sili ona lelei e sui ai, o lea o le a ou faaogaina ai.

O le *malamalama* ua faauigaina o “le faatinoga o le iloa . . . ma [lou] mauaina o lagona, mafauauga, ma aafiaga o se isi tagata a le o se taimi ua tuanai o le taimi nei.”⁴ E

pei ona uma ona ta’ua, o le mea moni o se faamatalaga lelei lena e uiga i le faagasologa o le togiola, ae maise lava pe afai tatou

te faaopoopoa i ai le “lumanai” i le “taimi ua tuanai” ma le “taimi nei.”

Ua tatou iloa uma lava ua toatele naua fanau a le Atua ua pagatia le leoa ma toatasi. Mo se faataitaiga, o se alii talavou sa tusi mai ia te au e faailoa mai ai lana molimau i se tusi na maoae le faaleoina, ae na faaopoopo mai, ua ta’e lona fatu ona na te le o vaaia se faataunuuga po o se olioli i le lumanai mo ia o se tagata e tosina atu i le itupa tutusa.

“Ou te feagai ma se olaga o po tuuatoatasi ma taeao le manaia. Ou te auai ma le faamoni i lau uarota o le YSA, ma o vaiaso taitasi ou te tuua ai le lotu ma le iloa, e le mafai moni lava ona ou auai atoatoa i le ekalesia. O le a ou le aoaoina lava lo’u atalii e tietie i se uila. O le a ou le lagona le uu e la’u pepe teine o lo’u tamailima ao aoao o ia e savali. O le a ou le maua ni fanau a ni fanau.

“O le a ou sau i le aiga i se fale gaogao, i lea aso ma lea aso, i lea masina ma lea masina, i lea fiasefulu tausaga ma lea fiasefulu tausaga, ae na o lo’u faamoemoe ia Keriso ua taula i ai. O nisi taimi ou te mafaufau ai, pe aisea o le a Ia faia ai lenei mea ia te a’u ma fai mai ia ou faia se osigataulaga faigata faapenei. Ou te tagi i le po pe a leai se isi e iloa mai a’u. Ou te lei tauina i se tagata, e oo lava i o’u matua. O le a teena e i laua faapea ma a’u uo . . . a’u pe afai latou te iloa, e pei ona latou teena i latou o e sa savalia muamua lenei auala. O le a ou ola i se olaga e ese mai i isi tagata. Ua ia te au se filifiliga a le o le sauaina ma le tuulafoaia ona o le nofofua, po o le faanoanoa ona o o’u faaletonu ma le le amanaiaina ona o le tauina o le mafuaaga [o lo’u nofofua]. O le a umi ma [le manaia] le olaga i ou luma atu. E leai ea ni pulu pasama i Kiliata?”⁵

Faatasi ai ma le tele naunau o le tiga ma le faanoanoa, tele naua le leai o se faamoemoe, e tasi le mea e mautinoa lava le tatau ona tatou taumafai e tuuina atu i se tagata faapea,





o le faamautinoaga lea e le o tuua nao ia. E tatau ona tatou matuai naunau e faamamafa atu o loo faatasi le Atua ma ia, o loo faatasi agelu ma ia, ma o loo tatou i ai faatasi ma ia.

Malamalama. E foliga mai e faalelava, ae o se mea lea e amata ai. Atonu e le mafai ona tatou suia le faigamalaga, ae e mafai ona tatou faamautinoaina ia leai se taisi e savalia nao ia. E moni lava, o le uiga lena o le tauave o le avega a le tasi ma le isi—o avega *na*. Ma o ai e iloa le taimi pe mata o le a sii ae i latou i le olaga lenei. Ae e mafai ona tatou savavali faatasi ma tausoa le avega. E mafai ona tatou siiāe o tatou uso ma tuafafine e pei ona sii ae i tatou e Iesu Keriso (tagai Alema 7:11–13).

Ma i lenei mea atoa, e mautinoa lava le tatou maua ai o se loto faafetai fou ma sili atu le susulu mo mea uma e faia e le Faaola mo i tatou. E pei ona ou fai atu i se tasi o taimi:

“I le tauivi ai mo sina filemu ma le malamalama i nei tulaga faigata, e taua tele le manatuaina o loo tatou ola—ma filifili e ola—i se lalolagi pa’ū lea e tusa ai ma faamoemoega paia o le a toe tofotofoina ai ma suesueina ai pea lava pea i tatou i la tatou sailiga o le faaleatua. E tusa ai ma le faamautinoaga silisili i le fuafuaga a le Atua, o lea sa folafola mai ai se Faaola, o se Togiola lea e ala i lo tatou faatuatua ia te Ia, o le a sii ae ai i tatou ma le manumalo i luga a’e o na faosoosoga ma tofotofoga, e ui o le tau mo le faia o lena mea e lemafua-tiaina mo le Tama o lē na auina maia o Ia atoa ma le Alo lea

na afio mai. Ua na o le talisapaia lava o le alofa paia lenei o le a muamua ai ona lavātia o tatou lava puapuaga ia e ititi ifo i lo [ō Laua puapuaga], ona sosoo ai lea ma le malamalama i ai, ma mulimuli ai togiolaina.”⁶

E vave ona tatou aoaoina, o a tatou auunaga sili ona lelei ma le le manatu faapito, e masani ona le lava lea e faamafanafana pe faamalosiaina ai i le auala e manaomia ai e tagata. Po o le, afai e i ai se taimi e faamanuiaina ai i tatou, e masani ona foliga mai e le mafai ona tatou toe faia. E le o i tatou foi o ni toa ma ni mana e puipuia le toe sasi o i latou tatou te alolofa i ai. O le pogai atoa lea e tatau ai ona tatou liliu atoa atu ia Iesu Keriso ma faalagolago ia te Ia (tagai 2 Nifae 9:21).

E tele lava ina le mafai ona tatou fesoasoani—po o le, le mafai foi ona tatou faaauau ona faatumauina la tatou fesoasoani pe le mafai foi ona toe faia pe a tatou faamanuiaina i nisi o taimi. Ae e mafai ona fesoasoani mai Keriso. E mafai ona fesoasoani mai le Atua le Tama. E mafai ona fesoasoani mai le Agaga Paia, ma e tatau ona tatou taumafai pea ia avea ma a Latou avefeau, e fesoasoani atu i taimi ma soo se mea tatou te mafai ai.

Toefaamalosia Oe Lava

Mo outou o e saili ma le naunautai e tauave avega a le tasi ma le isi, e taua ona e toefaamalosia oe lava ma toe



O le auunaga tatou te tuuina atu pe a tatou tauaveina avega a le tasi ma le isi e matuai taua lava—o le mea moni o le galuega lea a le Matai.

faatulaga oe lava pe a ua tele naua mea e faamoemoe mai e isi mai ia te oe, ma faapea ona tele naua ai lou malosi e alu ai. E leai se tagata e malosi naua e faapea ona latou le lagona ai le vaivai po o le le fiafia pe iloa ai le manaomia ona vaai faalelei i latou lava. Sa mautinoa lava le oo o Iesu i lena vaivai, lagona le alu ai o Lona malosi. Sa Ia tuuina atu ma tuuina atu, ae e i ai se tau e pipii atu ai i lena mea, ma sa Ia lagonaina le mamafa o le toatele e faalagolago atu ia te Ia. Ina ua papai atu le fafine sa i ai se faafitauli o le punatoto ia te Ia i le mano o tagata, sa Ia faamaloloina o ia, ae sa Ia matauina foi “ua alu atu le mana na ia te ia” (tagai Mareko 5:25–34).

Sa ou ofo lava ona o le mafai ona Ia tofa ao agi i le Sami o Kalilaia se matagi malosi ma ogaoga lea sa faapea ai Ona au soo o ni faifaiva atamamai, o le a goto le vaa. Oka se maoae o lena lelava? E fia ni lauga e mafai ona e tuuina atu ma ni faamanuiaga e mafai ona e faia e aunoa ma se matuai lelava lava? E tatau foi ona tausi faalelei i latou e tausia isi tagata. E tatau ona lava lou malosi ona faatou mafai lea ona e fesoasoani atu i isi.

Na fai mai i se tasi taimi ia Rosalynn Carter, o le peresitene o le pulega o le Rosalynn Carter Institute for Caregiving, “E na o le fa lava ituaiga tagata i le lalolagi lenei: o i latou o e sa tausia isi tagata, o i latou o loo tausi isi tagata i le taimi lenei, o i latou o le a tausia isi tagata, ma i latou o le a manaomia ni tagata e tausia i latou.”⁷

E manino lava, “o le sootaga i le va o le tagata e tausia isi tagata ma le tagata e mauaina le tausiga, o se sootaga moni lava, o se sootaga paia lava.”⁸ Ae peitai, ao tatou oo i le luitau o le tauaveina o avega a le tasi ma le isi, e mafai ona tatou manatua, e

leai se tasi o i tatou e sao mai le taunuuga o le malamalama i le tiga ma puapuaga o se tagata tatou te tausia.

Saili Ia Paleni

E taua le sailia o auala e faapaleni ai lau matafaioi o le tausia o isi tagata ma isi vaega o lou olaga—e aofia ai le galuega, aiga, mafutaga, ma gaoioiga e te fiafia i ai. I se lauga o le konafesi e uiga i lenei mataupu, sa ou taumafai ai e “tuuina atu se saafiafiga ia te outou uma, ia i latou uma o e o faia mea e tele ma agalelei tele atu ma galulue ma le ‘faamoemoe e faia mea lelei.’ E ese le agalelei o le toatele. Ou te iloa o nisi o outou [atonu e i ai luitau faalelagona pe faaletupe] i o outou lava olaga ma tou te maua lava sina mea e faasoa atu [i isi]. E pei ona lapataia e le Tupu o Peniamina lona nuu, e le o faamoemoe ia tatou taufetuli saosasoa e sili atu nai lo o lo tatou malosi ma e tatau ona faia mea uma ma le auauai lelei (tagai Mosaea 4:27).”⁹ Ae e ui lava i lea, ou te iloa e toatele outou e taufetuli saosasoa tele ma e toetoe lava a uma lo outou malosi ma sapalai faalemafaufau i nisi o taimi.

Afai ua tele tele ia faafitauli, ia manatua ia upu nei mai se tala na tusia e David Batty:

“O le faamoemoe e le o se faalogona—e le o se galu lolo o le olioli i le ogatotonu o se faafitauli.

“. . . O le faamoemoe e le o le laau fai maneta lea e faanimoina le faafitauli. O le faamoemoe o le laina ola lea e taofiofia oe mai le lofituina i afa o lou olaga.

“A tuu atu lou faamoemoe ia Iesu, ua e tuu atu lou talitonuga i Ana folafolaga e faapea, o le a Ia le tuua lava oe pe lafoaia oe—o le a Ia faia le mea sili mo oe. E ui atonu e te i ai i le totonugalemu o se faafitauli ogaoga, o le faamoemoe e mafai ai ona e toafilemu, i le iloa o loo faatasi Iesu ma oe i laasaga uma o le ala.”¹⁰



Ou te fiafia i le auala na taulima ai e Paulo lenei tauiviga ma lagona o le le atoatoa. I tusitusiga paia, na faamalamalama mai ai e le ALii o Lona alofa ua lava lea mo Paulo, ma o le mea moni, o Lona alofa “sa faaatoatoaina i le vaivai.” Sa tusia e Paulo, “O lea ua tele ai lava lou fiafia i le mitamita i mea ua ou vaivai ai, ina ia tumau i ou luga le mana o Keriso” (2 Korinito 12:9).¹¹



Talitonu i le Tama ma le Alo

E tatau ona tatou talitonu o lo tatou Tama Faalelagi ma Iesu Keriso e alolofa moni ia i tatou, ma mea o loo tatou faia, ma La te finagalo ia tatou “faaatoatoaina i le vaivai”—o le mea tonu lava e te manao ai mo i latou o loo e tausia.

Ou te molimau atu o loo silafia e le Atua a tatou avega ma o le a faamalosia i tatou e faamalosia atu i isi. E le faapea ai la o le a nimo ese ai i taimi uma o tatou faaaitaui, pe o le a faafuasei lava ona toafilemu le lalolagi. Ae e le faapea ai foi e oo atu a outou tatalo i ni taliga e logonoa. Ma e faapena foi i talosaga a i latou e te tausia—o fafine ua oti a latou tane, o ulugalii ua tetea, ma e tuua toatasi, o e lofituina, o e i ai vaisu, o e mamai, ma e leai ni faamoemoe—o tagata uma lava.¹²

Uso e ma tuafafine, o le auunaga tatou te tuuina atu pe a tatou tauaveina avega a le tasi ma le isi e matuai taua lava—o le mea moni o le galuega lea a le Matai. O le aofai o tusi na maua i lou ofisa ua faaalua ai le tele o le fesoasoani o loo manaomia. O lena fesoasoani o le manai mai le lagi ia i latou o e tauivi.

Sa ou faapea atu foi i se tasi taimi: “A tatou talanoa e uiga ia i latou o tufugaaao i le Atua, ua faamanatu mai ia te i tatou e le o agelu uma e mai le isi itu o le veli O nisi o i latou tatou te savavali ma talanoa faatasi—iinei, i le taimi nei, ma aso uma lava. O nisi o i latou e nonofo i o tatou pitonuu. O nisi o i latou na fanauina i tatou, ma i lo’u tulaga, o se tasi o i latou na ioe ma te faaipopo. E leai se taimi e

sili ona lalata mai ai le lagi, nai lo le taimi tatou te vaaia ai le alofa o le Atua o faaalua i le agalelei ma le tuuto o tagata e ese le lelei ma matua mama, lea e na o le upu *pei o se agelu* e tau i ai lou mafaufau.”¹³

Ia te au, a outou taumafai e faamama le avega a se isi tagata, o outou o agelu moni o le alofa mutimutivale i lona faauigaga sili ona sa’o. Talosia ia sautuaselau mea tou te toe maua mai i mea uma tou te taumafai e avatu. ■

FAAMATALAGA

1. Tagai “Mental Health by the Numbers,” National Alliance on Mental Illness, nami.org.
2. Tagai “World’s Largest Porn Site Reveals the Most-Searches Porn Genre of 2016,” Fight the New Drug, Jan. 9, 2017, fightthenewdrug.org.
3. “Parenting in America,” Pew Research Center, Dec. 17, 2015, pewsocialtrends.org; see also D’Vera Cohn and Andrea Caumont, “10 Demographic Trends That Are Shaping the U.S. and the World,” Pew Research Center, Mar. 31, 2016, pewsocialtrends.org.
4. *Merriam-Webster’s Collegiate Dictionary*, 11th ed. (2003), “empathy.”
5. Fesoootaiga patino.
6. Jeffrey R. Holland, “Peiseai o se Ipu ua Nutililii,” *Liahona*, Nov. 2013, 40.
7. Tagai rosallyncarter.org/UserFiles/Jensen.pdf; tagai foi Rosalynn Carter, i le Randi Kaplan, “How to Care for the Caregiver,” May 13, 2015, health.usnews.com.
8. Nancy Madsen-Wilkerson, “When One Needs Care, Two Need Help,” *Ensign*, Mar. 2016, 38.
9. Jeffrey R. Holland, “A Handful of Meal and a Little Oil,” *Ensign*, Iulai 1996, 31.
10. David Batty, “Finding Hope in the Midst of Life’s Problems,” livingfree.org.
11. Tagai Anne C. Pingree, “Making Weak Things Become Strong,” *Ensign*, Dec. 2004, 28–30.
12. Tagai Dallin H. Oaks, “Na te Faamaloloina i Latou e Mafatia i Avega,” *Liahona*, Nov. 2006, 6–9.
13. Jeffrey R. Holland, “O le Auunaga a Agelu,” *Liahona*, Nov. 2008, 30.





MATAUPU 4

Ia Mataala

O le mataupu 4 lenei o se faamatalaga fou e fa-voluma o le talafaasolopito o le Ekalesia ua faaautuina Au Paia: O Le Tala o le Ekalesia a Iesu Keriso o le Au Paia o Aso e Gata Ai. O le a maua lenei tusi ua lolomiina, i le vaega o le Talafaasolopito o le Ekalesia o le polokalama o le Gospel Library, ma i le initoneti i le aupaiia.lds.org. O nai isi mataupu e sosoo ai o le a lolomiina i isi lomiga seia oo ina tuuina atu le voluma 1 i se taimi o mulimuli mai o lenei tausaga. O na mataupu o le a maua i gagana e 47 i le polokalama o le Gospel Library ma i le aupaiia.lds.org.

Sa muai faalogo Ema Hale a o luasefulu tasi ona tausaga e uiga ia Iosefa Samita ina ua sau e faigaluega mo Josiah Stowell, i le tautoulu o le 1825. Sa faafaigaluega e Josiah le alii talavou ma lona tama e fesoasoani ia te ia e saili oa natia na tanumia i lona fanua.¹ O talatuu i le lotoifale na ta'ua ai o se vaega o tagata sue-sue na eliina se maina o faaputuga siliva ma nana le oa i le nofoaga lea i le faitau selau o tausaga o mavae. I le iloina ai sa i ai se meaalofa a Iosefa mo le faaogaina o maa vaai, sa ofo atu ai e Josiah ia te ia se totogi lelei ma se vaega oa i mea e maua pe afai na te fesoasoani atu i le sailiga.²

Sa lagolagoina foi e le tama o Ema, o Isaac le sailiga. Ina ua o mai Iosefa ma lona tama i le faatoaga a Stowell i Haramoni, Penisilevania—o se nuu pe a ma le 150 maila i saute o Palamaira—sa avea Isaac ma molimau ina ua la sainia a la konekarate. Sa ia faatagaina foi le aufaigaluega e nonofo i lona fale.³

E lei leva ae feiloai Ema ma Iosefa. Sa laitiiti ifo o ia [Iosefa] nai lo ia [Ema], sa silia ma le ono futu lona umi, ma sa foliga mai e peiseai o se tagata sa masani ma le galue malosi. E lanumoana ona mata ma e pa'epa'e lona lanu, ma sa setu laitiiti pe a savali. E faalelele lana kalama, ma o nisi taimi e tele naua upu sa ia faaogaina e faamatala mai ia lava, ae sa ia faaalua lona atamai pe a tautala. O ia ma lona tama o ni alii lelei o e sa sili ia i la'ua le tapuai a la'ua lava ia nai lo le o i le lotu sa tapuai ai Ema ma lona aiga.⁴

Sa taufai fiafia Iosefa ma Ema i mea e fai i fafo. Talu mai lona laitiiti, sa fiafia Ema e tietie solofanua ma alovaa i le vaiatafale lata ane i lona fale. Sa le o se tagata e lelei le tietie solofanua ia Iosefa, ae sa sili ona lelei i piiga ma taaloga i le polo. Sa faigofie ona mafuta o ia ma isi ma e vave ona ataata, ma e tele taimi e fai ai ana tala ula po o tala malie. O Ema sa tele ina nofonofo lava, ae sa fiafia o ia i se tala malie lelei ma sa mafai ona talanoa i soo se tagata. Sa fiafia foi o ia e faitautusi ma usuusu pese.⁵

A o gasolo pea vaiaso ma faasolo ina iloa lelei e Ema ia Iosefa, sa faatupulaia le popole o ona matua i le la feoaiaga. O Iosefa o se tagata faigaluega mativa mai se isi setete, ma sa la faamoemoe o le a uma le fiafia o lo la'ua afafine ia te ia ma faaiipoipo i se tasi o aiga maumea i lo latou vanu. Sa oo foi ina faaletonu le tama o Ema i le sailiga o le oa ma sa

masalosalo i le matafaioi a Iosefa i lea mea. Sa peiseai e lei afaina ia Isaac Hale le taumafai o Iosefa e faatalitonu Josiah Stowell e faamuta le sailiga ina ua manino mai e leai se mea e maua ai.⁶

Sa sili atu le fiafia o Ema ia Iosefa nai lo se isi alii na ia iloa, ma sa lei manao o ia e taofi le faaalu o lona taimi faatasi ma ia. Ina ua mavae le faamanuiaina o lona taumafai e faatalitonu ia Josiah e faamuta le sailiga o le ario, sa nofo ai pea Iosefa i Haramoni e faigaluega ai i le faatoaga a Josiah. O nisi taimi, sa alu ai foi Iosefa e faigaluega mo Joseph ma Polly Knight, o le isi foi aiga faifaatoaga i lea nofoaga. A le faigaluega o ia, sa ia asiasi atu ia Ema.⁷

Sa oo ina aveia Iosefa ma lana maa vaai ma mataupu o le faitatala i Haramoni. O nisi o tagata matutua i le taulaga

I le 2015 sa toe fauina ai e le Ekalesia le faatusa leni o le fale o Isaako ma Elisapeta Hale i Haramoni, Penisilevania. Sa fetauti Iosefa Samita i le la tama teine o Ema ina ua nofo o ia i le fanua a o faigaluega ai mo Josiah Stowell.





O le fale faaviivi o le au Samita i Manchester, Niu loka, sa toefaaleleia e faaoga ai le uluai fausaga. Ina ua uma le la faaiipoiga i le 1827, sa nonofo ai iina Iosefa ma Ema faatasi ma matua o [Iosefa].

sa talitonu i tagatavaai, ae o le toatele o a latou fanau ma fanau a fanau e lei talitonu i ai. Na fai mai le tei o Josiah, na faaoga e Iosefa le uso o lona tama, ma sa ia molia ai le taulealea i le faamasinoga ma tuua'ia i lona taufaasese.

A o tu ai i luma o le faamasino i le lotoifale, sa faamalalama atu e Iosefa le auala na ia maua ai le maa. Sa molimau atu Iosefa le Matua, sa ia ole atu pea e le aunoa i le Atua e faaali atu ia i latou Lona finagalo mo le meaalofo ofoofogia a Iosefa o se tagatavaai. Mulimuli ane, sa tu ai Iosia i luma o le faamasinoga ma ta'u atu sa lei faavaleaina o ia e Iosefa.

“O o'u malamalama ea,” sa fai atu ai le faamasino, “o loo e talitonu e mafai ona vaai le pagota lea e ala i le fesoasoaniga a le maa?”

Leai, sa tumau pea le tali a Iosia. “Ou te iloa lelei e moni lea mea.”

O Iosia o se tagata faaaloologia i le nuu, ma sa taliaina e tagata lana upu. I le faaiuga, sa lei maua e le faamasinoga se faamaoniga faapea na faavalea e Iosefa o ia, o lea na faaleaogaina ai e le faamasino le moliaga.⁸

Ia Setema 1826, sa toefoi atu ai Iosefa i le mauga mo papatusi, ae sa fai mai Moronae sa lei saunia lava o ia mo [papatusi]. “Alu ese mai le kamupani o tagata eli tupe,” sa fetalai atu ai le agelu ia te ia. Sa i ai tagata leaga faatasi ma i latou.⁹ Na tuu atu e Moronae ia te ia le tausaga e tasi e

faaogatasi ai lona loto ma le finagalo o le Atua. Afai na te le faia, o le a le tuuina atu lava papatusi ia te ia.

Sa fetalai atu i ai le agelu e sau ma aumai se isi tagata i le isi taimi e toe sau ai. O le talosaga lava lea e tasi na ia faia i le faaiuga o le asiasiga muamua a Iosefa i le mauga. Ae talu ai ua maliu Alevine, sa lemautonu ai lava Iosefa.

“O ai la le tagata sa'o?” sa ia fesili ai.

“O le a e iloa lava,” sa fai atu ai Moronae.

Na sailia e Iosefa le taitaiga a le Alii e ala i lana maa vaai. Sa ia aoaoina, o le tagata sa'o, o Ema.¹⁰

Na tosina atu Iosefa ia Ema i le taimi lava na ia feiloai ai ia te ia. E faapei o Alavine, o ia o se tasi sa mafai ona fesoasoani ia te ia e aveai ai ma tagata sa manaomia e le Alii e tauaveina Lana galuega. Ae sa tele atu isi mea e uiga ia Ema nai lo lena. Sa alofa Iosefa ia te ia ma manao e faaiipoipo ia te ia.¹¹

Ia Tesema, na atoa ai le luasefulu-tasi tausaga o Iosefa. I aso ua mavae, sa ia faatagaina o ia lava ina ia fetosoaiina solo e mea ua faamoemoe i ai tagata na mananao e faaoga lana meaalofo.¹² Ae ina ua mavae lana asiasiga talu ai i le mauga, sa ia iloaina e tele atu isi mea e ao ona ia faia e saunia ai o ia lava e maua ia papatusi.

A o lei toe foi atu i Haramoni, sa talanoa Iosefa i ona matua. “Ua fai la'u faaiuga o le a ou faaiipoipo,” na ia ta'u



I le po o le aso 22 o Setema, 1827, sa ave atu ai e Iosefa ma Ema se taavale solofanua i lenei maupuepue, lea na tanumia ai papatusi o le Tusi a Mamona. Ina ua uma ona aumai papatusi, sa nana e Iosefa i totonu o se ogalaau oo mo se taimi e puipui ai mai le au sue oa.

atu ai ia te i la'ua, "ma, afai e leai se mea lua tetee ai, o le Tamaitai o Ema o la'u filifiliga lea." Sa fialia ona matua i lana faaiuga, ma sa uunaia o ia e Lusi e o mai latou te nonofo pe a uma ona faaiipoipo.¹³

Sa faaalu e Iosefa le tele o taimi sa mafai ona maua e faatasi ai ma Ema i lena taumalulu, o nisi taimi e faanoi mai ai le taavale solofanua a le au Knight pe a faigata ona malaga i le fale o le au Hale i le kiona. Ae sa le fialia pea ona matua ia [Iosefa], ma o ana taumafaiga ia fialia le aiga ia te ia sa lei faamanuiaina.¹⁴

Ia Ianuari 1827, sa asiasi atu ai Ema i le fale o le au Stowell, lea sa mafai ai ona la tafafao faatasi ma Iosefa e aunoa ma ni foliga le fialia o lona aiga. O iina na faamalamalama atu ai Iosefa ia Ema, ma o le taimi muamua, sa foliga na faateia Ema. Sa ia iloina o le a teena e ona matua le faaiipoipoga.¹⁵ Ae sa uunaia e Iosefa o ia e mafaufau i ai. E mafai ona la faaiipoipo loa e aunoa ma le maliliega a lona aiga.

Sa mafaufau Ema i le faamalamalamaga. O lona faaiipoipo atu ia Iosefa o le a le fialia ai ona matua, ae o lana filifiliga, ma sa alofa o ia ia te ia [Iosefa].¹⁶

I sina taimi mulimuli ane, i le aso 18 Ianuari, 1827, sa faaiipoipo ai Iosefa ma Ema i le fale o le faamasino o le filemu

i le lotoifale. Ona la o atu ai lea i Maniseta ma amata faatasi ai lo la olaga i le fale fou o matua o Iosefa. Sa toafilemu le fale, ae sa soona faaalu e Iosefa le Matua ma Lusi se tupe i le fale, ma na le mafai ai ona totogi, ma o lea na faoa ai le fale. Ua latou lisiina nei le fale mai tagata na faataua.¹⁷

Sa fialia le aiga o Samita latou te faatasi ma Iosefa ma Ema. Ae o le valaauga faalelagi o le la atalii sa la popole ai. Sa faalogo tagata o le eria e uiga i papatusi auro ma o nisi taimi sa latou o ai e sue.¹⁸

I se tasi aso, sa alu ai Iosefa i le taulaga mo se feau. Sa faamoemoe e toe foi atu mo le meaai o le afiafi, ae sa popole ona matua ina ua le fo'i ane. Sa latou faatalitali mo ni itula, sa le mafai ona momoe. Mulimuli ane sa tatala mai e Iosefa le faitotoa ma faapalasi atu i luga o se nofoa, ua matua vaivai lava.

"Aisea ua e matua tuai mai ai?" sa fesili atu ai lona tama.

"Sa ou oo i se aoaiga sili ona matuia ua ou oo i ai i lo'u olaga," sa fai atu ai Iosefa.

"O ai sa faafaigaluegaina oe?" sa fesili atu ai lona tama.

"O le agelu a le Alii," sa tali atu ai Iosefa. "Sa ia fai mai ua ou faatalalē." O le aso o le isi ana feiloaiga ma Moronae sa vave oo mai lava. "E tatau ona ou tu i luga ma fai," sa ia fai atu ai. "E tatau ona ou tuu atu a'u i mea ua poloaiina a'u e le Alii e fai."¹⁹

Ina ua mavae le seleselega o le tautoulu, sa malaga atu ai Iosia Stowell ma Iosefa Knight i le eria o Maniseta mo mea faapisinisi. Sa iloa uma e alii ia o le tausaga lona fa o le asiasiga a Iosefa i le mauga ua oo mai, ma sa la nau-nau ai e fia iloa pe ua i'u ina faatuatuaina e Moronae o ia i papatusi.

Sa iloa foi e tagata saili oa i le lotoifale ua oo i le taimi mo Iosefa e maua ai faamaumauga. Ae o se tasi o i latou, o se alii e igoa ia Samuelu Lorenise, ua fai si umi o fealualuai solo i le mauga e sue ia papatusi. I le popole ai ina ne'i faa-tupu e Samuelu se vevesi, sa auina atu ai e Iosefa lona tamā i le fale o Samuelu i le afiafi o le aso 21 Setema e mata'itu o ia ma faafetaia'ia o ia pe a foliga mai o le a ia alu i le mauga.²⁰

Ona saunia lea e Iosefa o ia lava e aumai ia papatusi. O lana asiasiga faaletausaga i le mauga o le a faia i le aso e sosoo ai, ae ina ia faafenuniaia le au saili oa, sa ia fuafua ai ia taunuu i le mauga pe a te'a teisi lava le vaeluapo —e tusa ma le taeao segisegi o le aso 22 Setema—i le taimi e leai ma se tasi e manatu ua alu o ia i fafo ma le fale.

Ae sa moomia pea ona ia sailia se auala e puipuia ai papatusi i le taimi na te mauaina ai. Ina ua momoe uma le toatele o le aiga, sa ia fesili lemu atu i lona tina pe i ai sana pusa e loka. Sa leai se pusa a Lusi ma o lea sa popole ai.

“E le afaina,” sa fai atu ai Iosefa. “O le a lelei a mea mo lenei taimi e aunoa ma se pusa.”²¹

Sa lei pine ae tu mai Ema, sa saunia mo le tietiega, ma sa la feosofi i luga o le taavale solofanua a Iosefa Knight ma malaga atu ai i le po.²² Ina ua la taunuu atu i le mauga, sa faatali Ema i le taavale solofanua a o pe'a atu Iosefa i le maualuga o le nofoaga i le mea sa i ai papatusi sa natia.

Sa faaali mai Moronae, ma sii ae ai e Iosefa ia papatusi auro ma maa vaai mai le pusa maa. A o lei foi ifo Iosefa mai le mauga, sa faamanatu atu e Moronae ia te ia ia aua lava nei faaali atu ia papatusi i se tasi sei vagana ai i latou e tofia e le Alii, ma sa folafola atu ia te ia o le a puipuia papatusi pe afai na te faia mea uma na te mafaia e faasaoina ai.

“E ao ona e mataala ma faamaoni i lou faatuatua,” sa ta'u atu ai e Moronae ia te ia, “a leai o le a faatoilaloina oe e tagata leaga, aua o le a latou faia soo se fuafuaga ma

togafiti e mafai e aveesea ai papatusi mai ia te oe. Ma afai e te le uai mai i taimi uma, o le a manuia a latou togafiti.”²³

Sa ave e Iosefa papatusi i lalo i le mauga, ae a o lei taunuu atu i le taavale solofanua, sa ia nanaina i se oga-laau 'ō'ō lea o le a saogalemu ai seia oo ina maua se pusa e loka. Ona ia maua lea o Ema, ma toe foi atu i le fale a o amata ona oso a'e le la.²⁴

I le fale o Samita, sa faatalitali ai ma le popole Lusi mo Iosefa ma Ema, a o ia saunia le malu taeao mo Iosefa le Matua, Iosefa Knight, ma Iosia Stowell. Sa tatavale lona fatu a o fai ana feau, ma le atuatuvaletu ne'i foi atu lana tama e aunoa ma papatusi.²⁵

I se taimi e lei mamao, sa ulu atu ai Iosefa ma Ema i le fale. Sa tilotilo atu Lusi e fia vaai pe o i ai ia Iosefa ia papatusi, ae sa tuua ma le gatete le potu ina ua ia vaai atu e leai se mea o uu mai i ona lima.

Sa mulimuli atu Iosefa ia te ia. “Tina,” sa ia fai atu ai, “aua e te atuatuvaletu.” Sa ia tuu atu ia te ia se mea na afifi i se solosolo. I le tago atu i le ie, sa tau atu ai Lusi i se mea e foliga mai o se mata-tioata lapoa. O le Urima ma le Tumema, o maa vaai ia na saunia e le Alii mo le

faaliliuina o papatusi.²⁶

Sa matua fiafia Lusi. Sa foliga mai Iosefa e peiseai ua aveesea se avega mamafatu mai i ona tauau. Ae ina ua faa-tasi atu ma isi i totonu o le fale, sa ia foliga faanoanoa ma sa tausami gugū. Ina ua maea, sa ia punou i ona lima ma le faanoanoa. “Ua ou le fiafia lava,” sa ia fai atu ai ia Iosefa Knight.

“Ia,” sa fai atu ai le toeaina, “Faamalulu atu.”

“Ua matua ou le fiafia lava,” sa fai atu ai Iosefa, ma ona foliga ua suia i le ataata. “E faasefulu ua sili atu ai le lelei nai lo le mea na ou faamoemoeina!” Sa ia faamatalaina le tetele ma le mamafa o papatusi ma sa talanoa fiafia e uiga i le Urima ma le Tumema.

“E mafai ona ou vaai i soo se mea,” sa ia fai atu ai. “E ofoofogia lava ia mea.”²⁷

O le aso na mavae ai ona ia mauaina papatusi, sa alu ai Iosefa e galue i le faaleleia o se vaieli i se taulaga lata ane e saili ai ni tupe mo se pusaloka. I lena lava taeao, a o faia



Ao lei alu ifo Iosefa mai le mauga, sa faamanatu atu e Moronae ia te ia e aua nei ona faaali atu papatusi i se tasi sei vagana ai i latou ua tofiaina e le Alii.



ni ana feau i le mauga mai le fale o le au Samita, sa faalogo atu ai Iosefa le Matua, i se vaega o tagata saili oa o taupulepule e gaoui papatusi auro. “O le a tatou maua papatusi,” sa fai atu ai se tasi o i latou, “e tusa lava po o Joe Samita po o tiapolo uma o seoli.”

I le popole ai sa toe foi atu ai Iosefa le Matua i le fale ma ta’u atu ia Ema. Sa ia ta’u atu na te le iloa po o fea o i ai papatusi, ae na te mautinoa lava o loo malupuipua e Iosefa.

“Ioe,” sa tali atu ai Iosefa le Matua, “ae manatua mo sina mea itiiti lava na ma’umau ai e Esau ona faamanuiaga ma le tofi. Atonu e ono faapena mo Iosefa”²⁸

Ina ia mautinoa po o malupuipua papatusi, sa faagutu ai e Ema se solofanua ma tietie atu mo le silia ma le itula i le faatoaga sa galue ai Iosefa. Sa ia maua atu o ia i le vaieli, sa lofia i le palapala ma afusisina mai galuega o le aso. Ina ua faalogo

atu i le tulaga lamatia, sa tilotilo Iosefa i totonu o le Urima ma le Tumema ma iloa ai o loo saogalemu pea papatusi.

I le fale, sa fealualuai solo ai Iosefa le Matua i fao o le fale, ma autilotilo atu i minute uma i lalo i le auala seia oo ina ia iloa atu ia Iosefa ma Ema.

“Tamā,” sa fai atu ai Iosefa a o la taunuu atu, “o loo saogalemu mea uma—e leai se mea e ono faapopoleina ai.”²⁹

Ae o le taimi ua tatau ai loa ona faatino.

Sa faataalise atu i le mauga, sa maua e Iosefa le ogalaau sa nana ai papatusi ma afifi ma le faaeteete i se ofutino.³⁰ Ona ia oso faanana atu lea i le togavao ma agai atu i le fale, ae sa autilotilo ma le mataalia i se tulaga lamatia. Sa natia e le togavao o ia mai tagata i luga o le alatele, ae sa maua ai e le au gaoui le tele o nofoaga e lalafi ai.

I le tiga ai i le mamafa o faamaumauga, sa savali ai Iosefa i le togavao i le televave na te mafai. Sa punitia e se laau na pa’ū le auala i ona luma atu, ma a o ia a’e i luga, sa ia lagonaina se mea malo na ta ai o ia mai tua. Ina ua faliu atu, na ia vaaia ai se tamaloa o loo oso atu ia te ia, ma se fana o loo uu pei o se pate.

Sa uu mau papatusi i le tasi lima, ae tu’i e Iosefa le tamaloa ma pa’ū ai i lalo ma taavalevale atu ai i le mafiafia o le togavao. Sa ia tamoe pe tusa ma se afa maila ae oso mai le isi tamaloa mai tua o se laau ma ta o ia i le au o lana fana. Sa

tauivi Iosefa ma le tamaloa ma sola ese atu ai, ma le pulunaunau ia vave ona alu ese atu ma le togavao. Ae a o lei mafai ona mamafa tele atu, sa osofaia o ia e le tamaloa lona tolu, sa matua lavea ai lava lea na niniva ai. I le mauaina o lona malosi, sa matuai tui ai e Iosefa le tamaloa ma tamoe atu i le fale.³¹

Ina ua taunuu i le fale, sa tamoe atu ai Iosefa i le faitotoa ma le afifi mamafa o loo afisi i lalo o lona ‘ao’ao. “Tamā,” sa ia alaga atu ai, “Ua ia te a’u papatusi.”

O lona tuafafine e sefulu-fa tausaga le matua o Katharine, sa fesoasoani ia te ia e tuu le afifi i luga o se laulau a o potopoto faatasi le aiga i ona talaane. Sa mafai ona iloa e Iosefa na mananao lona tama ma lona uso laitiiti o Viliamu e tatala ia papatusi, ae sa ia taofia i laua.

“E le mafai ona matou vaai ai?” Sa fesili atu ai Iosefa le Matua.

“Leai,” sa tali atu ai Iosefa. “Sa ou le usiusitai i le taimi muamua, ae ua ou naunau ina ia faamaoni i le taimi lenei.

Sa ia ta’u atu ia i latou e mafai ona latou tagotago i papatusi mai luga o le ie, ma sa piki i luga e Viliamu le afifi. Sa mamafa atu i lo maa, ma sa mafai ona iloa e Viliamu sa i ai ni lau sa masu’e e pei o

itulau o se tusi.³² Sa tuli atu foi e Iosefa lona uso laitiiti, o Don Carlos, e aumai se pusa e loka mai ia Ailama, sa nofo i lalo mai o le auala tele ma lona toalua o Jerusa ma le la pepe teine faatoa fanau.

Sa lei pine ae taunuu atu Ailama, ma o le taimi lava na malupuipua ai papatusi i totonu o le pusa, sa faapalasi ane ai Iosefa i luga o se moega i talaane ma amata faamatala atu i lona aiga ia tamaloloa i le togavao.

A o ia talanoa atu, sa ia lagonaina le tiga o lona lima. I se taimi o osofaiga sa gau ai lona limamatua.

“Ua tatau ona lava a’u tala, Tamā,” sa ia vave fai atu ai, “ae tago mai e toe faasa’o atu lo’u limamatua.”³³ ■

O se lisi atoa o galuega ua taua e maua i le Igilisi i le saints.lds.org.

O le upu *Autu* i faamatalaga ua faaalai ai faamatalaga faapoopoo i le initoneti i le aupai.lds.org.

FAAMATALAGA

1. Agreement of Josiah Stowell and Others, Nov. 1, 1825, i le *JSP*, D1:345–52.

2. Smith, *Biographical Sketches*, 91–92; Oliver Cowdery, “Letter VIII,” *LDS Messenger and Advocate*, Oct. 1835, 2:200–202; Joseph Smith History, 1838–56, voluma A-1, 7–8, i le *JSP*, H1:234 (draft 2); Smith, *On Mormonism*, 10. **Autu:** Treasure Seeking



Sa faanoi mai e Iosefa se pusa e loka faapenei mai lona uso o Ailama e teu ai papatusi o le Tusi a Mamona.

3. Agreement of Josiah Stowell and Others, Nov. 1, 1825, i le *JSP*, D1:345–52.
4. Pratt, *Autobiography*, 47; Burnett, *Recollections and Opinions of an Old Pioneer*, 66–67; Woodruff, *Journal*, July 4, 1843, and Oct. 20, 1855; Emmeline B. Wells, “L.D.S. Women of the Past,” *Woman’s Exponent*, Feb. 1908, 36:49; Joseph Smith III, “Last Testimony of Sister Emma,” *Saints’ Herald*, Oct. 1, 1879, 289; see also Staker and Ashton, “Growing Up in the Isaac and Elizabeth Hale Home”; and Ashurst-McGee, “Josiah Stowell Jr.–John S. Fullmer Correspondence,” 108–17.
5. Baugh, “Joseph Smith’s Athletic Nature,” 137–50; Pratt, *Autobiography*, 47; Burnett, *Recollections and Opinions of an Old Pioneer*, 66–67; *Recollections of the Pioneers of Lee County*, 96; Youngreen, *Reflections of Emma*, 61, 67, 65, 69; Emmeline B. Wells, “L.D.S. Women of the Past,” *Woman’s Exponent*, Feb. 1908, 36:49.
6. Joseph Smith History, 1838–56, volume A-1, 8, in *JSP*, H1:234 (draft 2); Smith, *Biographical Sketches*, 92; Bushman, *Rough Stone Rolling*, 51–53; Staker, “Isaac and Elizabeth Hale in Their Endless Mountain Home,” 104.
7. Joseph Smith History, 1838–56, volume A-1, 7–8, in *JSP*, H1:234–36 (draft 2); Knight, *Reminiscences*, 2; Joseph Smith III, “Last Testimony of Sister Emma,” *Saints’ Herald*, Oct. 1, 1879, 290.
8. William D. Purple, “Joseph Smith, the Originator of Mormonism,” *Chenango Union*, May 2, 1877, [3]; see also An Act for Apprehending and Punishing Disorderly Persons (Feb. 9, 1788), *Laus of the State of New-York* (1813), 1:114. **Autu:** Joseph Smith’s 1826 Trial
9. “Mormonism—No. II,” *Tiffany’s Monthly*, July 1859, 169.
10. Knight, *Reminiscences*, 2.
11. Lucy Mack Smith, History, 1844–45, 96; tagai foi Knight, *Reminiscences*, 2.
12. Tagai “The Original Prophet,” *Fraser’s Magazine*, Feb. 1873, 229–30.
13. Lucy Mack Smith, History, 1845, 97.
14. Knight, *Reminiscences*, 2; Joseph Smith III, “Last Testimony of Sister Emma,” *Saints’ Herald*, Oct. 1, 1879, 289.
15. Joseph Smith III, “Last Testimony of Sister Emma,” *Saints’ Herald*, Oct. 1, 1879, 289; Joseph Smith History, 1838–56, volume A-1, 8, i le *JSP*, H1:236 (draft 2).
16. Joseph Smith III, “Last Testimony of Sister Emma,” *Saints’ Herald*, Oct. 1, 1879, 290; Joseph Lewis and Hiel Lewis, “Mormon History. O Se Mataupu Fou, e le o toe Mamao ae Lolomiina,” *Amboy Journal*, Apr. 30, 1879, 1; tagai foi Oliver Cowdery, “Letter VIII,” i le *LDS Messenger and Advocate*, Oct. 1835, 2:201.
17. Joseph Smith History, 1838–56, volume A-1, 8, i le *JSP*, H1:236 (draft 2); Lucy Mack Smith, History, 1844–45, book 4, [11]–[12]; book 5, [1]–[3]. **Autu:** Sacred Grove and Smith Family Farm
18. “Mormonism—No. II,” *Tiffany’s Monthly*, July 1859, 167–68.
19. Lucy Mack Smith, History, 1844–45, book 5, [4]–[6]
20. Knight, *Reminiscences*, 2.
21. Lucy Mack Smith, History, 1844–45, book 5, [6].
22. Lucy Mack Smith, History, 1845, 105.
23. Lucy Mack Smith, History, 1844–45, book 6, [1].
24. “Mormonism—No. II,” *Tiffany’s Monthly*, June 1859, 165–66; Lucy Mack Smith, History, 1844–45, book 5, [6].
25. Lucy Mack Smith, History, 1844–45, book 5, [6]–[7]; Knight, *Reminiscences*, 2.
26. Lucy Mack Smith, History, 1844–45, book 5, [7]–[8].
27. Knight, *Reminiscences*, 2–3; Joseph Smith History, 1838–56, volume A-1, 5, i le *JSP*, H1:222 (draft 2); tagai foi Alema 37:23.
28. Lucy Mack Smith, History, 1844–45, book 5, [8]–[10]; “Mormonism—No. II,” *Tiffany’s Monthly*, Aug. 1859, 166; Smith, *Biographical Sketches*, 103; tagai foi Kenese 25:29–34.
29. Lucy Mack Smith, History, 1844–45, book 5, [10] ma le adjacent paper fragment.
30. Lucy Mack Smith, History, 1844–45, book 5, [11]. **Topic:** Gold Plates
31. Lucy Mack Smith, History, 1844–45, book 5, [11].
32. “The Old Soldier’s Testimony,” *Saints’ Herald*, Oct. 4, 1884, 643–44; Salisbury, “Things the Prophet’s Sister Told Me,” 1945, Church History Library; Ball, “The Prophet’s Sister Testifies She Lifted the B. of M. Plates,” 1954, Church History Library; Smith, *William Smith on Mormonism*, 11; Lucy Mack Smith, History, 1844–45, book 5, [11]; Joseph Smith III, “Last Testimony of Sister Emma,” *Saints’ Herald*, Oct. 1, 1879, 290.
33. Lucy Mack Smith, History, 1844–45, book 5, [11]–[12]. **Autu:** Lucy Mack Smith

UA IINEI? LE EKALESIA?

Na ou auai i le Ekalesia i le 36 o ou tausaga, ma na i ai taimi sa ou lagonaina ai le malosi faaleagaga. O isi taimi sa ou faia ai mea e aunoa ma le mafaufau i ai. I le va o se taimi faigaluega pisi, amataina e lou toalua o se matata fou, faaletonu o le soifua maloloina, ma isi luitau, sa amata ona ou tauivi faaleagaga. Sa ou auai i le lotu ma fesoasoani e aoao le korama a le au tiakono, ae na'o le pau na o mea na mafai ona ou faia. Sa ou le maua le malosi e suesue ai au tusitusiga paia pe tootuli e tatalo.

Sa ou tauivi pea i le taimi na ou alu ai i se malaga faapisinisi i Chile i matu. Mai le malaevaalele i Copiapó, e lua itula sa ma tietie atu ai i le nofoaga mo le galuega e faapipii ai le sola i le Toafa o Atacama i Chile. Sa ou te'i

i le maotua o lenei itu, e na'o le toafa lanumumu i le fia ma le fia o maila. O le tuuatoatasi o le laufanua sa ou maofa ai.

Ina ua mavae le tusa o se vaiaso talu ona ou i ai i le nofoaga, sa matou tietie atu ai i le taulaga aupito latalata [e faatau ai] ni sapalai. O iina sa ou vaaia ai se fale na tosina i ai la'u vaai. Sa ou fai atu i le avetaavale e afe i tua. O le fale sa matagofie ona lafanua lea sa si'o i se pa uaea uliuli. I le pito i luma o le fale, sa i ai se faailoga masani, "La Iglesia de Jesucristo de los Santos de los Últimos Días" po o le "O Le Ekalesia a Iesu Keriso o le Au Paia o Aso e Gata Ai."

"Ua *iinei* le Ekalesia?" Sa ou mafaufau ai. Sa ou maofa i le oo mai o le Ekalesia i lenei vaega mamao o le lalolagi. Sa ou

pueina se ata o le falelotu ma tesi atu i lo'u toalua. O lana tali sa i ai se aafiaga o'oo'o ia te a'u: "O loo silafia e le Tama Faalelagi Ona tagata i soo se mea."

O se savali tuusao lenei mo a'u mai lo'u Tama Faalelagi. I le faigata o le ola ai i lea aso i lea aso, na galo ai ia te au, ma sa manaomia ona faamanatu mai, e alofa le Tama Faalelagi i Ana fanau uma. E alofa o Ia i na Au Paia i lena taulaga laitiiti ma le mamao i le ogatotonu o le toafa, ma e alofa foi o Ia ia te a'u.

O lena po sa ou tootuli ai ma faafetai atu i le Tama Faalelagi mo faamamuiaga sa Ia tuuina mai ia te au i lena aso. O le iloina e alofa o Ia ia te a'u ua fesoasoani ou te toe atinae ai lo'u faaleagaga, ma faaauau ai ona faama-losia a'u i aso taitasi. ■
Jon Evans, Kalefonia, ISA

Ao ma tietie atu i le taulaga aupito lata mai mo ni sapalai, sa tosina atu la'u vaai i se fale sa ma pasia.



LUA MISIONA, LUA AIGA UA FAAMANUIAINA

Ao [ou] auauna atu i le Misiona a Arisona Mesa, sa masani ona ou maua ni imeli mai lou tuafafine matua i Atenitina. O Natalia sa le o se tagata o le Ekalesia. O ni nai tausaga na muamua atu, ina ua maliu lana tama teine, sa taumafai ai lo matou aiga e faasoa atu le talalelei ia te ia, peitai sa le mana lava i ai.

Sa faaauau ona faasoa atu i ai lau molimau ia te ia i lau misiona. I se tasi o imeli, sa ou faamatala i ai e uiga i se tamaitai sa ma feiloai i ai ma la'u soa. Ua faapena foi ona maliu lana tama teine. Sa ma molimau atu e uiga i aiga e faavavau ma sa ia lagonaina le faamoemoe i mea sa ma faasoaina atu. Sa ou tau atu ia Natalia e mafai foi ona faapena ona lagona. Sa toe tusi mai o ia, ma tau mai sa mana na te lagonaina lona faamoemoe ae sa manatu sa le lava le malosi o lona faatuatua.


Sa tonu ia te au e auina atu ia Natalia se tusi e tusilima e valaaulia ai o ia e tatalo mo le fesoasoani ina ia talitonu. Sa ou lagonaina le uunaiga e tusi se parakalafa e tasi i le faaPeretania ma faatuatusi atu i se faifeautalai. Sa na'o le faaSipaniolo sa iloa e Natalia, o lea sa ou fai atu ai ia te ia e sue faifeautalai ma fai atu ia i laua e faaliliu atu ia te ia. Sa ou manatu o le a iloa e se faifeautalai le faaPeretania.

E lei leva lona, ae ou maua se imeli mai ia Natalia. Sa ia mauaina faifeautalai ma fai atu ia i laua e faaliliu lau tusi. Sa la faitauina lemu ma ataata. Ina ua fesili Natalia po o le a le mea na ou tusia, sa la tali mai, "Se'i o tatou talanoa e uiga i ai!" Sa


ou tusia, sa tauivi Natalia ma le maliu o lana tama teine, ma sa ou fai atu i faifeautalai e aoao o ia e uiga i le ata o le faaolataga.

Sa faasoa atu e faifeautalai se savali puupuu, ma sa fiafia Natalia i mea sa la aoaoina atu. Ona tau lea i ai e Natalia sa ou auauna atu i se misiona i Mesa, Arisona, ISA. Sa fai atu se tasi o alii faifeautalai o Elder Larson, o iina e sau ai o ia.

E tasi le tausaga muli-muli ane, sa ou siitia ai i le eria e nonofo ai le aiga o Elder Larson. Sa oo ina ou iloa lona aiga ao ia iloina foi lo'u aiga, ma sa faamanuiaina ai ia aiga uma e lua. Sa tatalo Elder Larson mo lona uso laitiiti, o le sa tauivi ma lana molimau. Sa mafai ona ma o i ni fesuiaga ma lona uso ma fesoasoani ia te ia e faamalosi lana molimau. Sa faaauau ona aoao e Elder Larson ma lana soa ia Natalia ma iu ai ina papatisoina o ia. Ua ou iloa na auina atu i ma'ua e le Alii i ni itu se lua, o au i Arisona ae o Elder Larson i Atenitina, ina ia mafai ona ma fesoasoani uma ia te Ia e faamalosia o ma'ua aiga i le talalelei. ■
Juan Manuel Gomez, Rosario, Atenitina



Ou te faafetai ona sa tofia au i Arisona ae tofia Elder Larson i Atenitina ina ia mafai e i maua uma ona fesoasoani i le Alii e faamanuia o ma'ua aiga.



E ui i ou lagona atuatuvaile, sa ou tu sa’o atu i luga ma fai atu, “ou te auai i Le Ekalesia a Iesu Keriso o le Au Paia o Aso e Gata Ai.”

FAAMANUIAINA MO LE FOLAFOLAINA ATU O LA’U TAPUAIGA

Sa ou papatiso ina ua 19 ou tausaga. **S**O le toatele o lo’u aiga ma uo e lei taliaina la’u filifiliga e auai i le Ekalesia, ae e lei taofia ai a’u e lena mea. O le lua vaiaso mulimuli ane, sa ou amata ai i lo’u tausaga lona lua i le kolisi. Ina ua ou toe foi i le lotoa, sa ou lagona le atuatuvaile e uiga i la’u tapuaiga fou.

Sa amata ona ou popole atonu o le a ou le maua le lototele e tu atu ai mo la’u lotu. Sa ou lagona le tuuatoatasi. Ou te lei feiloai lava i se tagata o le Ekalesia i le kolisi, ma ou te leiloa po o fea e maua ai se falelotu, pe e i ai foi se uarota po o se paranesi e lata ane. Sa ou tatalo i le Tama Faalelagi mo le lototele. Sa ou tatalo ina ia ou maua le lototele e tu atu ai mo o’u talitonuga fou.

O ni nai aso mulimuli ane, sa ou fesoasoani ai i nisi o tagata e me’i i

totonu [o o latou fale]. Sa ou feiloai i se alii talavou e igoa ia Brian ma sa amata ona ma faauo. Sa ma savalivali i le lotoa i se tasi aso ae ia fesili mai ia te a’u po o a ni a’u fuafuaga mo le Aso Sa. Sa ou tau atu ia te ia ou te alu i le lotu.

“Oi, o le a le lotu e te alu i ai?” na ia fesili mai ai.

E ui i le lagona popole sa i lo’u manava, sa ou tu sa’o i luga ma fai atu, “ou te alu i Le Ekalesia a Iesu Keriso o le Au Paia o Aso e Gata Ai.”

Sa ou mitamita ia te a’u lava. Sa ou popole foi pe o le a faapefea ona tali mai Brian. I le taimi lava lena, sa ou vaai atu ai i faifeautalai. A’o lei fai mai se tala a Brian, sa ou tau atu ia te ia ou te toe foi mai. Sa ou tamoe atu i faifeautalai. Sa la fiafia e feiloai ia te a’u ma tuu mai ia te a’u faamatalaga uma na ou manaomia e alu ai i le lotu i le aso e sosoo ai.

Sa ou toe foi ia Brian ma faamatala i ai le mea na tupu. Sa ou faasoa atu foi ia te ia sina mea itiiti e uiga i le Ekalesia, ma sa faaaauu pea le ma savaliga e aunoa ma sina eseesega, pau le mea ua i ai nei ua fai sina malosi o a’u laa. Sa ou lagonaina foi le mafanafana ma le filemu lea e nao le Agaga e mafai ona aumaia. Sa ou popole lava e uiga i le tuuatoatasi ma leiloa po o fea e alu i ai i le lotu. Ae ou te talitonu o le taunuu mai o na faifeautalai i lena lava nofoaga i lena taimi o se auala lea a le Tama Faalelagi e faamanuiaina ai a’u mo le folafolaina atu o la’u tapuaiga.

Ua silia ma le 10 tausaga ua mavae atu, ma e talu mai lena aso ou te lei fefe lava e tau atu, “O a’u o se tagata o Le Ekalesia a Iesu Keriso o le Au Paia o Aso e Gata Ai!” ■

Kristin McElderry, Masatusa, ISA

O LE FESOASOANI A LE ALII E ALA I TAOTOGA E LUA O LE FAIAI

I le taimi o faamalositino faafomai mo le tiga o le papatua, sa ou matauina ai le vaivai ma le gase o le itu tauagavale o lo'u tino. Ina ua ou faamatala atu nei auga i la'u fomai mo le faamalositino, sa popole o ia ma uunaia au e vaai se fomai.

Na faaalua i se faaata e faaaoga ai maneta [MRI], ua sosolo atu le tupu o lo'u faiai i lalo ifo o lo'u atigipoo ma sa to'a ai le suavai o le tuasivi i lo'u ua mo le tele o tausaga. O lenei mea na mafua ai le tiga tele ma le tiga soo o lo'u ulu. Na pau lava le filifiliga o le taoto. Ae e ui lava i le taotoga, sa ou faalogoina pea le tiga i taimi uma.

O le ono masina mulimuli ane, sa ou toe foi atu ai i la'u fomai mo nisi suesuega ma iloa ai, o le suavai o le tuasivi lea na to'a ua faateteleina atili. Sa matuai ou fefe lava e toe fai se isi taotoga tiga. Sa ma sailia ma lo'u toalua ni isi manatu faafomai ona ma o loa lea ma se fomai o le sa lagonaina ma le

mautinoa, o le aveesea o se vaega o lo'u faiai o le a aoga lea.


O lo'u sailiga malosi ai mai le taotoga lona lua o lo'u faiai, sa o se aafiaga aupito tiga lea o lo'u olaga. Sa matuai ou saili ma le atuavale mo le Agaga e faamafanafana mai ia te au. Sa ou faalogologo i lauga ma viiga, tatalo pea lava pea, ma maua le tele o ni faamanuiaga faaleperisitua.

E ala i la'u sailiga malosi tiga tele, ua ou iloa ai sa faafogaina e le Tama Faalelagi au tatalo, ma tatalo a isi na faia mo au. Sa Ia auina mai tagata ia te au i taimi sa ou manaomia ai i latou. Sa fesoasoani mai se tausisoifua i le atufalega sa ou i ai ia ou iloa le ala e taulima ai au fualaa. Sa matau mai e le tamaloa ma le fafine o lo'u aiga ia faailoga o le leai o se vai i lo'u tino, ma ave loa au i le falemai. Na tuua

e se tamaititi o le Peraimeri, o le sa manao e fesoasoani mai i lo'u aiga, ana meataalo i luga o le faasitepu mo lo'u atalii. E ala i lenei aafiaga ma le tele o isi aafiaga, ua mafai ona ou lagonaina ai le sapaapaia o a'u e le Faaola, ma tuputupu malosi ae ai la'u molimau i aso taitasi. O se aafiaga matagofie ma le paia lenei na tupu mai i se aafiaga matuai tiga lava.

E ui ina sa faamanuiaina lo'u taotoga lona lua, ae sa faaaauu pea lo'u le lagonaina, ma sa faapea ona ou aoao ai ia fetuutuunai i se olaga o le tiga faifaiumi ma faatuatua o loo i ai se faamoemoega o le Tama Faalelagi i lea mea. Ae e i ai lo'u faamoemoe i Lana folafolaga e faapea, o le a faaaauu ona Ia faamalasia a'u i o'u luitau, e pei ona Ia fetalai: "O le a Ou alu muamua atu i o outou luma. O le a ou i ai i lo outou lima taumatau ma lo outou agavale, ma o le a i ai lou Agaga i o outou loto, ma sio faataamilo outou e au agelu, e sapaapai outou i luga." (MF&F 84:88). ■

Bryn Booker, Idaho, ISA



Na faaalua i se faaata e faaaoga ai maneta [MRI], na mafua le tiga ona sa to'a ai le suavai o le tuasivi i lo'u ua. Na pau lava le filifiliga o le fai o le taotoga.



Saunia e Elder
Michael John U.
Teh
O Le Fitugafulu

O Le Faatinoga Faapaleniina o le Tumau Ai

Sa ou talanoa talu ai nei i la’u fanau, fanau teine a uso ma tuafafine, ma se uo talavou ina ia maua se lagona o fesili, luitau, le fiafia, ma manumalo o feagai ma talavou matutua i lenei vaitaimi. Sa ou mafau-fau loloto ma tatalo e uiga i mea sa faasoa mai ia te a’u ma ua aoteleina i ni manatu lea o le a ou faasoaina atu nei ma faamoemoe e mafai ona fesoa-soani e taliina nisi o na fesili ma luitau.

Faalogo i le Agaga Paia

E ese mai ai i lagona o nisi o outou i nisi taimi, sa ou folafola atu e tali mai le Tama Faalelagi ia tatou tatalo i Lana ala. Mafau-fau i mau nei:

“Aua o i latou uma e ole atu, e to mai i ai; ma o ia o le e saili, e maua e ia; ma o le e tuitui atu, o le a tatala mai ia te ia” (3 Nifae 14:8).

“Ae afai ua leai se poto i so outou, ina ole atu ia i le Atua, o le foai tele mai i tagata uma ma le le toe

tautaua; ona foaiina mai ai lea ia te ia” (Iakopo 1:5).

“Faauta, o le a Ou tau atu ia te oe i lou mafau-fau ma lou loto, e ala i le Agaga Paia, lea o le a oo atu i ou luga ma lea o le a mau i lou loto” (MF&F 8:2).

E faapefea la ona tatou mauaina tali ma faaaliga? E faapefea ona tatou iloa o le Agaga Paia ae le na’o o tatou lava mafau-fauga? Ou te fia faasoa atu ni aafiaga se lua i lo’u olaga ua avea ma ni mamanu.

Ina ua uma ona ma tafafao faama-sani ma Sister Teh mo sina taimi, na manino lava ua ou manao e faatasi ma ia e faavavau. E masani lava, sa ou faia o se mataupu o le tatalo faatauana ma le anapogi. Sa leai se suiga faapitoa i o’u lagona mulimuli ane. Ou te lei lagonaina se mu i lo’u loto. Ae peitai, sa faaaauau pea ona ou maua se lagona lelei e uiga i la’u faaiuga, o lea sa ou tumau ai pea. Sa maua foi e Sister Teh

Ou te molimau atu e mafai ona tatou “fiafia e oo i le iuga” pe a tatou mulimuli i musumusuga mai le Agaga Paia, filifili le lelei nai lo le leaga, ma faapaleniina a tatou tiutetauave.

le tali lava e tasi, o lea la ua ma i ai nei. Talu mai lena aafiaga, ua ou mauaina le tele o a’u faaiuga i se tulaga lava e tasi (tagai MF&F 6:22–23).

E faatusatusa lena mea i aafiaga ia ua ou mauaina nei e faatatau i ni tofiga faapitoa mai le Korama a Aposetolo e



Toasefululua e valaau se peresitene fou o se siteki. A'o o'u alu atu i lenei tofiga i le agaga o le tatalo ma le anapogi, sa faamanuiaina a'u i ni uunaiga manino lea na fesoasoani ia te a'u ia ou iloa po o ai e tatau ona valaauina. Na muai oo mai uunaiga i nisi taimi, i nisi taimi i le faagasologa, pe i nisi foi taimi ina ua maea le faagasologa o le faatalanoaga. Sa ou lagona i taimi uma le mu o lo'u loto. Ua ou iloa talu mai lena taimi le ala e taitaia ai a'u e le Agaga Paia i ia ituaiga tofiga.

Aisea e eseese ai le auala e fesootai mai ai le Agaga Paia ia te a'u? Ou te le iloa. O le mea taua, ua ou aoao ia iloa nei mamanu e avea o ni auala ou te mauaina ai ni faaaliga patino. Ou te maua le mafanafana ma le lototele i le apoapoaiga lenei, "Ia e lotomaulalo; ona taitaiina ai lea o oe e le Alii lou Atua, ma tali atu i au talosaga" (MF&F 112:10).

Filifili le Lelei nai lo le Leaga

O nisi tagata e mafaufau ua amata ona faigata ma faigata atili ona iloa o le sa'o mai le sese. E foliga mai ua matua faateleina le faigata o le iloa ina o le sa'o mai le sese. O le tele o manatu le sa'o ae lauiloa o nei vai-taimi ua foliga mai e sa'o, pe a vaaia e ala atu i ni tioata vaapiapi. Peitai o lapisi tuai ua kavaina e ni pepa fou ma faasalalauina mai i ni faasalalaua fatufatuai e avea pea lava ma ni lapisi.

O le iloaitino o le sa'o ma le sese e le manaomia ai le faafaigataina. E oo lava i le taimi ae tatou te lei mauaina le

meaalofa o le Agaga Paia, sa faamanuiaina i tatou i le Malamalama o Keriso.

"Aua faauta, ua tuuina mai i tagata taitoatasi le Agaga o Keriso, ina ia mafai ona iloa e ia le lelei mai le leaga; o le mea lea, ou te faaali atu ai ia te outou le ala e faamasino ai; ona o mea uma e valaau mai ia fai le lelei, ma faatauinau mai ia talitonu ia Keriso, ua auina mai i le mana ma le meaalofa a Keriso; o le mea lea e mafai ai ona outou iloa ma le malamalama atoatoa ua mai le Atua.

"Ae o soo se mea e faatauinauina tagata ia latou faia le leaga, ma ia le talitonu ia Keriso, ma faafiti o ia, ma ia le auuina i le Atua, ona outou iloa lea ma le malamalama atoatoa ua mai le tiapolo; ona o le ala lea e galue ai le tiapolo, aua e le faatauinauina e ia se tagata ia faia le lelei" (Moronae 7:16–17).

O se tasi o tofotofoga sili o o tatou aso o le lagolagoina lea o le perofeta soifua. O le toatele o i tatou o le a fai mai, "Oi, e faigofie lena mea. Ua uma ona ou faia lena mea. Seki."

Ae e ofoofogia le vaaia o le ala e tali atu ai nisi o tagata o e sa manatu na lagolagoina le perofeta soifua i nisi o manatu taatele o le aso. Pe a feagai ma uunaiga a tupulaga, o nisi o i tatou e faia faapei, pe fausia ni manatu lea e fautua mai ai faapea tatou te leiloa o loo i ai se perofeta soifua.

Saili le Paleni Sa'o

Pe ua tele naua ea au mea o fai ua e lagona ai le pei ua fetosoai oe i ni

itu eseese? E te iloa? O le a faateleina le leaga. O le fesili la: E faapefea ona e mauaina le paleni sa'o?


Ia faatuina e avea ma ou sulu taiala le natura e faavavau o o tatou agaga ma lou faasinomaga o se atalii po o se afafine o le Atua. Taulai atu lou malosi i lena upumoni ma lona uiga. A le o le aveesea mai o isi mea uma mai lou olaga po o le a pauu atu lava i o latou tulaga tatau ai.¹ E lua ni mau e mafai ona avea ma ni mataupu faavae taiala:

"Ae ia outou muai saili le malo o le Atua ma lana amiotonu, ma o le a faaopoopo atu ia te outou nei mea uma" (3 Nifae 13:33).

"A ia outou teuina mo outou lava oa i le lagi, i le mea e le o i ai se mogamoga po o se ele e faaleagaina, ma le osofaia e tagata gaioi pe gaioia:

"Aua o le mea ua i ai lo outou oa, e i ai atofoi ma o outou loto" (Mataio 6:20–21).

Talitonu i ai pe leai, sa ou i ai i se tasi taimi i le tulaga o tou i ai nei. Sa i ai se taimi i lo'u olaga a'o ou faigaluega tumau, aoga i le po,



ma i ai se galuega lona lua le tumau pe a tuua le aoga seia oo i le vaveao—a'o ma faafaileleina ai ma Sister Teh le ma aiga laiti. E na o ni nai itula ou te moe ai i ni nai aso o le vaiaso mo le lua masina. E ese mai lena mea, sa ou galue i le au epikopo a le uarota.

O se tasi na o taimi na sili ona aoga i lo'u olaga. Ou te le iloa pe na ou faaaogaina lelei atoa le 24 itula o le aso e pei ona ou faia i lena vaitaimi.

Na faamanatu mai e Peresitene Gordon B. Hinckley (1910–2008) ia i tatou faapea ua i ai se tatou tiute-tauave i lo tatou aiga, i lo tatou pule o falefaigaluega, i le Alii, ma ia i tatou lava.

E faapefea ona tatou faapaleniina na tiutetauave? Sa saunoa mai Peresitene Hinckley: “Ou te le manatu e faigata lena mea. Sa ou galue i le tele o tofiga i lenei Ekalesia. O a'u o se tamā o se fanau e toalima, sa laiti ma tuputupu ae a'o ou galue i na tofiga eseese. . . . Sa ma fiafia i le olaga. Sa faia a matou afiafi faaleaiga. Sa matou faia le mea na faamoemoe mai le Ekalesia ia matou faia.”²


Fiafia e oo i le luga

O le tumau e oo i le iuga e le o faatatau i le faamaeaina o se lisi o mea e fai a le talalelei ona fai atu lea: “Ua ou lelei. Pau lava la'u mea e fai i le taimi nei o le agai i luma e aunoa ma se taumafaiga ma faatumauina.” Nai lo lena, e faatatau i le faaauau pea o le aoaoina ma le tuputupu ae. O le

talalelei a Iesu Keriso e faatatau lava i le salamo faifaiepa ma suia—o se taumafaiga faifaiepa ma e le faigofie.

Fai mai le Tupu o Peniamina, “Ma ia vaai ia faia nei mea uma i le potu ma le faatulagaga lelei; ona e le tatau i se tagata ona momo'e televave atu nai lo le malosi ua ia te ia” (Mosaea 4:27).

Ua taliaina e nisi o tagata o le Au Paia o Aso e Gata Ai lenei fuaitau o se faamaoniga mo lo latou le naunau e taumafai malosi po o le faia o le mea



sili latou te mafaia. O le faafitauli, ua latou taulai atu i le na o le afa muamua o le fuaitau.

O le afa lona lua lea: “e tatau ia te ia ona filiga, ina ia mafai ona manumalo o ia i le tau; o lea, e tatau ona faia mea uma i le faatulagaga tatau ai.” O le tuufaatasia o afa e lua e faamani-noina ai le uiga moni lava o le faia o mea i le potu ma le faatulagaga tatau.

Sa faailoa mai ia te a'u e se uo taalavou se mea mataina ua ta'ua o le *matagi lona lua*, o se lagona o le toe

faafouina o le malosi lea e avatua ia te oe le malosi e faaauau ai e tusa lava pe ua e lelava.

I le sailia o se matagi lona lua i isi vaega o le olaga, sa tau mai ai e la'u uo “I le aveai ai ma se tagata aoga i le kolisi, e mafai ona matua faigofie lava le sau i le fale mai le leva o le po ma faia se 'alofaga ua matua vai-vai lava e fai ni tatalo po o le faitau o tusitusiga paia po o le asiasi soo atu i le malumalu. E mafai ona tele naua ni 'alofaga mo le le faia o nei mea, aemaise lava mo ni tagata aoga i le kolisi. Ae i le iuga, e manaomia lo tatou

sailia o lo tatou matagi lona lua ma faia na mea laiti.”

Atonu nai lo le *tumau* seia oo i le iuga, e mafai ona tatou sailia la tatou matagi lona lua—o tatou matagi faaleagaga—ma *fiafia* e oo i le iuga. Ou te molimau atu e mafai ona tatou faia lena mea pe a tatou mulimuli i musumusuga mai le Agaga Paia, filifili le lelei nai lo le leaga, ma faapaleniina a tatou tiutetauave. ■

Mai se saunoaga i le faigalotu, “These Are Your Days,” na tuuina atu i le Iunivesite o Polika Iaga-Idaho i le aso 9 o Iuni, 2015. Mo le tusiga atoa i le gagana Peretania, alu i le web.byui.edu/devotionalsandspeeches

FAAMATALAGA

1. Tagi Ezra Taft Benson, “O le Poloaiga Sili—Alofa i le Alii,” *Liahona*, Iulai 1988, 4.
2. *Aoaoga a Gordon B. Hinckley* (1997), 724.

O le Faamaoni ia te Au Lava—ma i le Atua

Saunia e Faith Sutherlin Blackhurst

Pe a ma le afa o lau misiona, sa ma tauivi ai ma lau soa ina ia matou galulue lelei ma le ma taitai misi-ona o le uarota. Sa i ai ni feeseeseaiga eseese, o lea sa tonu ai ia i ma'ua e talanoa i le epikopo e iloa ai le mea e tatau ona matou faia. I le taele o [lo'u] loto, sa ou faamoemoe ai ia tau lava o le talanoa i ai o le epikopo ma faaleleia o matou faafitauli mo ma'ua.

Ae nai lo o lena, sa ta'u mai e le epikopo ia te au, sa ou faamaualuga ma soona saili masei i isi. Sa ou alu faalii i le fale ma le lagona le malamalama ma le le fiafia—e mafai faapefea ona ia fai mai faapela e uiga ia te au? Pe sa popole ea o ia i o ma'ua luitau i le faasoaina atu o le talalelei?

A o ma savavali, sa faapa atu ou lagona i lau soa. Ae sa faafuasei lava ona oo mai se fuaitau i lou mafaufau: “e ave e tagata ua sala le upumoni o se mea faigata” (1 Nifae 16:2). Sa faapea ona taofi ai ou mafaufauga. Sa manino ia te au na oo mai lea manatu mai le Agaga. O lo'u faamaualuga na taofia ai au mai le taliaina

o le aoaiga a le epikopo o se mea moni—ae mata e mafai moni ona ou finau i le Agaga Paia?

Sa ou sala, ma sa faasino mai e le Alii ia ou iloa ai.

Aveesea o le Tauamiotonuina o Au Lava

O le taimi lena, sa matuai faaosoosoina lava le aua nei ou ano i mea sa sese ona ou faia. Sa ioe foi Peresitene Dieter F. Uchtdorf, o le Korama a Aposetolo e Toasefululua. “E leai ma se tasi o i tatou e fia tautino atu pe a tatou se ese mai le ala sa'o.”

“. . . O lea, a tatou suesueina o tatou olaga, tatou te vaavaai lava i o tatou lava manatu faaletagata, o 'alofaga, ma tala tatou te faamatala ia i tatou lava ina ia faamaonia ai o tatou manatu ma amioga lē agavaa.”¹

I lou tulaga, sa ou faatalitonuina au lava e faapea, sa ou faasea mo le manuia o le galuega faafaifeautalai i le matou eria. Ma nai lo le taliaina o le tautua faamaoni a le taitai misi-ona o le matou uarota—e ui sa foliga mai ia te au e le atoatoa—sa faafuasei

O lou faamaualuga na taofia ai au mai le taliaina o le aoaiga a le epikopo o se mea moni—ae mata e mafai moni ona ou finau ma le Agaga Paia?

ona ou iloa sa ou le loto faafetai, le onosai, ma o le mea moni, sa [ou] le agalelei. Ona o le uunaiga a le Agaga, sa mafai ona ou iloa ai au amioga i le tulaga moni sa i ai.

O Se Iloiloga Faaleagaga Faamaoni

O le mauaina o se aoaiga tuusao faapena mai le Agaga sa tiga, ae o se auala sili ona aoga. Sa ou iloa ai, e tatau ona ou faamaoni ia te au lava e uiga i ou faaletonu.



Ae peitai, afai e lava lou toa ia agavaivai ma ioe i ou vaivaiga ma le lotomauualalo, e mafai e le Atua ona fesoasoani ia te au e liliu i latou i ni malosiaga e ala i Lona alofa tunoa (tagai Eteru 12:27, 1 Peteru 5:5).

O le mea a ia, o le faailoaina faamaoni o o tatou vaivaiga—po o le vaaia o i tatou lava i o tatou tagata moni—o le laasaga muamua lea i le ala o suiga lelei. Ao faaauau ona ou faamaoni ma saili le taitaiga mai le Agaga, o le a fesoasoani mai lo'u Tama Faalelagi ia ou iloa mea e manaomia ona suia o lo'u olaga. Ma ao ou faalagolago ia Iesu Keriso, Lana Togiola, ma Lona mana faamama, o le a ou vaaia le alualu i luma ia te au lava.

E ui lava ina sa le manaia le ioe i au measese i lena taimi o le aoaiga, ua ou iloa pe a ou filifili e lotomauualalo ma faamaoni ia te au lava ma i le Atua, e sili atu lou fiafia ma sili atu ona ou taliaina au lava. Ua ou iloa e ui lava i ou faaletonu, e faalelagi lou taua i lo'u Tama Faalelagi—ae e finagalo lava o Ia ia ou alualu i luma. E ala i le mana o Lona Alo o Iesu Keriso ma le salamo faamaoni, e mafai ai ona ou matuai lelei atu nai lo o le tagata e mafai ona ou moemiti e avea ai. ■

E alala le tusitala i Iuta, ISA.

FAAMATALAGA

1. Dieter F. Uchtdorf, “Le Alii e, O Au Ea?” *Liahona*, Nov. 2014, 58.
2. Larry H. Lawrence, “Se A se Mea o toe Ou Te Lei Faia?” *Liahona*, Nov. 2015, 35.
3. Dieter F. Uchtdorf, “Le Alii e, O Au Ea?” 58.

Sa ou iloa patino ai, e mafai ona avea le Agaga ma au uo maoae i le faagasologa. Sa ou lagona na pei sa saunoa sao mai lava ia te au ia Elder Larry R. Lawrence o le Fitugafulu, ina ua ia valaaulia tagata o le Ekalesia e “ole atu ma le faamaualalo i le Alii i le fesili lena: ‘O le a se mea o taotomia ai lou alualu i luma?’ . . . Afai o e faamaoni,” sa ia fai mai ai, “o le a vave ona manino mai le tali. O le a avea ma faaaliga na faamoemoeina

mo nao oe lava.”² Sa ou iloa sa ia te au le mana e le gata e maua ai uunai e uiga i o'u vaivaiga ae faapea foi ona faaleleia ai.

Mai Vaivaiga i le Malosiaga

O lo'u aafiaga sa aoaoina ai au “afai e tumau pea le natiaina o [o'u] vaivaiga ma lē atoatoa, ona le mafai lea e le mana togiola a le Faaola ona faamaloloina na vaivaiga ma avea i latou ma malosiaga.”³

MATA O LE A LE MANAIA LE AUALOFA?

Sa matuai ou popole lava e auai i le Aualofa, ae ona o le auala sa latou faafeiloaia ai au, sa ou aoao ai e fiafia i ai.

Saunia e Charlotte Larcabal

Mekasini a le Ekalesia

na ua atoa lo'u 18, sa mautinoa lava lou fiafia e uiga i ai. O ai se talavou e le fiafia i ai? E moni, sa ou i ai lava i le aoga maualuga, sa i ai lava ou fuafua, ma sa tatau pea ona fai au feau i le fale o le matou aiga i Kalefonia, ISA, ae ua avea au ma se tagata matua. Sa ou ulufale atu i se vaega fou atoa lava o le olaga, ma sa ou fiafia e uiga i ai. O le mea sa ou le fiafia moni ai, o le manatu lea o le i ai faatasi ma "fafine matutua" uma i le Aualofa. Sa i ai a latou fanau ma galuega ma Ulo Iila ma atonu e fiafia e tao pai i seevae tosotoso mafanafana. Sa i ai au meaaoga e fai i le fale ma tauvaga aau ma vali atigilima lanumoana, ma ou te fiafia e 'alo mai le tapenaina o lo'u potu i le umi e mafai ai. E mafai faapefea ona ou fesootai i se tasi iina? Sa ou mautinoa o le a le lagolelei, tuuatoatasi, ma le manaia. Ona ou alu ai lea.

O le mea muamua lava, o le Aualofa sa le faapea e le manaia. Sa i ai le tele o le ataata ma taliega. Sa latou faasoaina ni manatu matagofie ma le moni aiai, ae sa latou le fefefe foi e talie. O le mea lona lua, sa lei ese i latou mai ia te au. E moni, sa matutua atu nai lo au, ae sa latou tausua solo i le tasi ma le isi i le auala lava e tasi na matou tausua ai ma au uo. E silia i le faa-tasi ona fesiligia e se tasi le fesili

tonu lava sa ou mafaufau i ai. Ma ina ua latou faasilasila mai le fonotaga faatamaoaga o le vaiaso lena, sa ou te'i. Sa latou aoaoina le [fusu] mo le puipuiga o le tagata lava ia! Sa ou manao e fai le mea lena.

Sa matuai ou popole lava ina ua fai mai Sister Larsen, le Peresitene o le Aualofa ou te tu i luga e faailoa atu au, ae sa le leaga foi lena mea. Sa ataata uma mai tagata ia te au. Sa faalala i luga e Sister Edward, o lo'u faiaoga seminare i le tausagalua, ia ona limamatutua ia te au, ae sa fai mai Sister Richard, o le sa manatuaina au mai le Peraimer, e le talitonu ua ou "[teine] matua." Ma sa latou taulimaina au e pei "o se [teine] matua." Sa ou lagona le pei o se tamai teineitiiti sa taaloalo i le ofuina o ofu lelei, ae i le toatele o tamaitai i lena aso, o au o se uso fou.

Talu mai lena aso, ua ou fiafia ai lava i le Aualofa, e tusa lava po o le a le uarota ou te i ai. O le taimi lava ou te savali atu ai i totonu o le potu o le Aualofa, ou te lagonaina: lena sootaga faaleuso ma le lagona o le auai ai. Ou te fiafia e fai le mea sili ou te mafaia e siitia ai ou uso o le Aualofa ma aoao uma mai ni mea ou te mafaia mai ia i latou.

Ma sa iloa ane ai, e fai foi si ou feololo i le faiga o pai. ■





“Ia faapelepele le tasi i le isi, vaavaai e le tasi le isi, faamafanafana e le tasi le isi ma ia maua aoaoga po o faatonuga, ina ia mafai ai ona tatou nonofo uma faatasi i le lagi.”

—Lusi Maki Samita, tina o le Perofeta o Iosefa Samita (i le *O Afafine i Lo'u Malo: O Le Talafaasolopito ma le Galuega a le Aualofa* [2011], 25).

O LE A TONU LAVA LE AUALOFA?

O le Aualofa sa faavaeina e le Perofeta o Iosefa Samita i le aso 17 o Mati, 1842, i Navu Ilinoi. E lua ni faamoemoega autu o le faalapopotoga: ia tuu atu le toomaga mo e matitiva ma lē tagolima ma ia aumai tagata ia Keriso. O loo faaaauu pea le Aualofa i aso nei, o se tasi o faalapopotoga aupito toatele o tamaitai i le lalolagi. E mafuta faatasi uso i le Aso Sa ma i isi nofoaga pe a manaomia.

O MEA E FAAMOEMOE I AI I LE AUALOFA

- O se vaega o tamaitai o e o le a alolofa ma lagolago ia te oe.
- O le avanoa e alofa ma auaua atu ai i isi tamaitai i le avea ai o se faiaoga asiasi.
- O lesona i Aso Sa ma isi faatasiga o le a fesoasoani ia te oe i lou olaga patino ma tuuina atu avanoa e auaua atu ai ma atinae ai ou matafaioi o se tamaitai, afafine, uso, teine o se aiga, ma/ po o se tina.

O LO'U ASO MUAMUA

I LE KORAMA A LE AU TOEAINA

Sa ou laititi, ma o se toeaina fou lava. O le a se mea sa ia te au e ofo atu i le korama a le au toeaina? Sa iu ane, e tele lava!



“O se tiute e ao ona tuuina atu saoloto e tagata uma o le Au Paia i ona uso—ia alofa ia i latou e le aunoa ma fesoasoani ia i latou. . . . E tatau ona tatou asiasi atu i e ua matuaoti ma fafine ua oti a latou tane i o latou mafatiaga.”

—Iosefa Samita, (Aoaoga a Peresitene o le Ekalesia: Iosefa Samita [2007], 426)

Saunia e Dallin Luedtke

Ou te lei popole moni i le auai i le korama a le au toeaina, aua na ou lagonaina e pei sa ou iloaina lava le mea e tupu. Sa ou iloaina foi tagata uma o loo i totonu o le korama a le au toeaina a la'u uarota. Sa i ai tama o au uo ma alii ua ou tepa taulai atu i ai o ni faufautua. Sa ou iloa sa latou fiafia e fesoasoania ou malamalama i mea, ina ia le o se mea taufaafefe le auai ma i latou i le korama a le au toeaina.

O le mea sa fai ai sina matafefe o le saofaga i lesona. O le taimi muamua sa faigata ona taumafafau e mafai ona ou ofoina atu se mea i alii o e ua anoanoai o latou aafiaga i le olaga ma matuai tele lo latou atamai nai lo au.

Sa Ese, Peitai e Tutusa

O le korama a le au toeaina e mautinoa lava le ese mai le korama a ositaulaga. Nai lo o se vaega o tama o lau tupulaga, ua faafuasei lava ona e i ai ma tagata matutua. O nai taimi muamua e lua na ou alu ai, sa tau leai ni au tala na fai atu. Sa ou popole sa ou laitiiti tele ma sa le lava ni mea na ou iloa e saofaga ai.

Ae o le faatele lava ona ou alu i ai, o le tele foi lea o lo'u lagolelei ua i ai, ma o le tele foi lena o lo'u iloa e faapea, e le afaina po o le a lou matua, e tofu tagata uma ma se mea e saofaga ai. E eseese uma lava aafiaga o tagata i le talalelei ma e eseese foi le maualuga o malamalama o tagata e uiga i mataupu faavae eseese.

Sa la te Au se Mea e Faasoia Atu

I se tasi o taimi sa matou talanoa ai e uiga i le Togiola a le Faaola ma

sa sii lo'u lima. Sa na o lou fai atu lava e faafetai i Lana Togiola, ua le gata ina faasaoloto ai e Iesu Keriso i tatou, ae e mafai foi ona fesoasoania tatou latalata atili atu ai ia te Ia ma i le Atua. Sa ou talanoa e uiga i lo'u sootaga ma le Tama Faalelagi ma Iesu Keriso, ma le ala ua faamalosi a o tuputupu ae lo'u malamalama i le Togiola. Ina ua uma le vasega, sa sau se alii ia te au ma faafetai mai mo ou manatu na faaalua. Sa fai mai o ia, sa lei mafafau lava e uiga i mea i le ala na ou tau atua ia i latou ma talisapaia moni lo'u malamalama.

E Manaia le Faiaoga o Aiga!

I le korama a le au toeaina, e le nao lou aoao mai se faiaoga; e te aoao mai foi i le Agaga ma isi tagata uma i le korama. O lena vaaiga ato e fesoasoania e te maua ai le malamalama atili i mea o loo aoaoina ai oe. Ma e fesoasoania lena e avea ai oe ma se auauna e sili atu a le Alii. Mo se faataitaiga, talu lava ona avea au ma se toeaina, ua amata ona faateleina lou fiafia i le faiaoga o aiga! Ou te manatu ua ou faatauaaina teisi atu aua ou te iloa a avea au ma se faifeautalai i ni nai masina, o le a ou asiasi i tagata ma faasoia atu savali o le talalelei ia i latou e pei lava ona ou faia pe a ou faia faiaoga o aiga. Nai lo le na o le saofai iina ae tuu i lau soa na te faia uma le aoaoga, ua amata ona ou saunia mo a maua asiasiga. Ou te faamautinoa e fai sa'u tala. Ou te iloa o se tapenapenaga lelei lea mo la'u misiona, ae ua ano atili ai faiaoga o aiga ia te au. Ua i ai nei sou talisapaia sili atu mo

O MEA E FAAMOEMOE I AI I LE KORAMA A LE AU TOEAINA

- O lesona i Aso Sa lea e fefaa-soaai ai tagata o le korama i malamalama ma manatu o le a faamalosi ai a lau molimau ia Iesu Keriso ma Lana talalelei, ma o le a fesoasoania e te saunia ai mo au matafaioi i le lumanai o se tane, tama, ma se taitai perisitua.
- O avanoa e tuuina atu auaunaga faaleperisitua o le a faamanuia ai lou olaga ma faamalosi ai noataga i le tou va ma tagata o le korama.
- O le a avea oe ma se vaega o le korama lea o le a lagona ai oe ao e aoao i ou tiutetauave fou o se e umia le Perisitua Mekisateko.

tagata o la'u uarota ma tagata ou te faiaoga o aiga ai.

Afai E Mafai Ona Ou Faia, E Mafai Foi Ona E Faia

E le tatau ona e lofituina i le korama a le au toeaina, ae e mautinoa lava e mafai ona e tulimatai atu e faalogologo i ni atamai se tele e uiga i autu o loo e aoao i ai. E mafai ona e tulimatai atu e avea ma se faiaoga, taitai, ma se auauna lelei atu a le Alii. Ma e ese le manaia o lena mea! ■

E alala le tusitala i Kalefonia, ISA.

Fesoasoani Faaopoopo


Saunia e Allie Arnell

Sa ou faasolo i lalo i lau lava saosasoa. Lima futu (1.5 m) . . . sa ou faalogoina lou minoi laitiiti i le tafe. O lenei ua sefulu futu. Sa faafuasei lava ona pogisa. Sa ou lagona ina le pupuu o au manava. O le vasa malulu ma le gepu sa leai se mea na pei ai o le vaitaele sa matou faataitai ai. O le fefe ma le popole i ou omia, sa ou alu ae faatopetope ai i luga o le vai.

“O le a le mea ua tupu?” sa fesili mai ai le faiaoga lagolago ia te au. Sa amata ona ou tagi i totonu o lau mea manava. Sa ou i ai i le ogatotonu o le suega mo le faamaoniga o le mauulu ma le faguea, e faatino ai se alu i lalo i le 30-futu (9 m), o se tasi o tomai manaomia ia pasi ai le suega. Sa iloa mai e le faiaoga lagolago lou popole ma faamautinoa mai ia te au o le a le afaina. Sa faamalosiāu mai o ia, ae sa lei faamalosiā. I se tasi o vaega, sa ia fai mai ai, ‘E te le tau faia lenei mea.’ O iina na ou iloa ai sa ou manao e fai.

Sa ou iloa ina, e ui ina sa faigata lea mea mo au, sa ou manao e ausia; sa ou manao e maua lau tusi faamaonia. O lea sa ou pulea ai lou fefe ma faamaea ai tomai na totoe faatasi ma le vasega ia pasi ai le suega. Sa faigata, ae faatasi ai ma ni faamalosiāuga sa mafai ai ona ou faia.

O ni masina mulimuli ane ao ou auauna atu o se faifeautalai i Peru, sa ou manatua ai lou aafiaga faigata



i le mauulu ma le faguea, ao ou valaauliaina tagata e faamalolosiā o latou faatuatua ma sui o latou olaga. O se tasi o aiga e faapitoa ona ma fiafia ma lau soa e asiasi i ai o le au Rumay. O Carina ma Enrique ma le la fanau teine talavou e toalua o Karen ma Nikola, sa masani ona faafeiloaia i maua ma sa vave lava ona ma alolofa i ai. E lei leva ae talia loa e Carina, Karen ma Nikola le talalelei ma auai i le ekalesia.

Ae peitai, sa manaomia e Enrique sina fesoasoani faaopoopo. O le ma savali sa ese mai le mea sa masani

ona ola ae ai o ia, o lea sa tau umi teisi ai ona ma maua lona talitonuina o i maua. Sa i ai ni atugaluga eseese o Enrique. O le vaega autu o le talalelei na fai ma faafitauli ia te ia o le Tusi a Mamona. E lei faalogo muamua o ia i lenei tusi, ma sa faigata ia te ia ona faitau ma malamalama i ai. O lona le masani ai sa lagona ai e Enrique lona le mautinoa.

I le itu la lena, sa pei ai Enrique o au ina ua ou toe foi i luga o le vai: sa foliga mai sa faigofie ona femaulu i lalo isi tagata uma, ao ou malo ai i le fefe. E pei foi o au, pau lava le mea na

I lau misiona, atonu e te feiloai ai i tagata sailiili o e manaomia se tasi i o latou tafatafa, e naunau e mau i le faagasologa faatasi ma i latou.

manaomia e Enrique ia faamanuiaina ai o sina fesoasoani faapoopo.

O lenei fesoasoani sa oo mai ia te ia i ni ituaiga eseese. Sa ia te ia faifeautalai e fesoasoani ia te ia e faailoa ona atugaluga ma lagona le Agaga. Sa ia te ia foi tagata o le uarota o e sa faa-aumeaina o ia ma aoaoina o ia e uiga i lona matafaioi o se tama. Ae o le fesoasoani aupito tele lava, o le aiga lava o Enrique ia.

Ao lei oo foi i o latou papatisoga, sa faia ai e le au Rumay se masani o le faia o tatalo faaleaiga ma le suesueina o tusitusiga paia. Sa latou avatu ia Enrique se seti o tusitusiga paia e lapopoa teisi anotusi ma se lomiga e faalogologo i ai ina ia mafai ona faafaigofie ai lona suesueina o le Tusi a Mamona. O na taumafaiga faatauvaa sa matuai fesoasoani lava ia Enrique. E lei i ai lava se taimi sa faamalosai ai o ia e se tasi; sa na ona latou lagolagosua lava ia te ia. E ala atu ia latou faatinoga, sa latou tau atu ai ia te ia “Matou te iloa e mafai ona e faia leni mea.”

O lenei fesoasoani na mafai ai e Enrique ona iloa mo ia lava le mana o le Tusi a Mamona. I se tasi o aso, sa ia faailoa mai ai sa faalogologo i le tusi atoa ma ua ia iloa o le afioga a le Atua. Pe a ma le fa masina talu ona mavae le papatisoga o lona faletua ma ona afafine, sa uia ai e Enrique lea lava laasaga e tasi ma papatisoina foi.

Fai mai Enrique, e faafetai mo le fesoasoani ma le onosai sa ia maua

na mafai ai ona oo i le mea ua i ai o ia i le aso. I le avea ai ma se faifeautalai, sa ou lagonaina le faamanuiaina e molimauina le faataitaiga a lenei aiga o le alofa ao latou fesoasoani i le latou tane ma le tama e faatoilalo ona masalosaloga. Sa ou faafetai foi ona o lou aafiaga i le luitau o le mauu ma le faguea, lea na mafai ai ona ou malamalama i se auala itiiti i lagona o Enrique ma lagona o isi tagata sailiili i le taimi o le faagasologa o le liuaina.


Ao e valaaulia tagata e salamo ma sui i lau misiona, ia manatua o nisi taimi na pau lava le mea e manaomia

e tagata ia faamanuiaina ai o sina faamalosiuga faapoopo. Atonu latou te manaomia se tagata e faatuatua ma potomasani i lo latou itu e fai atu, “O le a le afaina. Ou te iloa e te mafaia. Ou te matuai talitonu ia te oe.” Atonu o loo latou faamoe-moe o le a avea oe ma lena tagata o le e naunau e mau faatasi ma i latou i le faagasologa, fesoasoani ia latou masani i faiga ma tomai fou, ma fesoasoani ia maua o latou faamaoniga, o le faamaoniga mulimuli lea a le Alii. ■

E alala le tusitala i Iowa, ISA.



O LA TATOU AVANOA



OOTIA E ALA I UPU A SE PEROFETA SOIFUA

INA UA 15 OU TAUSAGA, sa ou vaai i ni faifeautalai se toalua i luma o se faleoloa supamaketi. Sa valaaulia au e le tasi o i laua ou te sau i le lotu. Ou te lei manao tele i ai, o lea sa ou fai atu ai ia i laua, “Atonu i se aso,” ma savali ese.

O le aso na sosoo ai, sa valaau mai ai le uso o lou tina ma fai mai i lou tina e alu atu i lona fale e faalogologo i se savali faapitoa. Sa ma taufetuli atu ma lou tina ma vaaia ai faifeautalai ia na ou vaai i ai i le aso na mua-mua atu o saofafai mai i totonu o le fale o le uso o lou tina! Sa fafia lou tina i le la savali ma o lea na amata ai ona ou faalogologo foi i ai. Ae peitai, ina ua fesili mai faifeautalai ia te au pe ou te talitonu i se perofeta soifua, sa ou tali atu ma se leai mausali. Sa uu ae e se tasi o alii faifeautalai se ata o Thomas S. Monson ma molimau mai o Peresitene Monson o se perofeta. Sa laua valaaulia au ou te sau i le konafesi aoao i le aso e sosoo ai e fai ai lau lava

filifiliga. O le fia iloa, sa ou malie ai ou te sau.

O le aso na sosoo ai, sa matou taunuu atu i le falelotu i le taimi tonu ao tau faaiuiu le tatalo amata. Ao ou savali atu i totonu o le potu, sa ou vaaia le faaali mai o Peresitene Monson i luga o le lau. Sa ia ataata ma fai mai, “Ou uso e ma tuafafine pele, ou te faafeiloai atu ia te outou . . .”

O le taimi lava na matala ai le fofoga o Peresitene Monson, na oo mai ai i ou luga se lagona malosi, e faamautu mai ai o ia lava o se perofeta a le Atua. I le faaiuga o le konafesi, sa ou fai atu i faifeautalai, “Ua ou fia papatiso.” Talu mai lena taimi, na ou auauna atu i se misiona ma aoaoina le toatele o isi i upumoni matagofie o le talalelei toefuataiina.

Ou te iloa ua faamanuiaina i tatou e le Atua e ala i le toe valaauina o perofeta. E alofa le Atua ia i tatou ma e fetalai mai ia i tatou e ala i perofeta o onaponei. ■

Macon B., São Paulo, Pasila

E mafai faapefea ona tatou lagolago i perofeta ma aposetolo?

1. Tatalo mo se moli-mau e faapea, ua valaauina i latou e le Atua e avea ma Ana perofeta e aoao le lalolagi (tagai Ieremia 1:5, 7).
2. Alolofa ma tatalo mo i latou.
3. Lagolago i latou, e tusa lava pe le lauiloa.
4. Suesue i a latou aoaoga ma a latou faataitaiga.
5. Mulimuli ia i latou. Talitonu i mea latou te saunoa mai ai, ma taumafai e fai mea latou te aoao mai (tagai MF&F 21:4-6).

OU TE LE MA


AO OU AOGA I SE AOGA NOFOTUMAU, sa matou nonofo faatasi ai ma isi tamaiti aoga. Sa ou faia le mea sili e ola ai i mataupu o le talalelei e ala i le tatalo ma le suesue o tusitusiga paia i le tele o taimi.

I se tasi o aso, sa matauina mai ai e se tasi o le matou vasega lou suesueina o le Tusi a Mamona i luga o lou moega. Sa amata ona ia lisiina ma le ita ia auala uma sa ia manatu na sese ai lau lotu. Ona ia fai atu lea i isi tagata uma o le nofotumau e uiga i ou talitonuga e “ese lava.” Sa amata e nisi o lau vasega ona ulagia au ma lau tapuaiga; ae o isi nao le aloese ma au. Sa iu ina ou nanaina lau Tusi a Mamona i lalo o se atigipusa o ou lavalava ma suesue ai nao le Tusi Paia ina ia taofi ai le taufaaililili o tagata o lau vasega ia te au.

Sa ou suesue pea i le Tusi Paia seia oo ina ou tau i le Roma 1:16, lea o loo folafola mai: “Aua ou te le ma i le tala lelei a Keriso: aua o le mana lava lea o le Atua e ola ai i latou uma o e faatuatua.” Sa ou iloina e ala i le nanaina o le Tusi a Mamona, sa ou tau atu ai i tagata o lau vasega sa ou ma i ou talitonuga. Sa ou toe aumaia lau Tusi a Mamona ma ole atu i le Tama Faalelagi mo le faamagaloga. Ona ou alu atu lea i lau tupulaga ma tuu atu i ai lau molimau e uiga i le talalelei toefuataiina. O le toatele o i latou sa tuu le ulagia o au ma toe avea ma au uo.

Ua ou iloa e malamalama le Atua i tofotofoga tatou te uia. A tatou tutu atu mo o tatou talitonuga ma faaali atu tatou te “le ma i le tala lelei a Keriso,” o le a Ia tuuina mai ia i tatou Lona mana, puipuiga, ma le taitaiga. ■

Pamela O., Abuja, Nigeria



AUAUNA ATU E ALA I LE SAINI

INA UA ONO MASINA O LOU MATUA, o lau faailo muamua lava o le “susu” ma, o ni nai vaiaso mulimuli ane, sa ou faaleoina ai le [upu] “panda.” E mafai ona ou faalogo, ae o lau gagana muamua o le Gagana Faifaaailoga Amerika. Sa auauna atu lou tina i se misiona GFA ona faaaauai ai lea ona suesue i gagana faifaaailoga i le aoga, ma sa manao o ia ia ou iloina foi.

Ua avea le gagana faifaaailoga o se faamanuigiaga maoae i lou olaga. Ua mafai ai ona ou vaai ma aoao le tele atu o mea nai lo o mea e mafai ona ou aoaoina pe ana aunoa ma lea. Na te aumaia faatasi ai tagata. Ou te fiafia i le mafai ona ou aoao atu i tagata mea ua ou iloa e ala i aoaoga faitaitoatasi ma le tuuina atu o aoaoga i aoga ma i le lotu. E ese foi le manaia o le matamata faatasi ma lou tina i le konafesi aoao ma isi vitio a le Ekalesia i le gagana faifaaailoga.

O le i ai o le gagana faifaaailoga i lou olaga ua avea o se mea maoae e fausia ai [lau] molimau. Ua mafai ona ou masani i le toatele o fanau a le Atua nai lo le mea e i ai pe ana aunoa ma lea, ma o se meafaigaluega lelei tele e faaoga o se auaunaga mo isi. Ou te faafetai mo lenei meaalofa i lou olaga ma mo tagata ofoofogia ua mafai ona ou feiloai i ai ma aoao mai ai. ■

Israel H., Oregon, USA



FAI MAI LEA ITULAU MA LEA ITULAU MATOU TE TALITONU

Ina ua fai mai se tasi o lau vasega o Mamona e le talitonu ia Keriso, sa tonu loa ia te au e faitau le Tusi a Mamona i se auala e fou atoa.

Saunia e Richard M. Romney

Mekasini a le Ekalesia

“**O** Mamona e le o ni Kerisiano.”
O le faamatalaga mai se tasi o lau vaega i le aoga maualuga na faateia ai au.

“Ioe o matou o [Kerisiano],” sa ou fai atu ai.

“Aisea la tou te faitauina ai le Tusi a Mamona?” sa ia fai mai ai ao savali ese atu, ma sa leai se avanoa ou te tali atu ai.

Sa ou mafaufau soo i lenei fesili. O le tali o le, ioe, o Mamona o ni Kerisiano ma o le Tusi a Mamona o se tasi lea o molimau ia Iesu Keriso. Tatou te faitauina faatasi ma le Tusi Paia e aoao atili ai e uiga i le Faaola.

Sa ou faitauina muamua le Tusi a Mamona. Na ou iloa ina e moni. Ae ona o le fesili a le tagata o lau vasga, sa ou lagonaina ai le uunaiga e susue i ai i se auala fou, ma matauina pe faafia ona taua ai Iesu Keriso. A o ou faia, sa ou maofa lava.

E lei leva ona ou susueina le tusi ae ou faitau i le itulau autu o le Tusi a Mamona ua tusia e faatalitonu ai le au faitau “o Iesu o le Keriso, o le Atua

Faavavau, ua faaali mai o ia lava i atunuu uma.”

O le faatomuaga o le Tusi a Mamona, sa ou faitau ai “O mea aupito sili ona taua na tupu ua faamaumauina i le Tusi a Mamona, o le auaunaga patino lea a le Alii o Iesu Keriso i totonu o tagata sa Nifaē, ina ua mavae Lona toetu mai.” Fai mai, o

i latou o e e mauaina se molimau paia mai le Agaga Paia ua moni faamaumauga, “o le a latou iloa foi e ala i lea lava mana o Iesu Keriso o le Faaola o le lalolagi.”

Sa ou susue atu i “le Mau a Molimau e Toatolu,” lea na faapea mai, sa faaali atu e se agelu ia i latou ia papatusi ia na faaliliuina mai ai le Tusi a Mamona,



O LAU LAVA SUESUEGA

Ao e suesue i le Tusi a Mamona, e faigofie ai ona e aoao e uiga ia Iesu Keriso. E mafai ona e tusia ni faamatalaga pupuu ao e faitau pe faaaoga fesoasoaniga mo suesuega e pei o le Taiala i Tusitusiga Paia, lea o loo lisi ai le tele o mau o le Tusi a Mamona ia Iesu Keriso. E moni lava o le Tusi a Mamona o se tasi molimau ia Iesu Keriso.



ma “ua matou iloa foi o le alofa tunoa o le Atua le Tamā, ma lo matou Alii o Iesu Keriso, ua matou vaai ma molimau atu ai ua moni ia mea.”

O le isi na sosoo ai, “O Le Molimau a le Perofeta o Iosefa Samita” na faamatala ai le asiasiga a le agelu o Moronae, o le sa fai mai o le Tusi a Mamona o loo i ai le atoatoaga o le talalelei tumau faavavau “e pei ona tu’uina atu e le Faaola i tagata anamua” o Amerika.

Ou te lei oo i le 1 Nifae ae o lea ua tele mea ua ou maua!

Sa faaauau lau sailiiliga. I le 1 Nifae, sa ou maua ai, sa iloa e Liae e uiga i le afio mai o le Mesia (tagai 1 Nifae 1:19). Sa ou faitau i ana valoaga e uiga i le Togiola, “o lē o le a aveesea agasala a le lalolagi” (1 Nifae 10:10; tagai fuaiupu 4–10). Na ou faitau i le faamatalaga a Nifae i le soifua mai o Iesu Keriso, Lana auunaga, maliu, Toetu, ma le asiasiga i le lumanai i Amerika anamua (tagai 1 Nifae 10–12).

Sa ou faitau i valoaga e faapea, o le Tusi a Mamona o le a faamautuina upumoni o le Tusi Paia e faapea, “o le Tamai Mamoe a le Atua o le Alo

lea o le Tamā Faavavau, ma o le Faaola o le lalolagi; ma e ao i tagata uma ona o mai ia te ia” (1 Nifae 13:40).

Ma sa ou faitau i le molimau a Nifae e faapea, “o le a nonofo saogalemu atunuu, ituaiga, gagana, ma tagata uma i le Paia e Toatasi o Isaraelu, pe afai latou te salamo” (1 Nifae 22:28).

E uma ane le aso e tasi, ua ou oo i le itulau e 53. Na faatoa ou faaumaia lava le nao le *tasi* o tusi i le Tusi a Mamona, ae oka se mamana o molimau ua uma ona ou mauaina!

I vaiaso na mulimuli mai ai, sa ou maua ai lea itulau ma lea itulau o molimau ia Iesu Keriso, o faaaliga vaaia ia sa faaali mai ai o Ia i perofeta, ma le faamatalaga auiliili o Lana galuega i tagata o Amerika anamua. Sa faamaeaina lau faitauga i le molimau mamana a Moronae e uiga ia Iesu Keriso (tagai Moronae 9); o lana luitau ia, “ole atu i le Atua, le Tama

Faavavau, *i le suafa o Keriso*, pe moni [le Tusi a Mamona]” (Moronae 10:4; ua faaopoopo le faamamafa); ma, i le itulau mulimuli, o lana valaaulia agavaivai ma le faatauana ia “o mai ia Keriso” (Moronae 10:30, 32).

Sa ou iloa ai o le Tusi a Mamona na teenaina atoa le faamatalaga a le tagata o lau vasega. Afai o se Kerisiano o se tagata e talitonu ia Iesu Keriso, o lona uiga la, o lea itulau ma lea itulau i le Tusi a Mamona, ua fai mai, “Matou te talitonu!”

Sa iu ina ou toe vaai i lau uo. Sa ou faamatala i ai lou aafiaga ma valaaulia o ia e faitau le Tusi a Mamona. Sa ia teena ma le faaaloalo ae sa fai mai, sa fiafia o ia i lou talia o Iesu Keriso e avea ma ou Faaola. Ma ina ua uma le ma talanoaga, ou te manatu na sili atu ona ia malamalama i le uiga o lau tala ina ua ou fai atu, “Ioe, o i matou o Kerisiano.” ■

“Ou te faatusatusa pea lava pea au i isi, ae maise o i latou o e foliga mai o loo ola atoatoa. E faapefea ona faateleina o’u lagona mautinoa?”

“Tatou te faaaluina le tele o le taimi ma le malosi e faatusatusa ai i tatou lava i isi... O lenei mea e mafua ai ona tatou fatuina ni faamoemoega mo i tatou lava ia e faigata ona ausia... ”

“... E finagalo [le Atua] ia tatou atoatoa, ma afai tatou te tumau i le ala e avea ai ma soo, o le a i ai le aso o le a tatou atoatoa ai. E le o i ai se afaina i lou le'i oo atu i ai iina. Ia e galue pea i ai, ae tuu ia lou faasalaina o oe lava.”

Elder Dieter F. Uchtdorf, o le Korama a Aposetolo e Toasefululua, “Aua Ne’i Galo A’u,” konafesi aoao Oke. 2011.



Tatalo ia Iloa Au Meaalofa

E anoanoai au taleni ma meaalofa faaleagaga ua tuuina mai e le Tama Faalelagi mo oe lava ia.

E i ai ni auala ua nao oe lava e mafai ona faamanuia ai olaga o isi? O le fuafuaga lenei a le Tama Faalelagi. Tatalo ia iloa po o a meaalofa ua tuuina mai ia te oe, ma afai e te manaomia nisi taitaiga, ia fesili ia i latou e latalata atu ia te oe. O le faalogo i le Agaga ma le taumafai ia iloa ma atinae au taleni ma uiga faalelagi, e mafai ona e maua ai le lagona mautinoa ia te oe lava lea atonu e te lei mauaina muamua.

Amy P., 17 tausaga, Kentucky, ISA



Ia Faamasani Lelei ia i Latou

Soo se taimi lava ou te iloa ai ua ou faatusatusa ina au lava i se isi tagata, ou te taumafai ia ou iloa

lelei teisi atu lena tagata. A ou masani loa i la’u “tagata autu,” e taia malosi mai le mea moni e faapea, e feagai tagata ola uma i luga o le lalolagi ma tofotofoga i o latou olaga. O le tele lava o lo’u talanoa i lena tagata, o le amata tele foi lea o lo’u vaaia o i latou o se uo ae le o se tasi e foliga mai e leai ni ona faaletonu.

Amelia C., 15 tausaga, Aitaho, ISA



E Na’o le Tama Faalelagi e Tauga Ona Manatu

I lana lauga o le konafesi ia Oketopa 2016 “O Lava Ea Lo’u Lelei? Pe O Le A Ou Ausia Ea?” Na saunoa mai ai Elder J. Devn Cornish o le Fitugafulu e faapea,

“E na o le pau le manatu e taua ia i tatou o le mea o loo finagalo ai lo tatou Tama Faalelagi ia i tatou. Faamolemole ia ole atu ma le faamaoni ia te Ia po o le a Sona finagalo ia te oe. O le a Ia alofa ma faasa’o mai ae le faalotovaivaia i tatou.” A ou mafaufau faapea o le a le mafai ona ou lelei e pei o tagata e siomia au, ou te liliu atu i lo’u Tama Faalelagi ma taumafai e manatua o au o se afafine o se Atua agalofa, o le e naunau e fesoasoani mai ia ou ausia o’u gafatia uma ma avefa ma tagata ua Ia silafia e mafai ona avefa ai au pe a ou sailia o Ia.

Amanda M., 19 tausaga, Paraná, Pasila

Tatalo mo le Mautinoa

Sa masani ona ou faatusatusaina au lava i isi o e sa ou manatu sa sili mamao atu ia te au, ae maise lava o tagata o e sa sili atu ona mautu i tulaga tautupe. Soo se taimi lava ou te tatalo ai i le Tama Faalelagi, Na te tuuina mai ia te au le mautinoa ia te au lava. Na ou iloina po o le a lava le faigata, o le a fesoasoani mai le Atua ia te au aua Na te le tuuina mai ia i tatou se tiute sei vagana ua Ia saunia le ala mo i tatou e faataunu ai (tagai 1 Nifae 3:7; 17:3).

Joshua O., 19 tausaga, Lagos, Nigeria

O tali ua faamoemoe e mo se fesoasoani ma ni manatu ae e le o se faalauiloaga aloaia o aoga faavae o le Ekalesia.



O le a le meaalofo o le iloatino?

O loo talanoa mai tusitusiga paia e uiga i le “iloina o agaga” o se meaalofo o le Agaga (1 Korinito 12:10; MF&F 46:23). O lona uiga “ia malamalama pe iloa se mea e ala i le mana o le Agaga... E aofia ai le muai iloa o le uiga moni o le tagata ma le pogai ma le uiga o faaaliga faaleagaga” (Taiala i Tusitusiga Paia, “Iloatino, Meaalofa o le,” scriptures.lids.org).

Ua aoao mai Elder David A. Bednar o le Korama a Aposetolo e Toasefululua e faapea, o le meaalofo o le iloatino e mafai ona fesoasoani tatou te (1) “iloa ai mea sese natia ma mea leaga o loo i ai i isi,” (2) “iloa ai mea natia ma mea leaga o loo i ai ia i tatou lava,” (3) “maua ma aumai ai i luma mea lelei atonu o loo natia i totonu o isi,” ma (4) “sue ma aumai ai i luma mea lelei atonu o loo natia i totonu o i tatou” (“Quick to Observe,” *Liahona*, Tes. 2006, 19).

O Le A Sou Manatu?

“E faapefea ona ou taofia au masini faaeletonika mai le faalavelave ia te au, ae maise lava i le lotu ma le seminare?”

Auina mai lau tali ma, afai e manaomia, o se ata manino lelei a o le’i oo i le aso 15 o Iulai 2018, i le Liahona.lids.org (kiliki le “Submit an Article or Feedback”).

E ono faapupuina tali mo le uumi po o le manino.

ILOA AU MEAALOFA

Saunia e Justina Lichner

E foliga mai e fai mai uma tagata, “Maimau pe ana e iloa lou maoae.” Ia, o le mea moni, o nisi taimi e te le iloa ai lou maoae. Pe a tatou le lagona le pei o i tatou o le tagata e sili ona atamai, sili ona lelei, sili ona aulelei, sili ona malie, ma le sili ona talenia, e foliga mai la ua mouese lo tatou talitonu ia i tatou lava.

Ae mafaufau i le mea lenesi: o i tatou uma o atalii ma afaine o le Tama Faalelagi. O le mea lea, ua Ia tuuina mai ai ia i tatou ni meaalofo ma ni taleni tulaga ese e fesoasoani e faataunuu ai o tatou gafatia faalelagi. A o tatou iloaina nei meaalofo, e faamanatu mai ai lo tatou taua faalelagi o ni Ana fanau, ma e mafai ona tatou faalatalata atili atu ia te Ia ma fesoasoani ai i isi ia faia foi faapea.

masani lava e ala i valaaulia e faatino. Faaaoga le mau lenesi e fai ma faatai-taiga: “Tuu le fefinaua’i ma le tasi; tuu le tautala leaga o le tasi i le isi” (MF&F 136:23). O a ni meaalofo e mafai ona e atinaeina mai lenesi valaaulia? O le meaalofo o le tautala i upu agalelei, o le meaalofo o le faatoatoaina o isi, o le meaalofo o le loto pulea, ma isi mea e tele. Ma e nao le tasi le fuaiupu ua maua mai ai! O le faitau i tusitusiga paia ma le faalogo i uunaiga a le Agaga e mafai ona fesoasoani e te iloa ai au meaalofo.

ILOA AU MEAALOFA

O manatu nei e iva e fesoasoani e te iloa ai nisi o au meaalofo e tau le iloa.

1. Fai atu i isi e ta’u atu ia te oe.

O nisi taimi tatou te le vaaia ai ia i tatou lava mea e mafai ona iloa e isi ia i tatou. Fai atu i se uo, tagata o le aiga, po o se taitai o le Ekalesia e tusi atu se faamatalaga puupuu ia te oe e uiga i se meaalofo po o se taleni latou te vaaia ia te oe.

2. Vaavaai mo meaalofo i puapuaga.

I taimi faigata, e mafai ona tatou filifili i le va o le faali atu i fafo o o tatou uiga sili ona lelei po o o tatou uiga e sili ona leaga. Pe a oo i taimi faigata, ia taulai atu i le iloaina ma le faaogaina o ou uiga sili ona lelei ma meaalofo.

3. Tatalo mo le fesoasoani ia iloa

ai au meaalofo. E silafia e le Tama Faalelagi o tatou gafatia faalelagi. Afai e faafaigata ona tatou vaaia lena mea ia i tatou lava, e mafai ona fesoasoani mai o Ia. E mafai ona e tatalo mo le fesoasoani ia iloa ai au meaalofo.

4. Aua le fefe e faataitai ni mea fou.

Pe o tatou atinaeina nao meaalofo ua uma ona tatou iloa ona o lo tatou fefefe tele e fai se mea tatou te lei faia muamua? O le taimi lenesi e faataitai ai se mea fou ma iloa ai meaalofo e lei mailoa.

5. Saili i le afioga a le Atua.

E fesoasoani mai le Tama Faalelagi ia tatou iloa ma atinae a tatou meaalofo e ala i faateite o loo maua i tusitusiga paia—

6. Vaai i fafo atu o oe lava.

O nisi taimi e faaalia ai o tatou uiga sili ona lelei i taimi tatou te le o taulai ai ia i tatou lava, ae nai lo o lena, e taulai atu i auala e mafai ona tatou galulue faatasi ma fesoasoani ai i isi. Pe a tatou faia lena mea, o le a tatou iloa ai, ua ia i tatou le tele o meaalofo faaKeriso.

7. Mafaufau i tagata e te faamemelo

i ai. O ai nisi e te fia faataitai i ai? E mafai ona e faia se lisi o meaalofo uma o loo i ai i le tagata e te fia faataitai i ai ma, nai lo o le taulai atu po o le fea o meaalofo e te lua le tutusa ai, ia patipatia le iloaina o meaalofo e te lua tutusa ai.



O LE MANAO IA ILOA

“Ou te iloa e tele meaalofa ma taleni a lo tatou Tama Faalelagi ua la finagalo e faaee mai i o tatou luga, peitai ‘e faalagolago lea i lo tatou ole atu mo na mea. O faamanuiaga e manaomia ai ni a tatou galuega po o taumafaiga o la tatou vaega’ (Bible Dictionary, ‘Prayer’).”

Elder Mervyn B. Arnold o le Fitugafulu, “O Fea Ua Ou I Ai? Auala e Iloa ma Atinae ai Au Meaalofa Faaleagaga ma Taleni,” *Liahona*, Tes. 2014, 61.

8. Mafaufau i lou aiga. O a ni au meaalofa o loo i ai, o loo faapena foi ona i ai i nai ou tei, matua, po o matua o matua? la alu pea i luma! Saili talafaasolopito o aiga, ia iloa tala, ma faailoa foi nisi meaalofa tou te tutusa ai ma lou aiga.

9. Ia faia pe faitau lou faamanuiaga faapeteriaka. E mafai ona talanoa mai lou faamanuiaga e uiga i au meaalofa o loo i ai ma e tatau ona atinae, ma e mafai foi ona faasino atu ai oe i le auala o le a taitai atu ai i le iloina o isi meaalofa ma taleni fou.

IA FAAATOATOAINA IA TE IA

E le faapea e tatau lava ona tatou lelei silisili i mea uma ia iloa ai o i tatou o ni fanau tauaogaina a le Atua. E na o le tau lava ona tatou tuuto i le iloina ma le atinaeina o a tatou meaalofa ma taleni—ona, ala mai lea i le Togiola a Iesu Keriso, e mafai ai ona tatou atoatoa ia te Ia (tagai Moronae 10:32). ■

E alala le tusitala i Rhineland-Palatinate, Siamani.

FESOASOANI I ISI IA ILOA MEAALOFA

Tatou te vaaia mea i isi atonu e le mafai ona latou vaaia ia i latou lava. I le vaiaso lenei, ia faasoa atu na mea i se uo po o se tagata o le aiga. O nisi nei o fesili e fesili ai ia te oe lava e mafai ona fesoasoani ia e iloa ai meaalofa a isi.

1. O le a se mea ua latou faia e fesoasoani ai ia te oe?
2. O a ni mea e te fiafia ai e uiga ia i latou?
3. O ni mea latou te lelei ai?
4. O a ni mea o loo latou taumafai ia lelei atili ai?

TAUSIGA

MAFAUFAU
LOLOTO



O LE
malamalama

FAALEAGAGA E FAAAUUAU PEA ONA
SUSULU ATU I LUGA O FOAFOAGA
UMA A LE ATUA.

Elder Dieter F. Uchtdorf
Korama a Aposetolo e Toasefululua,
“O ʻÉ Tauaveina le Malamalama Faalelagi,” konafesi aoao Oke. 2017

E I Ai Pea le Malamalama lina

Saunia e Elder Dieter F. Uchtdorf
O le Korama a Aposetolo e Toasefululua

I taimi o a'u malaga faataamilo i le tatou paneta o le lalolagi a o kape-teni ai i se vaalele, sa ou maofa pea i le matagofie ma le atoatoa o foafoaga a le Atua. Sa faapitua lo'u maofa i le sootaga i le va o le lalolagi ma le la. Ou te manatu i ai o se lesona loloto o meafaitino, i le auala o loo i ai le pouliuli ma le malamalama.

E pei ona tatou iloina uma, o itula uma e 24 e liliu ai le po i le aso ma le aso e liliu i le po.

O lea la, o le a le po?

O le po e leai a se mea ua na o se atalafoia.

E oo lava i po e sili ona pogisa, e le muta lava le faasusulu mai e le la o lona malamalama. E faaauau pea ona susulu tele mai. Ae o le afa o le lalolagi o loo i ai i le pouliuli.

O le leai o se malamalama e mafua ai ona pogisa.

A oo ina pa'u mai le pogisa o le po, tatou te le faanoanoa ma popole faapea ua le toe i ai se la. Tatou te le manatu ua le o toe i ai le la iina pe ua mate foi. Ua tatou malamalama o loo tatou i ai i se atalafoia, o le a faaauau pea ona taamilo le lalolagi, ma e iu lava ina toe oo mai ave o le la ia i tatou.

O le pouliuli e le o se faailoga lena e le o i ai se malamalama. Ae tele lava, o lona uiga tatou te le o i ai i le nofoaga sa'o e maua ai le malamalama.

E faaauau pea ona susulu mai le malamalama faaleagaga i luga o mea uma na foafoaina e le Atua.

E faitalia lava i tatou pe tatou te i ai i le nofoaga sa'o e vaai atu ai i le malamalama faalelagi ma le upumoni o le talalelei a Iesu Keriso. E tusa lava pe oo mai le po ma foliga mai ua pogisa le lalolagi, e mafai lava ona tatou filifili e savavali i le malamalama o Keriso, tausi i Ana poloaiga, ma molimau atu ma le lototele i Lona moni ma Lona silisiliese.

O taimi uma tou te ua'i atu ai o outou loto i le Atua i tatalo faamaulalo, tou te mauaina Lona malamalama. O taimi uma tou te saili atu ai i Lana afioga ma Lona finagalo i totonu o tusitusiga paia, e faatuputeleina ai lava le susulu o le malamalama. O taimi uma tou te matauina ai se tasi o mafatia ma ositaulaga ai lou lava toafimalie e aapa atu ai ma le alofa, e faalauteleina le malamalama ma maena. O taimi uma e te teenaina ai se faaososoga ae filifili le mama, o taimi uma e te saili atu ai [mo se faamagaloga] pe faamagaloga atu, o taimi uma e te molimau atu ai ma le lototele e uiga i le upumoni, e tuliesea ai e le malamalama le pouliuli ma tosina mai ai isi o loo saili foi i le malamalama ma le upumoni. ■

Mai se lauga o le konafesi aoao o Oketopa 2017, a'o avea ai Elder Uchtdorf ma Fesoasoani Lua i le Au Peresitene Sili.



Sa soifua i **Ostrava, Czechoslovakia**, i le aso 6 o Novema, 1940



Sa auai o ia i le Ekalesia i le 1947 i Zwickau, Siamani.

Sa lagolagoina o se sui o le **Korama a Aposetolo e Toasefululua** i le aso 2 o Oketopa, 2004



Ao avea ma se tamaitiiti, o i latou ma lona aiga o ni **tagata sulufai**, sa sosola ese ma Czechoslovakia i Siamani ona sosoo ai lea mai i Siamani i Sasae i Siamani i Sisifo.

Sa faaipoipo ia Harriet Reich i le 1962 i le **Malumalu o Bern Suitiselani**



Sa faigaluega o ia o se pailate mo le Kamupani Vaalele o le **Lufthansa Siamani**.

Sa avea o ia ma se kapeteni i le 29 o ona tausaga.

Faaali Atu o Lona Alofa

**TALOFA
LAVA!**

O lo'u igoa o Alofa.

**Ou te faasusulu atu lo'u
malamalama e ala i le
faaali atu o le alofa
i lo'u aiga.**

E Uiga ia te Au

Ou te nofo i Nigeria. O se atunuu lea i totonu o Aferika. Matou te nonofo ma o'u matua ma o'u tuagane. O le pese e sili ona ou fiafia i ai o le "Tamaiti i le Lalolagi Atoa." O le mau e sili ona ou fiafia i ai o le 1 Nifae 3:7.

Latalata i le Malumalu

Matou te nonofo latalata lava i le Malumalu o Aba Nigeria. E na'o le lima minute e savali atu ai iina! Ou te lagonaina lava le fiafia pe a ou asiasi i le malumalu. O loo ou sauniuni mo le taimi e mafai ai ona ou alu i totonu e fai papatisoga.



O Le Nofoga Silisili e I Ai

O Aso Gafua, ou te faamanatu ai i o’u tuagane e uiga i le afaifi faaleaiga. Ou te fiafia pe a kuka e lo’u tama le meaai o le afaifi ma matou sisiva faatasi uma. O le aiga o le nofoaga silisili lea e i ai.



Fesoasoani i O’u Tuagane

O taeao uma lava, ou te fafagua ai o’u tuagane laiti mo le lotu a le matou aiga. Matou te usuina viiga, suesue i tusitusiga paia, ma tootutuli ma tatalo faatasi. Ona ou fesoasoani lea e sauni i latou mo le aoga. Ou te lagona o se tiute ua ou aitalafu ai i lo’u Tama Faalelagi le alofa ma fesoasoani i nai o’u tei.

Galue ma le Taalo

A tuua le aoga ou te fesoasoani i lo’u tina i galuega i le matou fale. Ou te fesoasoani foi i o’u tuagane i a latou meaaoga. E le tele ni taimi ou te taalo ai, ae ou te fiafia e tietie i la’u uila ma fai maua. Ou te lagona le alofa o le Tama Faalelagi pe a ou faali atu le alofa i lo’u aiga.



E MAFAI FAAPEFEA ONA E SUSULU ATU?

- Faitau atu i se uso po o se tuafafine?
- Fesili atu i lou tina po o lou tama i avala e mafai ona e fesoasoani atu ai.
- Faamanatu i lou aiga e uiga i le tatalo faaleaiga.

AUINA MAI IA I MATOU SE FETU!

Na fetalai mai lesu ia i tatou “ia faapea ona pupula atu lo [tatou] malamalama i luma o tagata” (Mataio 5:16). E faapefea ona e faasusulu atu lou malamalama? Imeli mai ia i matou se ata o lou fetu ma lau tala, ata, ma se faatagaga a matua i le liahona@ldschurch.org.



“A valaau mai tina ou te usitai, ou te manao e fai mea lelei, i aso uma” (Tusipese a Tamaiti, 197).

Sa matamata Anetone ao sii ai e le lau o le komepiuta le vaega lona ono mo le pei o le faamiliona lea o taimi. Sa ia manava tele i totonu ma amata loa ona feosofai solo i le auala lavelave, lele i luga ae o mea matuituia felanulanuai ma ui atu i ana o afi. Sa atili vave le tata o lona vae ao latalata ma latalata atili atu o ia i le laina o le tini.

“Anetone?” O le leo lea o Tina. Na pei na i ai se mea sa ia manaomia.

“E le o le taimi lenei!” o ona mafaufauga ia. Sa puna o ia i luga o se isi mea matuitui ma masau atu i le loloto o se isi ana. “Ia?” sa ia fai atu ai, ae sa le aveesea lana vaai mai le lau.

“E mafai ona e faia le ofumoe o Felise ma faitau i ai se tala faamolemole? Se’i faauma ona ou tapenaina le umukuka.”

“Um . . . ,” Sa *matuai* lalata atu lava o ia! Sa pio ese o ia mai se pioga matuitui, ova i luga o se isi afimumu, pasia se sauai soli [tagata], ma . . . IOE! ma alu atu loa i le laina o le tini!

Na sii mai e le komepiuta le vaega lona fitu. Sa foliga mai na faigata teisi atu, ae sa le mafai ona faatali Anetone i le fia faataitai i ai. Sa galue malosi lava o ia ina ia oo atu i le vaega lenei. Sa oomi e Anetone le faamau o le malolo ma tilotilo atu ia Tina, o le sa siina lona uso laitiiti o Felise. “E mafai ona tuu mai ni nai isi minute? O lea faatoa ou oo i le vaega lona fitu!”

“O loo ou matuai manaomia lava lau fesoasoani,” sa fai atu ai Tina. “E mafai ona e faia se isi vaega se tasi pe a uma ona e vaaia Felise.”

Na ataata Felise. “Molemole?” sa ia fai atu ai i si ona tamai leo e lua tausaga le matua.

O Le Taimi Moe mo Felise

Saunia e Heidi Poelman

E faavae i se tala moni



Sa tilotilo atu Anetone i le lau o le komepiuta ma mapusela. “Ua lelei.” O le a ia topea lava ina ia mafai ona toe foi mai i lana taaloga.

Sa ia sii ae Felise ma ave atu o ia i luga o sitepu i le la potu.

“O ai lo’u uso pepe e sili ona ou fiafia i ai?” sa ia fai atu ai, ma tuitui le manava vaivai o Felise. Sa ia feulaina le manava o Felise ma ataata a o ii le ata a Felise.

Sa faaofu e Anetone ia Felise i lona ofumoe tainasoa e sili ona fiafia i ai. Ona ia siia lea o Felise i luga o le moega ma savali loa mo le faitotoa.

Sa fai atu Tina ia te ia e faitau foi se tala ia Felise, ae na ia faia le vaega taua. Atonu o le taimi lenei e mafai ona oo ai i nisi vaega se *lua* ao lei oo i le taimi e moe ai.

O le taimi lava lena,
sa faalogoina ai
e Anetone
se toso



i lona ofutino.
Sa tilotilo ifo o
ia ma vaaia ai ua pea
ese Felise mai le moega.
“Pea?” Sa fesili atu ai
Felise. Sa tamoe o ia i lana ato tusi
ma aumai ai se tusi e i ai le pola pea
i luma.

“Se, Felise, o loo i ai a’u mea e fai!” Sa fai atu ai Anetone. Sa uu e Felise le tusi i luga ae o lona ulu, ma tilotilo atu ia Anetone i ona mata lapopoa eena.

Sa leai se mea na mafai e Anetone ae nao le ata. “E te le manao lava e tali atu leai, a ea? Ia, LELEI.”

Sa saofai ifo Anetone i luga o le moega o Felise, ma sa pe’a atu Felise i luga o ona vae. Sa susue e Anetone le itulau muamua ma faitau ao

faalagolago atu Felise ia te ia. Sa tusi atu le lima o Felise i meaola taitasi i luga o le itulau ma faataitai ona ta’u le igoa. “Zee-ba . . . famingo . . . wah-wus.”

Ina ua uma, sa tapuni e Anetone le tusi ma aui Felise i le palanikeke. “Manuia le po, Felise,” sa ia fai atu ai, ma kisi i le ulu o Felise ma tu i luga e alu.

Ae ao savali atu o ia agai i le faitotoa, sa ia toe faalogoina foi lena leo itiiti. “Faapupuu?”

Na ataata Anetone. “Ua Lelei. Soso atu. O le a ou nofo laitiiti.”

Sa taoto Anetone i luga o le aluga. O le mea e sili ai o le taimi lea, na te lei fia faia ai lava se isi mea. Sa ataata o ia ina ua mavava tele Felise ma moeiini ona mata. Sa ia lagona o le fiafia sili lea na ia oo i ai i le aso atoa. E mafai ona faatali lana taaloga. ■

E alala le tusitala i Iuta, ISA.



O Totila ma Amigas

Saunia e Lindsay Stevens Tanner ma Maryssa Dennis

E faavae i se tala moni



“A e manao i se uo, ia e faaali atu e te alofa” (Children’s Songbook, 262).

Sa faaivaiva Adriana. Sa manao e taalo ma lona uso masaga o Taiana. Ae sa o Taiana ma Mama e faatau mai le meaai mai le maketi. Sa mapusela Adriana. Sa lagona le matuai gaogao o le fale. Sa moo-moo anailoa lava latou te o.

Sa tonu ia Adriana e asiasi i lona tuaoi o Makalita. O le fanau a Makalita ua matutua uma, ma sa pei o ia o se tinamatua ia Adriana. E tele lava mea malie la te faia faatasi i taimi uma.

Sa alu Adriana i fafo. Sa vevela le susulu ifo o le la ao ia savali atu i le fale o Makalita. Sa faanoono atu lona ulu i totonu o le faitotoa. “Makalita, o e i le fale?”

“Sī, O lea ou te i le umukuka,” o le valaau lea a Makalita. Sa tau atu Adriana o saofai o ia i le laulau i le umukuka o loo punou lona ulu. Sa ea a’e o ia ina ua alu atu i totonu Adriana.

“Malō, Adriana,” na fai atu ai Makalita. Sa ataata laitiiti o ia. Ae sa foliga mai e faanoanoa.

“E i ai se mea o faaletonu?” sa fesili atu ai Adriana.

Sa mapusela Makalita. “E le o se mea e tatau ona e popole i ai.”

“E mafai faapefea ona ou fesoasoani ia lelei ona lagona?” Sa mafaufau ai Adriana. O taimi uma lava sa foliga mai e fiafia ai Makalita pe a la faia faatasi se kuka. “E mafai ona ou fesoasoani ia te oe e fai ni totila?”

“Lea faatoa uma lava ona ou faia,” o le tala lea a Makalita. Sa ia aveese se solofafano e faaali mai ai se faaputuga totila.

“Ia e mafai la ona ou fesoasoani ia te oe i le aiga o totila?” Sa fesili atu ai Adriana ma se ataata.

Sa ata Makalita. “Ioe. Se’i ou faavevelaina ni pi e ai faatasi ai.”

Sa tutu Adriana i talaane o Makalita i le ogaumu ma saeu ia pi uliuli ua toe falai i totonu o se ulu. Ina ua vela pi, sa ia aveina atu i le laulau. Sa aumai e Makalita ia totila ma le sisi.

Sa aumai e Adriana se totila mafanafana ma fola ai luga pi. Ona ia faasalalau ai lea o le sisi i luga. Sa manaia lona foliga mai! Sa le mafai ona faatali Adriana e u. Ae sa i ai se mea sa manao o ia e fai muamua.

“E mafai ona ou faia se tatalo, faamolemole?” Na fesili atu ai Adriana ia Makalita.

“Ioe.”

Sa moeiini mata o Adriana ma piilima ona lima. “Le Tama Faalelagi, matou te faafetai atu i Lau Afio mo lenei meaai. Faamolemole ia faamanuia ia matou maua ai le ola maloloina ma le malosi. Ma faamolemole fesoasoani ia Makalita i soo se mea na te manaomia. Ou te fiafia o au o lana uo. I le suafa o Iesu Keriso, amene.”

Na pupula mata o Adriana. Sa i ai se ataata lapoa i [foliga] o Makalita—o le taimi lenei o se ataata moni. A o la aai, sa la talanoa e uiga i le aoga ma taaloga

ma tusi. E fiafia tele Adriana e talanoa ma Makalita.

Ina ua uma ona la aai, sa tuu atu e Adriana se opo lapoa lava ia Makalita. “Faafetai lava mo le meaai. Sa ou maua se taimi fiafia!”

Sa opo atu e Makalita ia Adriana. “Faafetai *lava*, Adriana. Sa ou manaomia se uo ananei.”

Sa matuai fiafia Adriana. “Ua ou fiafia ua ta *amigas*.”

“Ua ou fiafia foi ua ta uo,” o le tala lea a Makalita. “Aisea e te le alu ai ma ave ia totila uma nei i le fale? Ua matuai ou maona lava.”

Sa musamusa atu Adriana ina ua toe foi i lona fale. Sa ia lagona foi le maona—ma e le mai nao totila! Sa tumu o ia i le faauoga mai le ulu e oo i tamaivae. ■

E alala tusitala i Iuta, ISA.


TOTILA O FAAUOGA

O totila sana nei e faigofie ma e fetau lelei lava mo le faia ma le faasoaina atu i uo! la mautinoa e i ai se tagata matua e fesoasoani atu.

2 ipu masa farina (falaoamata mai le sana)

1 1/2 ipu vai vevela

1. Saeu le masa farina i le vai vevela. Lomi le paluga seia vaivai.
2. Olo le paluga e fai ai ni polo laiti. Tuu le polo e tasi i le va o pepa faaga'o e lua.
3. Faaaoga se apa po o se falai, oomi i lalo ia polo mo ni nai taimi.
4. Kuka le totila i se falai i le vevela feoloolo. A enaena loa le itu i luga, liliu ona kuka lea o le isi itu.
5. Tuu ai i luga pi ma le sisi, ma ai fiafia loa!



O Le Vavega

Upu ma le fati na tusia e Shawna Belt Edwards

Mālu ♩ = 68

mp

mp

1. Sa sa - vali le - su i le va - i. Sa
 2. Na ma - liu le - su mo a - 'u, Se

7

Ia va - vao le ā - fa ma le sa - mi. Sa faa - ma - lo - lo le le - pe - la, Faa -
 tau e le ma - fai na ou tau - ia. Ina ua la toe - tu, Na la au - mai Le

11

cresc. ----- *mf*

ma - lo - lo pipi - li, ma tau - a - so. Sa la fa - fa - ga le mo - tu o ta - ga - ta i a - re - to. Le
 mea - lo - fa sili i le la - lo - la - gi. E faa - ma - ga - lo - ina a - 'u pe a ou sa - la - mo, Na

cresc. ----- *mf*

© 2018 Puletaofia e Shawna Belt Edwards. Ua taofia aia tatau uma.
 O lenei pese e mafai ona kopiina mo le faaogaina i le lotu po o le aiga i mea e le faapisinisi.
 E tatau ona tuu lenei faasilasilaga i luga o kopi taitasi e faia.

15

afa - fine o le pule na o - ti, Na la toe faa - tu mai.
 te sii a'e a'u se a - so e ma - fu - ta ma I - a.

17

le - su o le A - tua o va - ve - ga; Leai se mea e fai - ga -

21

ta ia te I - a, Ae ou te iloa: O La - na va - ve - ga, sili - si - li

24

o - na ma - o - fa Na la - ve - a'i ai lo'u o - la.

27

la. Na la - ve - a'i ai o ta - tou o - la.

f, *mf*, *mp*, *molto rit.*, *p*

Matamata i se vitio e pese faatasi ai mo le pese leni i le children.lds.org.
 Kiliki i le "Music" ma le "Sing-Along Videos."



“Ou te molimau atu o Iesu Keriso o lo tatou Leoleo Mamoe Lelei, e alofa ia i tatou ma popole mo i tatou. Na te silafia i tatou ma na foai mai Lona soifua mo Ana mamoe. O loo soifua foi o Ia mo i tatou ma finagalo ia tatou iloaina o Ia ma faatino le faatuatua ia te Ia. Ou te alofa ma faamemelo ia te Ia, ma ou te matua faafetai tele mo Ia.”

Saunia e Elder Dale G. Renlund

O Le Korama a Aposetolo e Toasefululua


Mai le “O Lo Tatou Leoleo Mamoe Lelei,” Liahona, Me 2017, 32.



Saunia e Sister
Cristina B. Franco

Fesoasoani Lua i le
Au Peresitene Aoao
o le Peraimeri

E Silafia Oe e le Tama Faalelagi



O Aso Sa uma lava i se taulaga laitiiti i Atenitina, e faapotopoto ai se vaega o tagata i lalo o se laau e faitau tusitusiga paia ma aoao e uiga i le talalelei. O nisi o tagata o ni tagata o le Ekalesia. Ae o le toatele o i latou sa lei papatisoina, sa latou matuai mananao lava e papatiso!

Ae peitai, sa i ai so latou faafitauli. E mamao lava le mea latou te nonofo ai mai isi taulaga. Ua umi tele e lei i ai ni taitai o le Ekalesia na o mai e asiasi i lo latou taulaga.

Ona latou faalogo lea e faapea, sa i ai nisi o faifeautalaitai i le taulaga pe a ma le fa itula le mamao ese. Sa latou saosao tupe uma ina ia mafai e se alii e toatasi ona faatau se pepa malaga o le pasi e alu i le taulaga lea sa i ai faifeautalaitai. Ina ua taunuu atu o ia iina, sa faatalitali o ia i le nofoaga e tau i ai pasi. Sa manatu o ia, o le nofoaga aupito lelei lea e sue ai faifeautalaitai.

Ina ua mavae ni nai itula, ona ia vaaia ai lea o ni alii talavou se toalua. O i laua o ni faifeautalaitai! Sa ia ta'u atu ia i laua e uiga i tagata i lona nuu. Ona fuafua ai lea e

faifeautalaitai ma le peresitene o le misiona se malaga e feiloai i nei tagata.


O le aso sa o mai ai le peresitene o le misiona ma faifeautalaitai, e toatele tagata sa faapotopoto faatasi e feiloai ia i latou. O lea la ua mafai nei ona papatisoina i latou sa lei papatisoina. Ina ua uma ona aoaoina i latou i lesonea, sa saunia i latou!

O le vaitafe aupito lata mai sa matuai mamao foi, o lea sa latou pamuina ai le vai mai se vaieli ma faatumu ai se pa'u taele feaveai. E tolu itula na alu i le faatumuina o le pa'u taele! E 27 le aofaiga atoa o tamaitai, alii, ma tamaiti na papatisoina i lena aso. Sa faatumulia i latou i le olioli!

Sa silafia e le Tama Faalelagi sa mananao nei tagata e papatiso, ma sa Ia fesoasoani ia i latou i le sueina o faifeautalaitai. E silafia foi oe e le Tama Faalelagi. O loo Ia silafia le mea o loo e i ai, ma le tagata e i ai oe, ma mea e te manaomia. Na te faafogaina ma tali mai i au tatalo. Po o le a lava lou lagonaina o le tuuatoatasi, o loo i ai o Ia i taimi uma iina. E le o tuua lava na'o oe. E mafai ona e liliu atu ia te Ia i taimi uma. ■

Ua Mulimuli Mose i le Atua

Saunia e Kim Webb Reid



I se tasi o aso sa maua ai e se purinise se Aikupito se pepe Eperu i totonu o se ato. Sa ia faaigoa o ia ia Mose ma tausii o ia e avea ma aloalii.

Ina ua matua Mose, sa lei fiafia o ia i le faiga na fai ai e tagata Aikupito ia tagata Eperu, o latou pologa.

Ina ua tu atu Mose mo i latou, sa manao le tupu o Aikupito e fasioti o ia. O lea sa tatau ai ona sola ese ia Mose. Ona fai atu lea o le Atua ia te ia e toe foi e faasaoloto mai tagata Eperu.



Sa talosaga atu Mose
ia Farao, le tupu, e tuu
tagata Eperu e o. Sa
fai mai Farao e leai.
Sa fesoasoani le Atua
ia Mose e fetuu le
laueleele ina ia sui ai e
Farao lona mafau. Sa
faatumulia le laueleele
i lago, utu, sosoo ai ma
lane. Mulimuli ane, sa
fai mai Farao e mafai
ona o ese tagata pologa.




Ao latou o ese atu, sa
toe sui le mafau o
Farao ma auina atu lana
vaegaau e tuliloa i latou.
Ina ua oo atu le nuu o
Mose i le Sami Ulaula,
sa faia e le Atua se auala
matutu i le sami ina ia
mafai ona latou sao ai.



Sa tuuina atu e le Atua ia Mose ia Tulafono e Sefulu. Sa aoaina atu e Mose i tagata a o latou malaga agai atu i le nuu o le folafolaga. Mulimuli ane ua saogalemu ma saoloto i latou!

E mafai ona ou pei o Mose. E mafai ona ou mulimuli i tulafono. O le a fesoasoani mai le Atua ia te au pe a ou tu atu mo i latou o e manaomia le fesoasoani. ■



Mai le Esoto 2–34.

E Mafai Ona Avea Au o se Faatupu Filemu





**Saunia e Peresitene
M. Russell Ballard**

Sui Peresitene o Le
Korama a Aposetolo
e Toasefululua

O LE TATOU MALUTAGA I LE SAPATI

*Afai e mafai ona amata ona tatou mafau-
fau i le falesa o se malutaga o le faatuatua
ma le tuuto mo le sauniga faamanatuga,
o le a faamanuiaina uma i tatou.*

O le sauniga faamanatuga o se taimi matagofie ma le mamalu. A tatou laa atu i totonu o le falesa ma sauni e talia le faamanatuga, e tatau ona tatou mafaufau ia i tatou lava i le i ai i totonu o se malutaga, o se nofoaga paia ma faapitoa lea e mafai ai ona tatou mafaufau ia Keriso ma Lana misiona maoae ma le ofoofogia. Tatou te tuu ese ai mea o le lalolagi ae mafaufau i mea e faavavau. E manao-mia ona tatou tuu ese a tatou telefoni feaveai ae mafaufau loloto ia Iesu Keriso, le Alo o le Atua Soifua.

E nao le 70 lava minute o vaiaso taitasi tatou te taulai atu ai i lo tatou alolofa mo le Faaola. Afai e amata ona tatou mafaufau i le falesa o se malutaga o le faatuatua ma le tuuto mo le



sauniga faamanatuga, o le a faamanuiaina uma i tatou.


A o tatou atinaeina le malo o le Atua, e le mafai ona ou mafaufau i se mea e sili atu le taua nai lo o le i ai o se sauniga faamanatuga e saunia lelei, lea e saunoa ai failauga e uiga ia Keriso, molimau ia Keriso, ma faasoa atu molimau mai aposetolo ma perofeta i tusitusiga paia ma isi punaoa.

I le avefa ai ma se Ekalesia ua tatou taulai atu ai i le aso Sapati. Ua tatou alualu i luma, ae tatou te lei oo i ai. O le a faaaau pea a tatou taumafaiga

seia oo ina matuai uunaia faaleagaga ia tagata uma ma faifeautalai i le taimi o a latou tapuaiga i le aso Sapati, lea e taitasi i latou ma fai atu i lona tuaoi, tagata sailiili, ma aiga, “O mai e vaai. O mai tatou tapuai faatasi.” O iinei tatou te fia i ai.

Afai e mafai e i tatou uma o se Ekalesia ona faia leni mea, o i latou o e taliaina la tatou valaaulia e “o mai e vaai” o le a lagonaina le mana o le savali o le Ekalesia toefuataiina a Iesu Keriso. A o latou tapuai faatasi ma i tatou i a tatou sauniga faamanatuga, o le a faagaetia o latou loto ma o le a mumu le sulu o le talalelei i o latou loto ma mafaufau. ■

Mai le “O Le Falesa: O Le Tatou Malutaga i le Sapati” i le prophets.lds.org.




**O LE TALISUAGA MULIMULI,
SAUNIA E CLARK KELLEY PRICE**

“Ua oo i le itu aso, ona taoto ai lea o [Iesu] e taumafa, sa faatasi ma le au aposetolo e toasefulu ma le toalua. . . .

“Ona tago ai lea o ia i le areto, ua faafetai, ua tofitofi, ma avatu ia te i latou, ua faapea atu, O lo’u tino lenei, ua foaiina atu mo outou; tou te faia le mea nei e fai ma faamanatuga ia te au.

“Sa faapea foi ona tago i le ipu, ina ua uma ona talisua, ua faapea atu, O lenei ipu o le feagaiga fou lea i lo’u toto, ua faamaliigiina mo outou” (Luka 22:14, 19–20).



AUTALAVOU MATUTUA

**O LE FAATINOGA
FAAPALENIINA O LE
TUMAU AI**

*“O le mulimuli i mataupu faavae
ia e tolu, o le a fesoasoani
e le gata i le tumau ai ae
“fiafia e oo i le iuga.”*

44

18 TAUSAGA LE
MATUTUA
**A UMA
POLOKALAMA A
LE AUTALAVOU,
ONA A LEA?**

50

AUTALAVOU
**AUALA E ATINAE
AI AU MEALLOFA**

62

O LE EKALESLA A
IESU KERISO
O LE AU PAIA O ASO
E GATA AI

SAMOAN
4 0214752890 2